

John Carter Brown  
Library  
Brown University


121

JOHN CARTER BROWN  
LIBRARY

Purchased from the  
Trust Fund of  
Lathrop Colgate Harper  
LITT. D.









TRACTATUS  
DE  
GLOBIS, COE-  
LESTI ET TERRESTRI  
EORVMQVE VSV.

*Primum conscriptus & editus à ROBERTO HUES Anglo  
semelque atque iterum à IUDOCO HONDIO excusus, & nunc ele-  
gantibus iconibus & figuris locupletatus: ac de novo recognitus multisque  
Observationibus oportune illustratus ac passim auctus operâ ac studio*


IOHANNIS ISACII PONTANI Medici & Philosophiæ  
Professoris in Gymnasio Gelrico Hardervici.



AMSTELÆDAMI.

Excudebat IUDOCUS HONDIUS, sub signo  
Canis vigilantis in Platea Vitulina prope Senatori-  
am Domum ANNO cl<sup>o</sup> lxxvii.







*Amplissimo ac clarissimo viro*

D. F R E D E R I C O S A N D I O

DVCATVS GELRIÆ AC COMITATVS

ZVTPHANIE CONSILIARIO AC

SENATORI DIGNISSIMO

I O H A N N E S I S A C I U S P O N T A N U S .



*Um adestes superiori semestri nobis, vir clarissime ac honoratissime, deque studijs & seorsim de nostris amice & familiariter, ut sit, inter nos ageremus, accidit tum commodum, quod erat in manibus, ut hoc de Globis celesti ac terrestri, tibi exhiberemus. Quod cum vel argumenti nomine tum methodi aspectu, licet perfunctorie inspectum, arrideret, omnino faciendum putavi, ut postquam jam, Hondio curante, typis exaratum sit, non nisi ipsi tibi dicatum mitteretur. Nec ambigo quin intuitu primo quod placuit, nunc propius inspectum for-*

*misque Hondianis eleganter descriptum magis magisque sit placiturum. Nec enim longis ambagibus & gradu, quod dicitur, suspensio, sed in rem presentem & ad usum suum singula explicata deducuntur. Satiricus Arbiter agens de seculi sui declamatoribus ac studijs, existimabat in scholis fieri adolescentes stultissimos, quia nihil ex ijs, quæ in usu essent aut audirent aut viderent. Quod effatum si uspiam, certe in hisce, Astronomicis inquam & Geographicis, locum sibi vindicare proprie existimandum. Vnde & summa semper ope annisi illi veteres, ut nihil profuturum seculis diu lateret. Hinc Eratosthenes antiquorum geographicas descriptiones seu, ut Strabo loquitur, τὸν τῆς οὐρανόθεν τῶν πραγμάτων ad examen vocans, multa à prioribus perperam tradita convellit atque emendat. Et post vicissim non modo Eratosthenem, sed & Hipparchum, Posidonium, Polybium resumens idem argumentum Strabo posse se novi aliquid afferre docet, quod illis prædecessoribus suis ne notum quidem esse potuerit. Propertius, qui in tempora Strabonis incidit, hæc & ejusmodi, pictos mundos eleganter appellans, cujusmodi eorum usus & tractatio suo ævo fuerit, subindicat, cum ait:*



# E P I S T O L A

Cogor & è tabula pictos ediscere mundos,  
 Qualis & hæc docti sit positura Dei.  
 Et disco quâ parte fluat vincendus Araxes,  
 Quot sine aquâ Parthus millia currat eques.  
 Quæ tellus sit lenta gelu, quæ putris ab æstu,  
 Ventus in Italiam qui bene vela ferat.

*Quo loci positura est, quod Græci Cosmographi signanter Θερμὰς solent appellare. Cujusmodi Themata Constantini Porphyrogenneta Imp. super occiduo imperij Orientalis districtu Lutetiae olim edita habemus beneficio Frederici Morellij architypographi regij. Quæ tamen omnia, ut & illa priora, quàm inculta & rudi adhuc Minerva exasciata fuerint, demonstrant, præter alia, quæ vel ipse de Cratetis terrestri Globo refert libro 2 Strabo. Vt omittam ad testimonium citare antiquissimam illam itinerariam Tabulam, à Velsero nuper Plantinianis typis publicatam, quæ in longum & secundum terræ planiciem protensa, nullis latitudinum aut longitudinum notis insignis aliaque incommoda habens satis ostendit quam in hoc genere absolutiora nunc & ad summam perfectionem atque elegantiam perducta sint omnia. Nec aliud Astronomiæ fatum fuerit, ut esse magnarum rerum tardi progressus solent. Nam si primum cælestis sphæræ authorem requirimus, alius Atlantem, alius Anaximandrum, alij denique alios ciebunt: inter quos & Architas Tarentinus nominabitur non ignobilis scriptor. Cicero primo Tusculanarum Quæstionum Archimedes Syracusanum Lunæ & Solis nec non quinque reliquorum errantium motus in spheram alligasse dicet. Quem secutus exinde, & veluti explicans uberius Ciceronem, Firmianus Lactantius addit eam spheram concavo ære similitudinem mundi ac figuram reddidisse; In quâ ita Solem & Lunam idem Siculus composuerit, ut inæquales motus & cælestibus similes conversionibus, singulis quasi diebus effecerit; & non modo accessus Solis & recessus, incrementaque ac diminutiones Lunæ, verum etiam stellarum vel inerrantium vel vagantium dispares cursus, orbis ille dum verteretur, exhibuerit. Claudianus, qui in eandem spheram elegantissimo epigrammate ludit, non ex ære, ut Lactantius, sed ex vitro fabricatam tradit. Ipsum Epigrammation licet prolixius sit, fidei tamen & rei causa addendum. Ita enim habet:*

Iupiter in parvo, cum cerneret æthera vitro,  
 Risit, & ad superos talia dicta dedit:  
 Huccine mortalis progressa potentia curæ?  
 Iam meus in fragili luditur orbe labor?  
 Iura poli rerumque fidem legesque Deorum  
 Ecce Syracusius transtulit arte senex.

Inclusus



# D E D I C A T O R I A.

Inclusus varijs famulatur spiritus astris,  
 Et vivum certis motibus urget opus.  
 Percurrit proprium mentitus signifer annum  
 Et simulata novo Cynthia mense redit.  
 Iamque suum volvens audax industria mundum,  
 Gaudet & humana sidera mente regi.

*Mirabile automaton! & quo verè demonstravit Archimedes (quod de eo refert Tullius) ingenium atque animum suum plane divinum ac similem quodammodo ejus, qui ea machinatus in celo est. Nec tamen in totum & omnibus suis numeris expressisse celestia Archimedem verisimile faciant posteriorum adinventum. Nam & multò post, Sofigenis demum operâ, cursus Solis constitutus est, & eodem artifice usus fuit ad annum emendandum Iulius Caesar. Cui successit Andromachus Cretensis, qui Theoricarum faber celebratur, atque inde Proclus Diadochus, cujus Spherica sunt in manibus; itemque Menelaus Romanus, qui & Mileus, Geometra nominatur. Adeo ut pedetentim & haud levibus sed nostrorum similibus adminiculis ad tanti fastigij gradum pervenisse Mathematicam credibile habeamus. Quamvis Cardanus illis seculis difficillimum fuisse memoret astrorum motus ad numeros revocasse, non exstantibus scilicet ephemeridibus. Verum Cardano quis fidem fecerat ephemerides novitium aut majorum nostrorum inventum esse? Quid? nonne earum mentionem Iuvenalis disertè facit, qui tanquam pingua succina tritas ephemerides Satirâ sextâ dixit, & Porphyrius Arabico nomine Almenichia vocans; tum & Plutarchus, qui πινδων ἀστρονομικῶν vocabulo extulit? ut notavit ad Manilium Scaliger. Quibus addendus erat egregius locus Plinij ex libro 29, cap. 1, ubi de Crina sive Critia Massiliensi, celebri apud Romanos medico, Neronis temporibus: Critias, inquit, Massiliensis arte geminata, ut cautior religiosiorque, ad siderum motus ex EPHEMERIDE MATHEMATICA cibos dando horasque observando auctoritate Thessalum præcessit. Et ante Plinium, illo ipso Neronis ævo florens Arbiter Petronius demonstrat haud sine Tabulis aut ephemeridibus Planetarum motus eruisse aut thema constituisse eos, ubi inquit: Altera Tabula Lunæ cursum stellarumque septem imagines pictas habebat, & qui dies boni, quique incommodi essent distinguente bulla notabantur. Et ut hæc prima illa artis & artificum rudimenta fuerint, ita ad eorum diligentiam aliquid assidue procudendo sequentes adjecisse, nec unquam adhuc posteritati à superioribus relictum defuisse, quod aut emendatore aut illustratore non indiguerit, esse in confesso videatur. Sic illa antiquiora tempora excipiens Claudius Ptolemæus existimari poterat summam rei manum imposuisse, nisi postmodum Alphonsus Hispaniarum rex suis Tabulis, quid desideraretur, ostendisset. In*



# E P I S T O L A

Germania deinde summi viri Peurbachius, Regiomontanus, Stöfflerinus, Copernicus, repetitis observationibus, Tabularum quoque Alphonsinarum defectum & aberrationes demonstrare ac supplere pro virili fuerunt conati. Et tandem nostro hoc seculo omnes omnium antecedentium curas atque industriam supergressi duo insignes heroes Tycho Brahe, & Iosephus Scaliger: Quorum ille animadvertens siderum motus accuratius à se inspectos, nequaquam aut veterum aut recentiorum artificum observatis respondere, idque organorum, quibus usi fuerant, vitio, occurrere incommodo magnis animis atque incredibili impendio instituit, fabricatis successive (de quibus & ipse *ὁυτοπιης* & domesticus olim ejus contestari possum) talibus instrumentis, quibus omnia exacte cælitus deducerentur. Ijsque subsidijs ad Astronomiæ mox instaurationem progressus, illa eruditi pulveris volumina, quæ hodie apud omnes & præsertim intelligentes summo sunt in pretio, posteritati reliquit; præter viginti & unum manuscriptos codices, qui penes hæredes sunt, totidem annorum accuratissima observata complectentes. Iosephus verò Scaliger quàm multa ignorata hætenus etiam à doctis, & quorum in vulgatis præceptionibus nulla exstant vestigia, perlustratis Græcorum, Latinorum, Persarum, Arabum ac Chaldaeorum monumentis, ex prima ultimaque antiquitate eruit atque illustravit, ejus in Manilij *Astronomicon* posteriores Animadversiones & Libri de Temporum Emendatione testes sint. Atque hi, virorum eximie, illi sunt, quorum meminisse voluit divinus vates hisce versibus:

Felices animi, quibus hæc cognoscere primum  
Inque domos superas scandere cura fuit.  
Credibile est illos vitijque jocisque relictis,  
Altius humanis exeruisse caput.

Sanè huc se totos dedisse omnino consentaneum habendum, autumantes scilicet, quod Platonem dixisse legimus, ad hæc præcipue contemplanda mortalibus ab immortali Deo oculos fuisse concessos. Quo & Senecam collimasse & Corsici exsiliij solitudinem hand alijs contemplationibus lenivisse, ejus in Octaviâ verba indicant. Ità enim de se ipse loquens introducitur:

Melius latebam procul ab invidiæ malis  
Remotus, inter Corsici rupes maris,  
Ubi liber animus & sui juris, mihi  
Semper vacabat studia recolenti mea.  
O quàm juvabat (quo nihil majus parens  
Natura genuit, operis immensi artifex)  
Cælum intueri, Solis & cursus sacros  
Mundique motus.

Quæ



## D E D I C A T O R I A.

*Quæ vel obiter interserenda putavi, quo in ipso quasi aditu præclara hujus doctrinæ commonefacti adolescentes intelligant quid hic statuendum habeant, quum de eâ totoque hoc artium choro ab omni ævo semperque tam honorifice senserint viri sine exemplo maximi. Cum autem in omnibus disciplinis prosit initio brevia quadam elementa ad animos veluti studiosorum preparandos in promptu haberi, huic præcipue rei istud, quod nunc exhibemus, & factum & accommodatum judicamus; utpote non tantum Cælestis sed & Terrestris Globi, hoc est, & Astronomiæ & Geographiæ conjunctam quandam usuique & Globis ipsis rei que nauticæ ac navigationibus aptam Isagogen succinctè complectens: Tantum quod desiderari apodixes nonnullas ac demonstrationes aliaque animadverterem: quæ posteriorum (quos dixi quoque in hunc finem diligenter adhibui) cogitatis ac curis expolienda, nec non & nostris, quæ usu assiduo publicisque prælectionibus observata habuimus, adinventis, quantum id rei institutum pateretur, & exornanda perficiendaque assumimus. Tibi verò, vir amplissime, ut hæc dicamus, licet occasio, ut modò dictum, huc duxerit, non tamen aut casus aut fortuna, sed virtus tua & in omni disciplinarum genere eximia doctrina præcipuum & incentivum & causa fuerunt. Nam si Dîs immortalibus delubra ac manibus facta templa consecravit antiquitas, quibus nos justius aut convenientius hæc mentis atque ingenij opera, quàm qui eadem intelligunt ac possident bona, deferre debeamus? Nihil nunc dicam de amicitia nostra, quæ multis jam annis inter nos vetus & constans suo quodammodo jure hoc ipsum quoque flagitare videbatur. Habe igitur hoc quidquid est tibi consecratum tuisque virtutibus ac meritis multiplicibus si non par, saltem nostræ in te observantiæ atque adfectus devotum sanctumque apud posteros mansurum monumen. Dabam Hardervici Gelrorum ipsis Calendis Augusti.*

*c1616. c. xvii.*

AD



# AD LECTOREM.

**I**LLUD in vestibulo, benigne Lector, monendum te putavi, verba & textum *Roberti Huesij*, qualis antehac editus fuit, majusculo charactere, nostra verò, quæ passim interspersa sunt additamenta, typo minore expressa esse. De polis quoque & Sphæra recta, quod ex Lerio ad pag. 23 indicavimus, in sphæra nimirum ejusmodi, utrumque polum, Arcticum & Antarcticum, ut voluit hactenus cōmunis opinio, haud videri, id etiam ex eodem Lerio observatum CL. V. Abrahamo Schulteto. Qui Sphæricorum libro primo cap. 7 pag. 22 hæc insuper addit: *Quod uterque polus in sphæra recta non cernitur: quod Zonæ terrestres respondent celestibus: quod Finiens mutetur mutato loco: quod sensibilis Finiens ab intelligibili differt, id omne ideo fit, quod terra ad nos collata maxima est. Itaque ratione nostri occidunt & oriuntur sidera: ratione nostri differunt sensibilis & rationalis Finiens: ratione nostri mutatur idem finiens, cum revera terra nil nisi punctum referat cum cœli sphæris superioribus præsertim comparata. dico cum superioribus, quia ad Lunam aliqua terræ proportio, sed non æquè ad stellas superiores. Postremo ad pag. 63 versu 25 quod annotatur de Sinensibus & Cathaia, hoc totum ad paginam 66 referendum: ubi de Asia sigillatim agitur, & Cathaie regionem distinctam & semotam à Sinensibus cum Tartaris & Moscovitis Asiæ borealiora occupare obiter monstratur. Atque hæc præcipue erant, quæ studiosorum animos ne fortasse remorarentur, præmonenda censi. Tu Lector vale & frue.*



I N D E X  
P R A E C I P V O R V M  
H V I V S T R A C T A T V S  
C A P I T V M.

**P**RÆFATIO, ubi antiquitas & præstantia Globorum præ cæteris instrumentis indicatur, eorum forma præstantissima ad cœli & terræ imaginem exprimendam. Rotunditas terræ contra Patricij deliramenta astruitur. Montium celsitudo quantum detrahat rotunditati terræ.

P A R S P R I M A.

C A P. I.

Quid Globus, quæ ejus partes, & de circulis extra Globum, quid horizon, quæ in materiali Globorum horizonte describantur, quid meridianus, quid poli & axis, quid Cyclus & Index horarius.

C A P. II

De circulis qui in Globorum superficie declineantur, quid æquator siue æquinoctialis, quid dies, tum naturalis tum artificialis: item horæ æquales & inæquales. Quid Zodiacus et ecliptica. Quid annus, ejus spatium indeterminatum, multorum de eo sententiæ, multorum item errores. Quid æquinoctium & solstitium, eorum sedes mutatæ, & anticipatio in Calendario multis observatis confirmata. Sosigenis & Iulij Cæsaris error in æquinoctio designando. Coluri quid. Stellarum fixarum longitudes & declinationes mutatæ observatis probantur. Ptolemæi locus 7. cap. l. 1. Geograph. ab injurijs interpretum vindicatus & Strabonis autoritate confirmatus. Quid Tropici, eorum declinationis mutatæ narratio. Quid circulus Arcticus & Antarcticus. Quid verticales circuli, & quadrans altitudinis.

C A P. III.

De Sphæra parallelâ, rectâ, obliquâ, & earum affectionibus.

B

C A P.



I N D E X.

C A P. III.

*De Zonis & earum numero. Antiquiorum de Zonarum qualitate deliria antiquis testimonijs & recenti experientia reiecta.*

C A P. V.

*De Amphiscijs, Periscijs, & Heteroscijs.*

C A P. VI.

*De Periæcis, Antæcis, Antipodibus, & eorum comparatione.*

C A P. VII.

*De Climatibus & Parallelis.*

S E C V N D A P A R S.

C A P. I.

*De ijs quæ propria sunt cœlesti Globo, utpote de stellis : ac primò de planetis sive errantibus.*

C A P. II.

*De stellis fixis & earum efformationibus.*

C A P. III.

*Hemisphærij Borealis constellationes.*

C A P. IV.

*Zodiaci signa, ac primum Borealia.*

C A P. V.

*Hemisphærij Austrini effigies, ac primò in Zodiaco.*

C A P. VI.

*Hemisphærij Australis constellationes extra Zodiacum.*

C A P. VII.

*De stellis in Globo non expressis. Cur stelle interdum plures, alias pauciores, quandoque maiores, sæpius minores conspiciantur, ineptæ quorundam rationes refutantur. Americi Vespucci: Cardani & Patricij deliramenta*



## I N D E X.

*deliramenta, de inusitata magnitudine stellarum Austrini orbis, nostrâ experientiâ rejecta.*

### P A R S T E R T I A.

#### C A P. I.

*De Geographica descriptione Globi terrestris, & partibus terræ cognitæ. Ptolemæi errores de Australi Africæ & Asiæ, itémque Boreali Europæ termino, ex Antiquorum scriptis, & recentiorum varia experientia damnantur.*

#### C A P. II.

*De ambitu terræ & mensurâ unius gradus variæ opiniones Græcorum, Eratosthenis, Hipparchi, Posidonij, Cleomedis, & Ptolemæi: diversæ Arabum; item Italorum, Germanorum, Anglorum & Hispanorum. Posidonius & Eratosthenes ex suis ipsorum observatis & assumptis rejiciuntur. Ptolemæi sententia cæteris prælatâ, à Maurolyci calumnijs liberatur. Maurolycus taxatur, quòd perperam favens Posidonio, iniquè damnavit Ptolemæum.*

### P A R S Q V A R T A.

#### C A P. I.

*De invenienda longitudine, latitudine, distantia, & positionis angulo, vel situ locorum in terrestri Globo expressorum.*

#### C A P. II.

*De latitudine locorum.*

#### C A P. III.

*De distantia duorum locorum & angulo positionis vel situ inveniendi.*

#### C A P. IV.

*De altitudine Solis aut Stellarum.*



# I N D E X.

## C A P. V.

*De inveniendi Solis loco ejusque declinatione ad diem datum.*

## C A P. VI.

*De inveniendi loci latitudine ex observata Meridiana altitudine Solis aut stellarum.*

## C A P. VII.

*De Ascensione recta & obliqua Solis & stellarum inveniendi, ad datam quamlibet loci latitudinem & tempus.*

## C A P. VIII.

*Quomodo inveniatur ad datum tempus & locum differentia horizontalis inter Meridianum, & circulum verticalem Solis aut Stellæ alicujus, quam vocant Azimuth.*

## C A P. IX.

*De inveniendi hora, itemque amplitudine ortus & occasus Solis & stellarum ad datum tempus & latitudinem alicujus loci.*

## C A P. X.

*De triplici ortu & occasu stellarum.*

## C A P. XI.

*De inveniendi crepusculorum initio et fine ad datum quodvis tempus & latitudinem loci.*

## C A P. XII.

*Quomodo ad datum aliquod tempus & locum inveniatur quantitas diei artificialis aut noctis, vel quantitas paralleli Solaris, quæ supra horizontem manet, quæque infra latet. idem etiam de stella aliqua invenire.*

## C A P. XIII.

*De inveniendi hora diei & noctis tam æquali quàm inæquali ad datum quodvis tempus et latitudinem loci.*

C A P.



## I N D E X.

### C A P. XIV.

*De invenienda longitudine, latitudine et declinatione stellarum fixarum, ut in globo exprimuntur.*

### C A P. XV.

*De invenienda deflexione acus magneticæ à veri meridiani situ, quam vulgo vocant nostrates compassi variationem, ad datam quamvis latitudinem, ubi multorum errores deteguntur, qui assignarunt acui magneticæ certum aliquem meridianum, et fixum aliquod punctum quod respiciat et intueatur : et qui æquabilem faciunt ac regularem hujus deflexionis mutationem, horum autem vanæ conjecturæ, & malè assumptæ hypotheses, ex certioribus tum nostris tum aliorum observatis refelluntur.*

### C A P. XVI.

*Quomodo per Globum construatur horologium sciotericum, ad datam quamlibet loci latitudinem.*

## P A R S V L T I M A.

*De Rumbis in terrestri Globo delineatis, ubi eorum natura, origo et usus in navigandi ratione tractatur.*

### I. H O N D I V S.

*Postremo adjunxit auctor tabulam geographicam, quam nos (quod veritati minus consentanea videbatur) omisimus, quamvis globos de quibus loquitur, ipse auctori geographice cæla verim.*



## P R Æ F A T I O.

**D**uo sunt instrumentorum genera, quibus totam cœli terræ-  
que faciem mira & multiplici varietate distinctam, quadam  
quasi Synopsi exprimi & sensibus objici commodissimè pos-  
se, censuerunt artifices. Alterum quod in solido rotundo ideam hâc  
proponat, Globus vel Sphæra vocatur: Alterum quod in Plano, ex-  
primat, Planisphærium vocarunt. Vtrunque ab antiquis admodum  
temporibus excogitatū, ad nostra usque secula continuâ quasi tra-  
ditione deductum, suas semper per successionem temporis cepit ac-  
cessiones. Sphæram sive Globum ejusque usum Atlantem Libycum  
primò invenisse refert Diodorus Siculus: unde orta fabula, cœlum  
humeris suis sustinuisse. Alij hoc inventum Thaleti tribuunt. Exco-  
luerunt autem postea Crates, cujus meminit Strabo, Archimedes,  
Proclus; maximè omnium Ptolemæus: ad cuius præcipuè mentem  
& præcepta, sphæras solidas à posteris fabricari solitas Leōtius tra-  
dit Mechanicus. Recentioribus seculis plurimum excultum est hoc  
instrumentum à Gemma Frisio & Gerar. Mercatore, quorum indu-  
striæ & diligentia magna est accessio in his Globis, qui Londini e-  
diti sunt Anno 1593, ut vix quicquam ulterius addi posse videatur.  
Planisphærium quidem præclarum inventum mirum habet artifici-  
um, si ex Geometricis & Opticis fontibus deducta sit fabricatio:  
miram etiam cōcinnitatem, suam item jucunditatem habet. Sed al-  
terum illud natura prius & antiquius, forma convenientius, intelle-  
ctui & cogitationi magis accommodum: ut mittam venustatem &  
delectationem: proprijs enim & genuinis formis res ipsas exprimit.  
Nam cœli formam, quin esset rotunda, vix quisquam vocavit in du-  
bium. De forma etiam terræ utcunque multæ apud veteres Physsi-  
cos divulgatæ sint opiniones: alijs planam, alijs cavam, nonnullis  
cubicam, cæteris pyramidalem contendentibus: hæc tamen sola,  
explosis reliquis, summa cum ratione obtinuit, ut rotunda censere-  
tur. Rotundam autem dicimus, ut habeat suas inæqualitates, in tan-  
ta eminentia montium & depressione vallium. Terram esse formâ  
Globi, non ut tórno facti, sed qui habeat quasdam inæqualitates,  
dixit Eratosthenes. Strabo. l. 1. Absoluti orbis figura terræ non inest  
in tanta montium celsitate & camporum planitie: recte Plinius l. 2.  
c. 21. Terram cum aqua Globum constituere, non ut cœlum, sed non  
multum ab ea forma aberrantem, voluit Strabo l. 1. Astruitur etiam  
rationibus



## P R Æ F A T I O.

rationibus terræ cum interjecto mari rotunditas. Orientem & Occidentem versus Globosam esse probant Sol, Luna & stellæ, prius Orientalibus posterius Occidentalibus orientes & occidentes. Persæ ad ortum habitantes, prius horis quatuor Solis radios excipiunt quam Iberi ad occasum habitantes. Cleomedes l. i. Eclipses (præcipuè Lunares) evincunt, quæ eodem tempore factæ, iisdem horis, eodem diei tempore non sunt observatæ, sed posterior est hora observationis Orientalibus quam Occidentalibus. Eclipsim quæ hora quinta in Arbelis accidit, Carthagini hora secunda conspectam refert Ptol. l. i. Geog. c. 4. Defectum Solis, quem Campania inter septimam & octavam diei horam vidit; Corbulo dux in Armenia inter decimam & undecimam visum prodidit Pli. l. 2. c. 70. In Austrum & Boream quâ vergit, rotunditatem eius demonstrant occultationes, emerfiones, elationes, & depressiones stellarum & polorum. Lucidum illud sidus, quod in summo Argûs gubernaculo conspicuè fulget (Canobus Græcis nominatur) in Rhodo ægrè conspicitur, aut certè ab editis locis, in Alexandria, quarta circiter signi portione supra horizontem extante, conspicuè admodum cernitur, inquit Proclus in fine libelli de Sphæra. Lego enim, conspicuè cernitur, non ut vulgò, prorsus non cernitur, utcunque reclamante Græco codice & invito Latino interprete. In Eclipsibus Lunaribus (quæ fiunt adventu Lunæ in umbram terræ) ejusdem umbræ extremitates rotundas videmus: quod ab alio quàm rotundo & Globoso corpore fieri non posse probant Optici. Unica hæc ratio major est omni exceptione, quòd ex alto mari terram petentibus, primò se præbent conspicienda montium cacumina, radices non nisi cum propius accesseris, propter intervenientem terræ gibbositatem. Cava, cubica, pyramidalis & plana forma propter quas causas rejecta sit; Ptolemæi interpres, Theon, Cleomedes, vulgati prope ad unum Sphæræ autores, prolixè declarant. Planam terræ figuram, tanquam cramben recoctam, ad usque nauseam appositam novo quodam apparatu denuò obtrudit Franc. Patricius frigidis quibusdam rationibus & male intellectis experimentis planitiem comprobans, rotunditatem destruens. Præcipua ejus argumenta obiter attingam, neque enim in eorum refutatione prolixius insistere nostrum patitur institutum. Adversus terræ rotunditatem facere videntur montium eminentiæ, vallium profunditates, ab æquali camporum planitie.



nitie. Quis ferat, inquit Patricius, altissimos Norwegiæ montes, Montem sub polo Slotum mundanorum omnium eminentissimum, ejusdem esse superficiei cum subiecto mari? Præcipua hæc cum sit ratio, qua terræ cum interjecto mari rotunditas corruiere videatur, minutius paulo discutiamus: quantaque sit hæc eminentia, ut de æqualitate hujus Globi detrahere videatur, perpendamus. Multa quidem de altitudine Athonis montis Macedoniæ, Casij Syriæ, itemque alterius ejus nominis Arabiæ, & de monte Caucaſo, admiranda & ad fabulam proximè accedentia, ab Aristotele, Mela, Plinio, & Solino commemorantur. Inter miracula notarunt, quòd Athos mons, è Macedonia, in forum Myrrhinæ, in Lemno insula oppidi, umbram projiciat, cum Athos à Lemne 86 miliaribus distet. Sed cum Athos mons ad Occidentem Lemno sit, ut tabulæ indicant Ptolemaicæ, non adeò miramur, ad tantam distantiam umbram jaculari; quoniam oriente ut etiam occidente Sole umbras longissime projici, quotidiana testetur experientia. Hoc fabulis magis annumerarim, quod Plinius & Solinus de eodem monte referunt, adeo elatum esse, ut credatur altius, quàm unde imbres cadunt, surgere. Cepit autem (inquiunt) opinio fidem, quia de aris, quas in vertice sustinet, non abluitur cinis, sed quo relinquitur aggere manet. Accedunt huc eclogæ è fine VII. lib. Strab. quæ tradunt, ejusdem montis verticem incolentes videre Solem orientem tribus horis ante eos qui mare accolunt. Aristoteles Caucaſi montis celsitatem celebrat, quòd ipsius summitas ad tertiam noctis partem cum mane tum vesperi radijs Solaribus illustretur. Plinius & Solinus æquè fabulose de Casio Syriæ monte referunt, summo vertice à quarta vigilia ortum Solis ostendere, quod de Casio etiam Arabiæ Mela videtur tradere. Hæc autem omnia fabulis annumeranda, Petrus Nonius ex ipsis fontibus Geometricis acutè comprobavit. Ridiculum est quod Eustathius tradit, Calpen & Abennam (Columnas Herculis dictas) propter celsitatem miraculose celebrari à Dionysio Periegete: neque tamen assurgere ultra 100 ulnas, hoc est unum stadium. Ad tantam altitudinem assurgunt Pyramides Ægyptiorum teste Strabone: ad majorē arbores Indicæ; si qua fide eorū digna est relatio, qui apud eundem Strabonem referunt, ad flumen Hyarotidem arborē fecisse umbram Meridianam stadiorum quinque. Antiquorum fabulis accedit recētioris seculi vanitas. Tenariffem unam è Canarijs



ad xv Leucarum celsitudinē assurgere; quod efficiat milliaria plusquam 60, ex quorundam narrationibus refert Scaliger. Patricius his non acquiescens, ad 70. milliaria, effert. Celebrantur & aliorum montium eminentiæ, utpote Andium Peruvix & insulæ Pico Acorensium, at non æque ac Tenariffis. Quam fidem mereantur hæ relationes, disquiramus. Tenariffim quidē adeo exsurgere multorū testantur narrationes, ut probabile sit orbē terrarum editiorē non videre (ne excepto quidē monte Sloto, quem quisnam viderit mortalium ignoramus, præterquam quòd de mago quodam Necromantico eò delato fabulantur.) Eā tamen altitudinem attingere non posse quam refert Scaliger, maximam fidem facit, quod perpetuas fere nives iugo sustineat, vix enim uno, saltem altero æstatis mense, nivibus immunem tradunt Hispanorum scripta. Nives autem generari 70 aut etiam 60 milliariibus supra aquæ aut terræ planitiem, nunquam persuadebunt, cū summi vapores, ex assumpta etiam Eratosthenis mensura, terrestris ambitus 48 milliaria non attingant; ex Ptolemæica autem mensura, vix 41 milliaria adæquent. Cardanus quidem & alij quidam ex professo Mathematici, ad 288 usque milliaria vapores attollunt: at non mediocri labe sui nominis, has nugas scriptis mandarunt. Atlantis montis cacumina ad usque lunaris circuli viciniam assurgere refert Solinus: at suum ipse prodit errorem, quòd ejus verticem nivibus opertum & nocturnis ignibus lucentem fateatur. Non dissimilia sunt, quæ de ejus altitudine Herodotus, Dionysius Apher, ejusque Scholiastes Eustathius tradunt: unde & cœlorum columnen vocarunt. Sed vanis ac prodigiosis his relationibus omissis, accedamus ad ea, quæ majus fidei argumentum præ se ferunt. Eratosthenes instrumentis dioptricis, ex dimensis intervallis, deprehendit, perpendiculum ductum à summi montis cacumine ad imas valles non esse majus stadijs x. Cleomedes refert non inveniri montem editiorem stadijs xv, atque tantæ altitudinis præruptam & excelsam in Bactriana rupem fuisse, quæ Sisimitræ Petra dicta fuit, lib. xi suæ Geographiæ memorat Strabo. Thessalicorum montium cacumina arrectiora esse, quam usquam proceritas montana attolli valeat, tradit Solinus. At si Plinio credimus, Dicæarchus regum curâ montes permensus, deprehendit Pelion cæteris excelsiorem non exsurgere ultra passus 1250, hoc est stadia 10. At ulterius progrediemur, ne restrictiores in his videamur esse, aut arctioribus quam par



P R Æ F A T I O.

est limitibus definire. Addemus summitati montium maris profunditatem. De ea sic scribit illustrissimus Iul. Scaliger exercit. 38 contra Cardanum. *Aquæ profunditas non multa, nempe raro passus excedit 80; plurimis in locis non accedit ad vicanos, haud paucis senos explet, paucissimis ad centenos accedit, paucioribus hunc superat numerum.* At quia hæc à vero deficere plurimum, quotidiana navigatium testatur experientia, depressionem hanc fundi maris faciamus æqualem montium elationi, ut ad 10 stadia subsideat, quantam esse Sardoï maris maximam profunditatem, apud Strabonem perhibet Posidonius, vel si placet, ad 15 etiam stadia deprimatur, sic enim volunt Cleomedes, & Fabianus apud Plin. lib. 2 cap. 102. Georgius Valla mala fide Cleomedem transfert, cum 30 stadiorum mensuram profunditati Maris attribuit.) His ita assumptis fundamentis, quæ sit ratio eminentiæ montium ad totius terræ diametrum, ut inde colligamus, montium elationes vix quicquam à rotunditate detrahere, sed erit hæc excrescentia quasi festucæ aut pulvisculi in pila, ut Cleomedes affirmat. Si enim accipiamus ambitum terræ esse stadiorum 180000, ut Ptolemæo placet (neque minorem mēsuram quisquam antiquorum posuit; ut Strabo testatur) erit ejus dimetiens (ex Archimedeâ ratione diametri ad peripheriam) stadiorum amplius 57272. Si igitur montes exsurgant ad usque stadia x (quod placuit Eratostheni & Dicæarcho) erit ratio editioris montis ad diametrum terræ quæ est unius ad 5727 (Lapsus est Peucerus, cum dixit, dimetientis terræ ad perpendiculum x stadiorum esse rationem 18000 ad unum, hæc ratio est ad totam circumferentiam non ad diametrum.) Si ad xv stadia altitudo montium excurrat (ut voluit Cleomedes) erit ea ratio quæ est unius ad 3818. Sed ad 30 etiam, si placeat, stadia montes emineant, ad quantam altitudinem petram in Sogdiana assurgere refert Strabo lib. xi (atqui majorem non esse mensuram summi montis, adjecta etiam inaris profunditate ad perpendiculum, Cleomedi videtur) ratio ea nō erit major quā sit unius ad 1908. Assurgat etiam, si libet, ad quatuor milliaria, sive stadia xxxii (quantum Cassium Syriæ in directum surgere, autor est Plinius) erit ea ratio aliquanto minor, quam sit unius ad 1789. Tantum igitur abest ut credam Patricio de altitudine Tenariff. lxxii Miliariorum (nisi multis ambagibus & obliquis itineribus metiatur: quomodo Plinius Alpiū cacumina ad 50 milliaria effert, ut nō assentiar Alhazeno Arabi



rabi (qui ad VIIII milliaria Arabica vel stadia LXXX, ut ego arbitror, extulit montium cacumina) neque Plinio lib. 4 cap. 11 de montis Hæmi excelsitate VI milliariorum: vix eidem Plinio de altitudine IV milliariorum. Vtcrius assurgere dicenti Mercurio haud facile crederem. Hactenus de montium celsitate, quæ hujus Globi terrestris rotunditatem impedire videbatur.

Adjungit Patricius, aquas etiam in sphæræ modum non rotundari. Argumentum sumit ab aquarum libratoribus, qui adhibitis instrumentis dioptricis aquas esse æqua & plana superficie (nisi quatenus ventis agitantur) deprehendere. Eratosthenes contra apud Strabonem affirmat, superficiem maris alibi eminere, aliàs subsidere. Inscitiæ suæ testes vocat item architectos sive aquarum libratores, qui Demetrio Isthmum Peloponnesiacum effossuro, renuntiarent; comperisse se dimensionibus, mare quod est in sinu Corinthiaco, elatius esse eo quod ad Cenchræas. Sesostrim Ægypti regem Isthmum Arabicum discissurum destitisse ferunt, quòd superficiem aquæ in Arabico sinu sublimiorem judicaret, quàm quæ in mediterraneo mari. Arist. in fine libri 1 Meteororum. Idem postea Dario contigisse, eodem loco testis est idem Aristoteles. Ecquid Sesostris, Darij & Demetrii Architecti majori fide digni sint, quam quos Patricius nominat, non laboro. Strabo Eratosthenem insectatur, quòd eminentias & depressiones superficie maris attribuit. Archimedes docet omnis humidi, quod consistit & permanet, superficiem esse Sphæricam, & habere cum terra commune centrum; ut utrosque merito rejiciamus, tum qui rectam maris superficiem volunt, tum qui eminentiam & subsidentiam tribuunt. Hoc unum fateamur ratio cogit, exiguam hujus Globi portionem, quantam capiat oculorum acies, à recta superficie quibuscvis instrumentis non posse discerni: ut inde penitus corruat argumentum illud, quod à libratorum fide & experientia deducit Patricius.

Elevationes & depressiones, occultationes item & emersiones polorum & stellarum, quemadmodum quotidiana navigantium experientia testatur, fieri posse, ut cunque plana sit aqua contendit Patricius. Si enim stella aliqua, alicujus loci vertici immineat; hac aut illac ab eo loco si discesseris, deprimi videbitur, in plano etiam facto itinere. At aliud est quod non advertit Patricius. Aequali cursu confecto versus Austrum aut Boream, stella semper æqualiter



elevatur aut deprimitur, quod fieri posse in recta superficie nunquā docebit. Si sumamus stellam aliquam propè Æquatorem positam, ea in cursu 60 miliariorum nostratium, proximè per unum gradum ab Horizonte attollitur, sive ea stella vertici immineat, sive inde discesseris ut à vertice deprimatur per triginta, quinquaginta gradus, aut alio quovis numero: quod in plano fieri non posse, Geometrica demonstrant fundamenta. Unum hoc Patricio (in Hispanorum navigationibus bene versato, quod testantur eius scripta) fidem facere poterat, maris superficiem non esse rectam: quòd Victoria navis ea, qua Ferdinādu Magellanus ex Hispania solvi, tinstituto cursu inter Austrum & Occidentem ad Fretum illud quod ab eo nomen accepit, redijt in Hispaniam, prævecta Promontorium Bonæ spei, toto terrarum ambitu enavigato. Mitto illustrissimorum nostratium navigationes D. Fran. Drake, & Thomæ Candish exteris fortassis non adeo notas, quæ id ipsum quod dicimus evincunt. Obiter attigimus quæ summa habet suæ causæ fundamenta Patricius. Experimenta, quæ male intellecta ad causam suam firmandam adducit, omitto, cum ejus opinionem destruant potius quam astruant.

Astruēta ad hunc modum rotunditate terræ, cum altissimorum montium eminentiæ vix habeant eam rationem ad semidimetientem terræ, quam unum ad mille (quæ quàm sit exigua, facile quivis agnoscet) Globosam formam ad exprimendam cœli terræque imaginem, naturæ convenientiorem, intellectui faciliorem, ipsaque venustate jucundiorē otiosum arbitramur ut probare contendamus.

In Globis autem materialibus, præter aptam & convenientem locorum delineationem, quod præcipuum est, duo maximè desiderantur, magnitudo sive capacitas, ut particulares quàm fieri potest locorum descriptiones complectantur. Secundum est levitas, ne pondere & gravitate offendant. Strabo lib. II. Globum voluit diametri x pedum, ut capiat mediocrem rerum particularium descriptionem. Immanior plane est hæc moles quàm quæ commode tractari possit. Atqui hac parte, existimo hos Globos, de quibus tractare instituimus, cæteris omnibus, qui hætenus editi sunt, jure præferēdos, quod & capaciores reliquis, sunt enim diametri pedum duorum & partis sextæ. Ii autem quos Mercator edidit (quibus maiores nemo ad hæc usque tempora, quod sciam, edidit) pedem unum & partem tertiam vix attingunt diametri. Erit itaque superficiei horum Globorum ad  
eos



eos quos Mercator edidit, ea ratio quæ est unius ad duo cum tribus octavis, aliquanto etiam major. Quælibet igitur regio his Globis erit major quam in illis duplo amplius, unde quælibet loca facilius multo in his delineari possunt quam in illis. Sed hæc intelligenda volumus de ijs, qui majori forma editi sunt à Gulielmo Sanderfono cive Londinensi (de quorum præcipuè usu conscripsimus hunc tractatum.) Nam & minores etiam edidit, ut mole & magnitudine minores, sic etiam pretio viliori, ut tenuiorum studijs consultum esse videatur. Ad ipsam quod spectat Geographiam, cum ex recentioribus chartis & descriptionibus sit desumpta, cæterorum descriptionibus multo perfectiorem arbitramur: utcunque suis fortassis non vacat erroribus. Hoc autem in his Globis edendis præstitum esse, eorum artifex mea opinione gloriari poterit.

Unum hoc monemus, particularium locorum descriptiones aliunde petendas esse, neque enim in Globis hoc expectandum est. In particularibus autem locorum descriptionibus, Gerardus Mercator Tabulis Geographicis cæterorum industriam & diligentiam superasse videtur. Hinc itaque commodissimè peti posse ducimus.

Loquitur Strabo loco & libro jam indicato de globo terrestri: non quem talem aut tali magnitudine ac mole ipse confecerit, sed quæ ejusmodi confici suadeat, ut omnia suis numeris constent: Nostro autem seculo magnificus & illustris vir Tycho Brahe, quem hodie ut Atlantem cæli omnes non immeritò celebrant, cælestem ex lignea interius materiâ constantem atque in exactam Globi formam levigatum laminisque ex orichalco artificiose superinductum fieri curavit, pedes in diametro sex continentem, præter Meridianum & horizontem ceteraque quæ æstimari inde possint. Cujusmodi Globi machinam, adeo solidè & subtiliter elaboratam & undiquaque sibi rite correspondentem, a nemine antea constructam uspiam aut absolutam esse arbitror. Opus ingens & magnificentum: cujusque videndi ergo multi è varijs regionibus in Daniam venêre, dum ibi adhuc ageret. Tycho postmodum, concedente ipso ad Cæsaream majestatem, & Globus ille una cum alijs aliquot Mathematicis instrumentis, ab Imperatore, post ipsius Tychonis obitum, multis thalerorum millibus redemptus Pragæ nunc in viridario sive arce Cæsareâ inter alia miranda servatur. Circa horizontem hæc verba aureis characteribus leguntur:

ANNO A CHRISTO NATO CIO. IO. XXXIV, REGNANTE IN DANIA FRIDERICO SECUNDO HUNC COELESTI MACHINE CONFORMEM GLOBVM, IN QVO AFFIXA OCTAVÆ SPHÆRÆ SIDERA COELITVS ORGANIS DEPREHENSASVIS QVÆQVE LOCIS ADAMVSSIM REPRÆSENTARE, ERRANTIVMQVE STELLARVM PER HÆC APPARENTIAS PERVESTIGARE DECRE-



# P R Æ F A T I O.

VIT: COELO TERRIGENIS, QUI RATIONE MEAM CAPIUNT,  
MECHANICO OPERE PATEFACTO, TYCHO BRAHE O.F. SIBI  
ET POSTERIS F.F.

Qui Globus præ ceteris ob insignem suam magnitudinem hoc prærogativæ habet, quod omnia in eo exactissime adeoque in ipso minuto exsequi liceat. Præsertim quæ primi mobilis doctrinam spectant, corporumque cælestium observationes, aspectu Eclipticæ & æquatoris, absque laboriosa supputatione in eo mechanicè possunt perfici.

Habet & magnus Hetruriæ Dux haud minori magnitudine duos insignes globos, sed communi fabrica, alterum terrestrem: cælestem alterum, qui est armillaris, circulis tantum & orbibus suis constans.

Quos deinde Mercatoris memorat globos author, eos postea I. Hondius ad Tychonis observata accurate emendatos cum magnâ tum minori formâ evulgavit, hodieque adhuc filius & hæredes eleganter ac graphice delineatos evulgant.

Porro quia sæpenumero in hoc de Globis tractatu *Puncti, lineæ, superficiei, Anguli, rhombi, axis*, similibusque Geometricis atque artis vocabulis opus erit, quæ & qualia ea sint obiter præmittendum.

*Punctum* est, cujus pars nulla est: sive quid indivisibile, hoc est, quod in partes deduci aut dividi non potest.

*Linea*, est longitudo sine latitudine. Cujus quidem extremitates sunt duo puncta.

*Linea recta*, est ab uno puncto ad aliud brevissima extensio.

*Linea parallela*, sunt lineæ equidistantes: quæ quantumvis protrahantur, nunquam concurrunt, equaliter semper à seipsis remote.

*Linea perpendicularis*, est recta linea rectè insistentis duosque circum se angulos rectos faciens.

*Superficies* est longitudo latitudinem tantum habens, cujus extrema & termini sunt lineæ.

*Figura* est, quæ termino vel terminis clauditur: termino comprehenditur *circulus*: sub terminis reliquæ omnes figuræ, triangulus, quadrangulus &c.

*Terminus*, est quod uniuscuiusque finis est.

*Circulus* est figura plana, quæ una circumducta linea continetur, in cujus medio punctus est, à quo ad circumferentiam omnes productæ lineæ sibi sunt æquales.

*Circuli centrum* est punctus ille medius, à quo lineæ æquales ad circumferentiam ducuntur.

*Circuli diameter*, est recta linea per circuli centrum transiens & ex utraque parte in Circuli peripheria seu circumferentiâ terminata, circulum in duas æquales partes dividens.

*Semicirculus* est dimidia circuli pars, quæ sub diametro circuli & dimidia circumferentiæ parte continetur.

*Arcus*, est quævis circuli figuræ pars, quæ sub recta linea & circumferentiæ parte semicirculo majore aut minore continetur.


*Angulus*



# P R Æ F A T I O.


*Angulus* est duarum linearum contactus, quarum expansio est super superficiem planam applicatioque non directa.

*Angulus rectus* est, qui ex recta linea, super rectam lineam cadente, & utrimque duos æquales angulos faciente, <sup>a</sup> producitur : quæ & <sup>b</sup> perpendicularis linea dici potest, de quâ ante.



*Angulus obtusus* dicitur, qui recto angulo major <sup>c</sup> est.

*Angulus acutus*, est qui recto <sup>d</sup> minor est.



*Angulus solidus* est, qui sub pluribus quam duobus planis angulis, in eodem plano non existentibus, ad unum signum sive punctum concurrentibus & constitutis, continetur, ut sunt anguli in *cubo* sive *tessera*.

*Rhombus* est, qui æquilaterus quidem, sed rectangulus non est.

*Rhomboides*, qui neque latera neque angulos æquales habet, latera tamen opposita, & angulos oppositos æquales habet.

*Solidum* sive *corpus* dicitur, quod longitudinem, latitudinem, sive crassitiem habet, ut *tessera* sive *cubus*: Solidi verò termini sive extrema sunt superficies.

*Axis* diameter est ille, circa quem sphaera volvitur & circumducitur.

*Poli Sphaerae* sunt extrema puncta axem in superficie terminantia, poli cardines & vertices vocantur.

*Sphaera*, definiente Euclide, est, quando semicirculi manente diametro, circumductus semicirculus in seipsum rursus revolvitur unde incepit coassumpta figura.

## PRIMA











PRIMA PARS  
DE IIS QVAE  
COMMUNIA SUNT  
UTRISQUE GLOBIS.

CAPUT I.

QVID GLOBVS, QVAE EIVS PAR-  
TES, ET DE CIRCV-  
LIS EXTRA GLOBVM.




LOBVS, quod ad nostrum spe-  
ctat institutum, vocamus analogicas coeli  
terræque imagines. Analogicas autem di-  
cimus, non solum propter formam, quia  
Rotundi; ut sunt coelum & terra cum in-  
terfluo mari : sed præcipue quia coeli fi-  
dera suis imaginibus & Asterismis (Con-  
stellationes vocant) expressa, terræque tra-  
ctus & regiones, singula suâ proportionem,  
magnitudine, & distantia expressa, nobis

exhibent : delineatis etiam ad eorum usum *circulis* tum *majoribus*  
tum *minoribus*, quos in coelo terræque congrue suis observatis con-  
ceperunt artifices. *Circuli* autem *Majores* sunt, qui totam Globi su-  
perficiem in æquales duas portiones dispescunt : *Minores*, qui in  
duas inæquales dirimunt.

*Globus* vulgo etiam *Sphæra* nominatur. Id tamen inter utrumque discriminis  
est, quod *Sphæra* proprie armillaris sit, id est, globus non quidem solidus, sed ar-  
millis, circulis atque orbibus artificialibus constans. Qui *Circuli*, quamvis re, ve-  
ra tales in cælo nulli sint, assumpti tamen ab artificibus in eum finem sunt, ut e-  
orum,





orum beneficio vera caelestium motuum historia cōmodius perciperetur. Quod de circulis, æquatore, Zodiaco, axibus ceterisque dicimus, idem quoque de reliquis orbibus eorumque hypothefibus accipiendum judicamus. Nā quod Rhe-  
ticus



ticus olim & PETRVS RAMVS lib. 2 Schol. Math. veterum Ægyptiorum in astris scrutandis facilitatem objiciant, de eo quid censuerit ipsique Ramo aliquando præsens præsenti responderit nobilissimus Tycho, operæpretium est ex ipsius Epistolarum Astronomicarum lib. 1 pag. 60 cognoscere. ita enim ait: *Quod celeberrimus ille nostri ævi Philosophus Petrus Ramus existimarit, sine Hypothesibus per logicas rationes Astronomiam constitui posse, caret fundamento. Proposuit quidem ille mihi ante annos elapsos 16, cum Augusta Vindelicorum unà essemus, hanc opinionem, & hortator simul erat, ut postquam per hypotheses siderum cursum in exactum ordinem redegissem, idem sine his tentare affectarem. Id enim fieri posse, hac ratione addita, existimabat, quod scilicet legisset, Ægyptios facillimam olim habuisse Astronomiæ cognitionem: Cumque hypothesis ratio difficilis & intricata videatur, oportuisse eos aliâ compendiosiore & planiore via siderum cursus cognovisse, ideoque citra omnes hypotheses. At ego illi resistebam, ostendens sine hypothesis phenomena caelestia non posse in scientiam certam redigi, neque ut intelligantur, excusari. Facilitatem verò illam Ægyptiacam saltem in æquatorijs Planetarum, quibus se à supputatione laboriosa liberarunt, cum ephemeridum expedita ratio nondum in usu foret, extitisse. Verum cum is, vir aliàs perspicaci ingenio præditus & veritatis si quis alius amans, penetralia artis hujus, non penitus perspexisse videretur veritatemque in motu siderum statis anni temporibus nequaquam recurrentem non animadvertisse, quicquam hac in parte obtinere ab ipso nec potui nec volui. Habet is plerosque adhuc affectas, qui idem fieri posse sperant, sed qui rem ipsam neque intelligant, neque unquam in effectum sint deducturi. Cum enim omnia constent numeris, ponderibus & mensura, sine his etiam, quicquam in mundo visibili explicari nequit. Hypotheses autem nihil aliud, quàm mensuram apparentis motus per circulum aliasque figuras ostendunt, quas Arithmetica in numeros resolvit. Sine his si quis Astrorum motus comprehendere velit, fortunam quod dici solet invocet, & supramundanam extra hominum intellectum planeque incorpoream & plusquam Seraphicam rationem imaginetur, necesse est.*

Præter ipsa Globorum corpora, in quibus ea quæ diximus inscripta sunt, quæ Solida sunt rotunda, adhibetur utrique machina cum instrumentis quibusdam necessarijs ad eorum usum; quorum singula ordine explicabimus.

Machinæ fabrica sic habet. Primò basis est ad Globorum sustentationem, cui ad perpendiculum eriguntur sex columellæ, æqualis ad invicem longitudinis, quibus ad libellam insistit cyclus annularis, benè crassus & latus, basi parallelus, quem horizontem vocant, quòd ejus superficies, quæ supera est, veri horizontis officio fungitur. Hæc enim ita est sita, ut Globi superficiem in duas æquas partes dirimat. Quarum altera quæ eminet, conspectam mundi partem nobis indicat: altera quæ deprimitur, inconspexam mundi partem denotat. Is autem circulus, qui conspectam mundi partem ab inconspicua dirimit, *Horizon* vocatur. Atque illud punctum quod in su- Horizon.



pero hemisphærio vertici imminet, æqualiter undiquaque ab horizonte semotum, *Zenith* vulgo vocatur: Arabes *Semith* vocant. Sed corruptum illud nomen obtinuit, ut vulgò reciperetur. Huic è regione in infero hemisphærio quod opponitur, *Nathir* vocant Arabes, vulgò *Nadir*. Hæc duo puncta Poli horizontis dicuntur.

In horizonte Globi materialis hæc adscribuntur ad oram. Primò duodecim Zodiaci signa. Quodlibet ex his in triginta minutiores partes dividitur, ut totus Horizont in 360 partes (quos gradus vocat) dirimatur. Si gradus autem in 60 etiam partes divisus conspiciatur, quælibet earum scrupulum vel minutum dicitur, & ex simili minutorum divisione fiunt secunda, dehinc tertia, itémque quarta & quinta, &c, ex simili semper partitione.

Inter duodecim hæc signa loco medio certi characteres in eodem horizonte annotantur indicantes, hæc signa, quibus adscribuntur, pertinere ad domū planetæ illius characteris.

Quæ his proxima est Sectio indicat cujusque hebdomadæ diem: post eam sequitur numerus dierum cujusque mensis. Præterea Dies suis quique locis has habent sibi additas literas K.N.I. notantes *Kalendas*, *Nonas* & *Idus*: quibus utebantur Romani prisci ad significandum cujusque mensis diem. Non enim illi, ut nos hodie, à 1 ad 30 aut 31, verum juxta *Kalendas*, *Nonas* & *Idus* dies accipiebant. Primus cujusque mensis dies illis erant *Calendæ*, reliqui deinde *Calendarum* dies non antrorsum sed retrogrado ordine numerabantur. Exempli gratia, dies ultimus Decembris, qui est 31, illis erat secundus *Calendarum* Ianuarij 30, tertius *Calend.* *Ianua.* idque eousque continuabant dum perveniretur ad *Idus*, qui 14 erat Decemb. 19 verò *Calend.* *Ianu.* Eadem servabatur in *Nonis* & *Idibus* ratio. Qui vero mensium plures aut pauciores habeat *Kalendas* aut *Nonas* ex ipso, quem diximus, horizonte intelligi potest; hisque insuper versiculis subindicatur:

*Maius sex Nonas, October, Iulius et Mars:*

*Quattuor at reliqui, tenet idus quilibet octo.*

*Inde dies reliquos dic omnes esse Kalendas.*

Glossæ, *Idus*, μεσομήνιον.

Adscribitur item huic horizonti Calendarium Romanum, atque illud triplici forma. Antiqua, quæ etiamnum apud nos in usu. Recenti, à Gregorio XIII Papa instituta, qua æquinoctia & solstitia restituantur ad eas sedes, quas tempore Concilij Niceni tenuerunt. Tertium restituit eadem æquinoctia & solstitia ad sedes, quas obtulerunt tempore nativitatis Christi. Calendarij menses dividuntur in dies



in dies & septimanas, quibus adjiciuntur Characteres earum indices, nempe VII priores literæ Alphabeti Romani. Qui modus designandi mensium dies introductus est post tempora Concilij Nice-  
ni, autore Dionysio exiguo Abbate Romano. Extrema horizontis ora in XXXII partes dividitur pro numero ventorum, quos recentiores Nautæ in navigationibus observant, quibusque cœli plagas & regionum tractus solent designare. Antiquiores enim IV ventos numerabant: sequuti, eis præterea quatuor adjecerunt: deinde numerabant XII: postea introducti sunt XXIV, ut Vitruvius docet. Recentior ætas XXXII numerat, quorum nomina Anglica itémque Latina in horizonte Globorum materialium exprimuntur.

Horizon aut est *rationalis* aut *sensibilis*: *Rationalis* seu *intelligibilis* sphæram in superiorem & inferiorem partes æquales exactè dividit: *Sensibilis* aliàs *apparens* dicitur, quia videtur nobis cælum in duas æquales partes sive Hemisphæria dividere, cum id non exquisitè sed apparenter tantum faciat. Priorem, id est, *rationalem*, nonnulli etiam *artificialem* vocant, quod artis Astronomicæ beneficio sit invétus.

Horizontis usus & Officium multiplex est. 1 dividit cælum in duo Hemisphæria, superius & inferius. 2 ostendit quæ stellæ sint perpetuæ apparitionis, quæ perpetuæ occultationis, quæ denique oriantur & occidunt. 3 ostendit causam æqualitatis & inæqualitatis noctium & dierum artificialium. 4 conducit ad inveniendam latitudinem loci. 5 Est causa habitudinis rectæ & obliquæ sphæræ. de quo postea cap. 3.

Huic horizonti in duplici fissura circulus æneus insistit ad rectos angulos, ita ut hæc illæc per easdem fissuras circumduci queat, ut usus postulat. Hic vocatur *Meridianus*, quia altera ejus superficies, quæ in gradus 360 (ut & horizon) dividitur, veri meridiani vicem sustinet. Est autem meridianus, circulus major transiens per polos mundi itemque horizontis, quem cum Sol attigerit diurna revolutione in supero hemisphærio, medios dies, cum in infero, medias noctes efficit.

Hi duo circuli, Horizon & Meridianus, in cœlo terræque varij sunt & mutabiles pro locorum mutatione. Sed in Globis materialibus facti sunt simplices, constantes & invariabiles: Terra autem facta est volubilis, ut eidem Meridiano omnium locorum vertices applicari possint.

Officium & usus Meridiani, præter cetera, in hoc versatur 1. ut tempus semidiurnum & seminocturnum diei artificialis determinet. unde & ab hoc circulo diei initium ordiuntur Astronomi. 2 Notatur in Meridiano Zenith à quo postea




distantiæ stellarum & circulorum parallelorum colliguntur. 3 Longitudines & latitudines locorum ab eodem petuntur. 4 ostendit Solis & omnium stellarum maximam altitudinem seu elevationem, quæ Meridiana altitudo dicitur. 5 Meridiana Solis altitudo æquinoctialis elevationem Poli & sphaeræ habitudinem demonstrare potest. Nam circuli quadrans cum sit 90 graduum, si ergo meridianam Solis altitudinem in æquinoctio à 90 gradibus subtrahamus, reliqui gradus elevationem poli ostendent: exēpli gratia. Elevatio Solis Meridiana Amstelodami tempore æquinoctij sit graduum 38; ijs deductis à 90 relinquitur elevatio poli 52. Romæ æquinoctialis altitudo Solis est grad. circiter 48 quâ sublatâ de circuli quadrante, 90 nimirum, relinquitur Poli altitudo Romana 42 grad.

*Axis.*

Duobus hujus Meridiani punctis oppositis affixæ sunt extremitates stili per Globi soliditatem ejusque centrum trajecti. Harum extremitatum alteram, polum mundi Boreum sive Arcticum: alteram, Austrinum vel antarcticum: ipsumque stilum, *axem* vocant mundi. *Axis* enim mundi est dimetiens ipsius circa quam voluitur. Axis extremitates poli sunt.

*Circulus horarius.*

Alterutri polorum, cum postularit usus, adjungendus est circulus minutior, & ipse æneus, in xxiv æquas partes, seu bis 12 *interstitia æqualia*, divisus pro numero horarum integræ diei & noctis. Ideoque *circulum* nominant *horarium*. Hunc alterutri polorum ita oportet applicare, ut sectio utriusque horæ duodecimæ, tum mediæ diei tum mediæ noctis, veri meridiani superficiei exactè congruat.



*Index horarius.*


Extremitati axis per centrum horarii circuli transeuntis adjiciendus est stilus minutior, quem *Indicem* vocant *horarium*, qui sic fabricatus



bricatus est, ut volutato Globo stilus axi adhærens per omnium horarum sectiones percurrat. Hunc indicem licebit circumquaque movere, & ad singulas horas horarij circuli, ejus cuspidem, ut libuerit, applicare.

Vsus circelli hujus & Indicis horarij est, ut horas ortus & occasus Solis notet. Quod in hunc modum fiet: Primum Globus constituatur ad poli elevationem ejus loci, in quo degis, deinde signum & gradus signi in quo Sol versatur meridiano applicetur: Index autem circelli horæ sive interstitio duodenario superiori imponatur, atque ita moto globo cum dicto signi gradu ad horizontem Orientis, horam ortus Solis indicabit; ad horizontem verò occidentis, horam occasus Solaris dabit.

## DE CIRCULO VERTICALI, QVI ALIAS QVADRANS DICITVR.



**Q**uadrans è chalybe seu laminâ eneâ oblongus est juxtaque sphæræ gibbositatem formatus, habens in longitudine quartam partem magni sive integri circuli; aptaturque in hanc formam meridiano, ut omnium locorum Zenith accommodari queat, divisus ab extremitate versus summam, qua Meridiano affigitur, in gradus 90. vulgo *quartam altitudinis vocât.*

## DE COMPASSO SIVE PIXIDE NAUTICA.

**A**D Globi pedem constituitur *compassus* sive *pixis nautica*: Cujus beneficio animadverti potest, nū rite & ad quatuor mundi plagas machina dirigatur.

### CAPVT. II.

## DE CIRCVLIS, QVI IN GLOBI SUPERFICIE DELINEANTVR.

**S**E QV VNTVR circuli in ipsa Globi superficie descripti. Primò æquali ab utroque polo distantia sive xc graduum intervallo delineatur maior circulus, qui vocatur *Æquinoctialis*, vel *Æquator*



*Æquator,*

*Æquator*, ideo quia cum Sol in hoc circulo constituitur, dies noctibus ubique locorum adæquat. Hujus circuli revolutione definitur dies naturalis, *νοχθήμερον*. Est enim *dies duplex: Naturalis & Artificialis*. *Naturalis* est spatium, quo integra æquatoris periodus absolvitur, & est xxiv. horarum. *Artificialis* est spatium, quo Sol superum percurrit hemisphærium, cui nox opponitur, cum scilicet Sol in infero fertur hemisphærio. Artificialis dies ejusque nox æquatur diei Naturali.

*Diei partes* horæ sunt, quæ vel *æquales* vel *inaequales*. *Æqualis* est vicesima quarta pars diei Naturalis: quo tempore quindecim æquatoris gradus supra horizontem emergunt & deprimuntur. *Inæqualis* est duodecima pars diei Artificialis, inter orientem & occidentem Solem. *Horarum partes* sunt *Minuta*. *Minutum* est pars sexagesima horæ æqualis: quo tempore quadrans unius gradus æquatoris five minuta xv oriuntur & occidunt.

Officium & usus Æquatoris in his præcipue versatur, 1 quod ostendat æquinoctia, quæ fiunt illis ipsis diebus, quibus Sol incidit in circulum æquinoctialem: Quod fit Sole ingrediente primos gradus arietis aut libræ. Vnde Manilius:

*Libra ariesque parem reddunt noctemque diemque.*

2 dividit cælum in duas partes, quarum altera vocatur Septentrionalis, altera Meridionalis. 3 indicat ascensiones & descensiones Zodiaci. Vnde lógitudo diei & noctis artificialis in quacunque habitatione observari potest. 4 ostendit quæ stellæ & partes Eclipticæ habeant aliquam declinationem.

*Zodiacus.*

Æquatorem in duobus punctis oppositis obliquè secat circulus etiam major, qui *Zodiacus* & *signifer* nominatur. Ejus obliquitatem primū intellexisse Anaximandrum Milesium Olymp. LVIII refert Plin. lib. 2. cap. 8. Hunc in XII. partes (quæ Signa vocant) divisum cernimus, eaque Cleostratus Tenedius primus observasse dicitur ab eodem Plinio eodem capite. Harum quælibet in xxx rursus minutiores partes secatur, ut totus Zodiacus (sicut reliqui etiam circuli) gradus complectatur 360. Primam partem duodecimam ab altera intersectionum Æquatoris & Zodiaci, ab occidente ortum versus numerando, Aries occupat, secundam Taurus, &c. Sed dubitare jure poterunt rerum Astronomicarum imperitiores, propter quā causam primi triginta gradus, vel prima pars duodecima, totius Zodiaci, tribuantur Arieti, cum prima stella imaginis Arietis non minus



xxvii gradibus sequatur intersectionē æquatoris & Zodiaci. Causa hæc est. Antiquiorum Græcorum temporibus, qui primi stellarum fixarum loca & sedes observarunt, easque suis asterismis expresse-  
runt, prima Arietis stella ab ipsa intersectione vix modico intervallo distabat. Nam *Thaletis Milesij* ætate duobus gradibus antecede-  
bat intersectionem. *Metonis* Attici tempore in ipsa stetit intersectione. *Ti-  
mocharis* ævo duobus gradibus sequebatur. Ob hanc propinquitatē,  
primam partem Zodiaci antiquiores dederunt Arieti, secundā Tau-  
ro, & reliquis suo ordine. Eorum traditionem qui subsecuti sunt ad  
nostra usque tempora retinuerunt.

*Thales Milesius* primus æquinoctia atque Eclipses numeris præscripsit; floruit  
usque ad annum mundi 3370 ante Christi nativitatem 634 annis. *Meton* ante  
Christum natum annis 431 claruit anno mundi conditi 3517. Filius fuit Pau-  
sanix, vir magnæ in Astronomia eruditionis. Proposuit cyclum deceni novenna-  
lem: cujus primum novilunium fuit decimo tertio die Sciophorionis, qui no-  
bis est dies 26 Iunij, feria sexta. Vide Diodorum Siculum. Censorinus de eo hæc  
habet: *Præterea sunt anni magni complures: ut Metonicus, quem Meton Atheniensis ex  
annis undeviginti constituit &c.* *Timochares* natione Alexandrinus fuit vixitque an-  
no ante Christum 300.

Sub hoc circulo Sol reliquique Planetæ suos motus peragunt, suo  
quisque modo & tempore periodum absolvens. In medio Zodiaci  
spatio Sol suū iter peragit: ad ejus cursum ecliptica describitur. Cæ-  
teri ab ecliptica sive Solis cursu, suas habent in latitudinem aberrat-  
iones. Propter eorum digressiones Zodiaco latitudo tribuitur apud  
antiquiores graduum xii. Recentiores propter Martis sed præcipuè  
Veneris evagationes binos utrinque gradus adjecerunt, ut tota ejus  
latitudo gradibus xvi definiatur. Sed ecliptica sola in Globis deli-  
neatur, eaque in 360 gradus divisa, ut reliqui circuli.

Zodiacus secundum latitudinem dividitur bifariam per eclipticam, quæ est  
peripheria sive circumferentia sub qua Sol perpetuo incedit. unde & via Solis &  
orbita Solis dicitur, des *Sonnen Cirkel*; & κύκλος διὰ μέσων τῶν ζωδίων, id est, cir-  
culus per medium signorum, hoc est bifariam dividens latitudinem signorum. Ecli-  
ptica dicta est quasi in ea defectus, quia Lunæ & Solis defectus fiunt ijs sub hac  
linea conjunctis vel oppositis.

Hanc Sol annuo motu percurrit, singulis diebus gradū ferè unum  
medio motu conficiens, hoc est xix minuta, viii secunda, bis æqua-  
torem pertransit, indeque æquali utrinque intervallo discedit. Cum  
æquatorem pertransit in principio Arietis & Libræ constitutus, fi-



unt æquinoctia, & dies nocti æquatur. Cùm longissimè ab æquatore discesserit, & initium Cancrì aut Capricorni attigerit, Solstitium fit & Bruma. Aliam scio mentem (at ab alia causa) Vitruvio, Plinio, Theoni Alexandrino, Cenforino, & Columellæ: cùm docent, æquinoctia fieri Sole percurrente octavum gradum Arietis & Libræ; solstitium & Brumam, cùm octavum item gradum Cancrì aut Capricorni occupaverit. Hi enim solstitia definierunt retrocessione umbrarum gnomonum, umbra autem non percipitur retroagi, ut Theon docet, antequam Sol octavum gradum Cancrì aut Capricorni attigerit. Hinc etiam æquinoctia octavis gradibus Libræ & Arietis tribuerunt.

Officium & usus Zodiaci hic est: 1. Est via & regula seu mensura motus proprii planetarum. 2. Beneficio Zodiaci vera loca omnium stellarum inveniuntur; item sciri potest, in quo signo stellæ fixæ vel planetæ esse dicantur. 3. ostendit latitudines planetarum & stellarum fixarum. 4. sub Zodiaco seu ecliptica fiunt eclipses Solis & Lunæ. 5. obliquitas eclipticæ est causa inæqualitatis dierum & noctium artificialium.

*Annus.* Spatio, quo Sol Zodiacum percurrit, Annus definitur, est autem illud dierum 365 cum quadrante, paulo minus. Accuratum enim huius periodi tempus qui quærunt, frustra quærunt. Inæquali enim tempore absolvitur. Magna de hoc tempore controversia inter antiquiores, nondum apud recentiores definita. Philolaus Pythagoræus statuit dierum 365. Reliqui omnes huic tempori aliquid adjecerunt. Harpallus definivit diebus 365 & dimidio. Democritus 365 cum quadrante & centesima sexagesima quarta parte. Oenopides diebus 365, horis 9 fere. Meton Atticus statuit anni quantitatem dierum 365 hor. 6. m. 19 fere. Post hunc Calippus ad dies 365 & quadrantem reduxit, quem secuti Aristarchus Samius & Archimedes Syracusanus. Ad eorum mentem Iulius Cæsar descripsit annum civilem, edoctus (inquit Dion) ab Alexandrinis, adhibito (ut ferunt) in consilium Sostigene Peripatetico magni nominis Mathematico. At maiorem justo anni quantitatem hi omnes præscripserunt præter Philolaum, qui defectu aberravit. Minorem enim diebus 365 & quadrante, evincunt accuratiores omnes omnium temporum & artificum observationes. At quantò hoc spatium excedat justam anni quantitatem, non est adeo facile explicatu. Hipparchus eumque secutus Ptolemæus voluerunt eximendam trecentessimam partem diei, ut non rectè monuerit



erit Iacobus Christmannus, annum Tropicum ex Hipparchi & Ptolemæi sententia constare diebus 365, & trecentesima parte. Statuunt enim ij minorem diebus 365 cum quadrante, diei unius trecentesima parte, ut patet 2. cap. lib. 3. Almag. Ptolemæi, & ipse Christmannus alibi rectè advertit. Hanc anni quantitatem justam, perpetuam & immutabilem voluit Ptolemæus. Neque Hipparchi de inæquali periodi solaris restitutione observata, contrarium persuadere poterant. At eorum qui secuti sunt observationes, cum Hipparchi & Ptolemæi observatis collatæ, contrarium probant. Albategnius adimit sexcentesimam partem diei. Indi & Iudæi partem centesimam vigesimam : Persæ centesimam decimam quintam; ad quorum mentem Messalah & Albumasar conscripserunt tabulas medijs motus Solis. Azaphius, Avarius & Arzachel dixerunt excessum hunc esse centesimæ tricesimæ sextæ partis diei. Alfonsus eximit centesimam vicecentiesimam secundam partem diei. Alij centesimam vicecentiesimam octavā; Alij centesimam tricesimam demunt. Qui nuper Calendarium Romanum restituerunt, centesimam tricesimam tertiam partē ferè eximendam voluerunt, quadringentis annis tres dies integros accrescere arbitrati. Copernicus centesimam decimam quintam partem diei huic tempori deesse deprehendit. Rectè igitur Censorinus ait, annum complecti dies 365, & portionem nescio quam Astrologis adhuc inexplorata.

Ex ijs Dion erroris planè ridiculi convincitur : qui in annis 1461 Julianis arbitratur diem integrum deficere ad justam anni quantitatem, quem intercalandum vult, ut annus civilis Iulianus accurate congruat Solaribus revolutionibus. Gravius etiam aberrat Galenus, magnus ille Medicorum princeps, qui arbitratur annum esse dierum 365 cum quadrante, & præterea partis cujusdam propemodum centesimæ, unde in singulis annis centesimis sequeretur nova intercalatio integræ diei.

*Æquinoct. et solstit. mutatio.*

Quoniam autem annus Iulianus (qui à Iulio Cæsare institutus, & post ejus tempora receptus, hodie est in usu) aliquanto majorem justo quantitatem obtinet, hinc fit, ut æquinoctia & solstitia antiquas in Calendario sedes anteverterint. Annis circiter 432 ante incarnationem Christi, æquinoctium vernum à Metone & Euctemone observatum, in viii. Kal. Aprilis vel xxv Martij, secundum computum



anni Iuliani, hæſſe deprehenditur. Anno cXLVI ante incarnationē, ex Hipparchi obſervatis ad xxiv ejusdem menſis vel ix. Kal. referendum eſſe conſtat. Hinc patet Soſigenis (utut magni Mathematici) error, qui e amplius poſt Hipparchum annis, in ordinatione Calendarij Iuliani idem æquinoctium ſtatuit in xxv. Mart. vel viii Kal. April. quem locum propemodum cccc annis ante ejus tempora occupare debuiffet. Atque hic error Soſigenis ad poſteros etiam dimanavit, unde Galeni tempore (cc paulo minus poſt Cæſarem annis) æquinoctia circa xxiv dies menſium Romanorum, Martij & Septembris, inſigniri ſolita, autor eſt Theodorus Gaza. Anno incarnationis Chriſti factum eſt x. Kal. ſive xxiii Martij. Annis cxi poſt incarnationem, Ptolemæus obſervavit xi. Kal. Tempore Concilij Nicæni circa annum Chriſti cccxxviii hæſit in die xxi Martij, vel xii Kal. April. Octingenteſimo triceſimo primo poſt incarnationem anno, Thebit Benchorah obſervavit æquinoctium verum die xvi Martij. Alfragani ætate hæſit in xvi Martij. Arzachel Hiſpanus milleſimo nonageſimo anno obſervavit Id. Mar. ſive die xv ejusdem menſis. Anno mcccxvi obſervatū eſt die Martij xiii. Noſtra ætate ad xi & x ejusdem menſis devenit. Ita ut annis circiter mille viginti duobus, non minus diebus xiv antiquas ſedes anteverterint. Tempus item ſolſtitij à Metone & Eudemone obſervati annis circiter 388, ante natalem Domini congruit xxviii Iunij, ut docent Joſephus Scaliger & Jacobus Chriſtmannus. At noſtris temporibus in xii ejusdem menſis deprehenditur.

*Coluri Solſtitiorum & æquinoctiorum.*

Eclipticam & Æquatorem tranſverſim ſecant duo circuli, majores item, qui *Coluri* vocantur. Vterque per mundi polos tranſit & æquatorem rectè ſecat. Alter per utriuſque interſectionis puncta tranſit, & vocatur Colurus æquinoctiorum: Alter per puncta maximæ diſtantię, & Colurus ſolſtitiorum nominatur.

Colurorum in genere officia communia ſunt, 1. oſtendere quatuor principalia puncta Zodiaci, in quibus propter motum Solis maxime temporis mutationes fiunt: Quorum punctorum duo in equatore ſunt *aries* nimirum & *libra*, conſtituentia colurum æquinoctiorum; & duo in Tropicis, *Cancer* & *Capricornus*, qui efficiunt colurum ſolſtitiorum: 2. diſtinguere æquatorem, Zodiacum & totum cælum in quatuor æquales partes. Cujus rei uſus in loco de ſignorum aſcenſionibus præcipue patet.

Differunt



Differunt inter se coluri quod *Colurus solstitialis* transeat per polos Mundi & Zodiaci simul: *Equinoctialis* transeat per polos Mundi tantum.

Vtrumque Colurorum, ut & equinoctiorū puncta, ab antiquis quas in cœlo tenuerunt sedibus discessisse, qui motus cœlestes diligentius speculati sunt, facile adverterunt, sive stellę fixę progressę sint in antecedentia secundum signorum ordinem, ut Ptolemęo placuit, vel puncta equinoctiorum & solstitiorum retrocesserint in consequentia contra ordinem signorum Zodiaci, ut voluit Copernicus.

Quid de hac *Equinoctiorum* processione ac sententia Ptolemęi ac Copernici censuerit olim Iosephus Scaliger, cum illustrium Ordinum Hollandiæ rogatu electi essent arbitri super quæstione quapiam mathematicā; atque ipse in illis esset, expressit in Epistola quadam ad Isacium Casanbonum, quę edita est postmodum Lutetię Parisiorum cum alijs aliquot ejusdem epistolis atque opusculis: Quid item Tycho noster statuerit, exstat in Progymnasmatibus instauratę Astronomiæ pag. 255. Sed primum ponam verba & sententiam Scaligeri: atque inde Tychonis aliaque subjungam. Scaliger ita loquitur:

*Altera literę tuę postridie mihi reddita sunt, postquam priores accepi. In illis meministi cujusdam, qui Magnetica cuspidis directionem profitetur. Multi hoc conati sunt, conanturque quotidie maximis ab Ordinum illustrium consilio propositis premijs. Quidam obtulerunt epicheiremata sua: capti sunt de ea arbitri. Ego unus in illis fui: in quibus Mathematici & nauta peritissimi. Sed qui eorum Mathematica profitebantur, illi τὸν ναυτικὸν ἀπειροί, οἱ δὲ ναῦται ἀναπρολόγητοι erant. Præterea auctores illi, de quibus sententiam ferre debebamus, nihil tanto hiatu dignam præstiterunt. Quidam Anglus ante triennium libro de Magnete edito nihil dignum expectatione ea, quam excitarat, protulit. Ego sæpe proposui Mathematicis his, qui hic profitentur, rem, quam ipsi nunquam concoquere potuerunt, risu & ludibrio exceperunt. Hipparchus primus omnium rem jocularē & ridiculam excogitavit, motum, inquam Octavę spherę in Occidentem; & stellās in Occidentem promoveri eodem situ, ordine, intervallis servatis persuasit Ptolomęo, Ptolemęus ita confirmavit, ut posteritati de eo dubitare religio fuerit. Primus omnium memoria patrum nostrorum, alter Astrologiæ vindex Nic. Copernicus odoratus est futilitatem epicheirematis Hipparchei. Et non octavam spheram in Occidentem, sed equinoctialia puncta οἱ τὰ ἀεὶ γίνεσθαι procedere animadvertit: idque vocat ἀεὶ γίνεσθαι ἰσημεριῶν. Hanc præclaram animadversionem publicatam, nulla demonstratione eorum, quę ex illa pendere necesse est, illustravit. Sed rem nudam tantum*



proposuit, nos vero animadvertimus stellas, ut fabulantur Hipparchus & Ptolemaeus, eis τὰ ἐπόμενα progressas nunquam fuisse : & τὴν κινέσθην a temporibus Eudoxi eodem intervallo à polo mundi propius abesse, ut hodie. ejusque rei exempla collegimus. Quibus animadversis præcessio æquinoctiorum concedenda est. Nam alterutrum concedendum, aut τῆς ὀγδὸς σφαίρας εἰς τὰ ἐπόμενα κίνησιν, aut τῶν ἰσημερινῶν κέντρων εἰς τὰ προηγούμενα μεταβάσιν, alterum nō esse vincit ἡ ἀκίνησις τῶν ἀπλανῶν ab Eudoxi temporibus. Ergo alterum est. Sunt igitur præcessionēs æquinoctiorum, quas non potuit demonstrare summus ille vir, nisi ἐκ τῶν φαινόμενων, ex quibus tam potest defendi alter motus, quam præcessio. Iam habemus προήγησιν ἰσημερινήν. Quid est? τῶν ἰσημερινῶν κέντρων εἰς τὰ προηγούμενα κίνησις. Punctorum æquinoctialium in antecedentia motus, si moventur puncta æquinoctialia, circulus autem æquinoctialis ad illa puncta describitur, ergo circulus æquinoctialis mobilis est, quod vero verius. Si circulus æquinoctialis mobilis, & polus quoque ejus mobilis est. Itaque polus circuli æquinoctialis erit alius à polo mundi. Polus enim mundi ἀκίνητος, iste κινητός. Præterea omnes meridiani transeunt per polos æquinoctialis, & in superficijs lapidum linea meridiana, quæ ad collocanda horologia solaria designatur, ea intelligitur per polos æquinoctialis transire, quod & omnes fatentur, & verum est. Sed quia poli æquinoctialis circuli sunt mobiles, & lineæ quoque meridiana, quæ per illos transeunt, sunt mobiles. Ac propterea necesse est, ut post aliquot annos linearum meridianarum usus nullus futurus sit, ad designandas horas, & iterum capienda erit linea alia meridiana, & reformandus situs horologii, non horologium ipsum. Concludamus, horologia solaria post aliquod tempus fidem decoquere, nisi instauretur linea meridiana. Hoc Mathematicæ ipsa & ἡ ἀπόδειξις convincit. Sed præter id, habemus, præclara veterum exempla, quæ vincunt post aliquot annos horologia non respondere prioribus designationibus, quæ quidem omnia studiose collegimus. His ita demonstratis ego proposui istis Mathematicis, ut quia totum negotium magneticæ cuspidis versatur circa meridianos, consideraret, an hæc doctrina à nobis primis prolata aliquam viam huic rei munire possit. &c. Hactenus Scaliger; Nunc Tychonem audiamus, Inæqualitatis, inquit, circa motum inerrantium stellarum, sive ut Copernicus loquitur, anticipationis æquinoctiorum rationes, quas ille admodum ingeniose & subtiliter speculatus est, ut omnium antecessorum inventa tueretur atque conciliaret, nequaquam recte constare, vel hi septuaginta ab ejus prima observatione in Spica virginis elapsi anni testantur, in quibus multo celerior est reddita æquinoctiorum reciprocatio,



ratio, aut stellarum promotio, quam ille futuram putabat, adeo ut cum nunc in posterum centum circiter annis, unum gradum conficere deberent, in 70 illum absolvant, anni etiam quantitate, nequaquam ita tarda existente, ut ipse putavit, velut ex ijs quæ priori capite tradidimus, liquet. Hæc enim duo apud Copernicum, quasi invicem coherent, ut tardissimus sit fixarum motus, quando anni quantitas maxima est. Verum præsentium annorum accuratæ observationes hæc eludunt, cum ipsius periodicis restitutionibus non corresponsdeant.

Hæc duo illustria seculi nostri lumina Tycho & Scaliger: Quibus addi potest Gulielmus Colcestrensis Anglus, Medicus Londinensis, qui libro 6 de Magnete præcessionem æquinoctiorum mavult a magnetico motu polorum telluris deducere. Est autem ille ipse quantum colligo, Anglus quem supra tetigit Scaliger. Eum vide libro 6 jam indicato Capite octavo.

Prima Arietis stella, quæ Metonis Attici tempore in ipsa intersectione vernali fuit, Thaletis Milesij tempore eandem intersectionem duobus gradibus antecessit. Timocharis ætate 2 grad. 24 m. sequebatur. Hipparchi ævo 4 gr. 40. m. Albumasaris 17. gr. 50. m. Albareni 18. gr. 10 m. Arzachelis 19. gr. 37. m. Alfonsi 23. gr. 48 m. Copernici & Rhætici. 27. gr. 21. m. Hinc Francisci Barocij error deprehenditur, qui voluit primam Arietis stellam tempore natalis Christi intersectione verna hæsisse: præsertim verò quòd ex Ptolemæi observatis illud contendit; è quibus non minus quinque gradibus secutam esse comprobatur.

Eodem modo & solstitiorum sedes mutatae sunt, quia æquali semper spatio ab æquinoctiorum punctis distant, Hanc motionem fieri super polis eclipticæ Ptolemæus, ante eum Hipparchus, & ij omnes qui secuti sunt, fatentur. Qua de causa stellarum fixarum latitudo eadem semper manet, declinationes autem mutantur. Multa hujus rei testimonia petantur ex c. 3. l. 7. Alm. Ptolemæi. Vnicum cæteris magis insigne proferam ex 7. c. l. 1. Geograph. Ptolem. Stellam quam vocamus Polarem, in extremitate caudæ ursæ minoris, nostra ætate vix tribus gradibus à polo remotam certissimum est: hanc tamen Hipparchi tempore xii amplius gradibus distantem Marinus apud Ptolemæum docet. Integrum locum profero. In Zona torrida Zodiacus totus super ipsam fertur, quare utrinque projiciuntur umbra, ac omnia astra oriuntur & occidunt. Sola Vrsa minor tota supra terram apparere incipit in locis Oceani Borealiorebus 500 stadijs. Parallelus enim per Oceleum grad. 11 & duabus quintis ab æquatore distat. Ab Hipparcho autem traditur minoris ursæ stellam Australissimam, in ipsa cauda extremam, à polo distare gradibus 12 & duabus quin-



*bus quintis.* Pulcherrimum hunc locum interpretes malè vertēdo turpissimè deformarunt (quod post Ioannem Wernerum advertit etiam P. Nonius) pro quingentis stadijs *quinque mille*, pro *Australissimam* reponentes *Borealissimam*: decepti fortassis, quòd nostro ævo borealissima fit. Si Marini & Ptolemæi fidem in hac re suspectam habeant, Strabo 2. l. Geogr. liberabit eos hoc crimine. Sic autem scribit. *Ait ergo Hipparchus, eos qui in Cinnamomifera parallelo habitant (qui à Meroe versus Austrum abest 3000 stadijs, rursusque ab hoc æquinoctialis 8800) proxime omnino abesse à situ medio inter æquatorem & æstivum tropicum, qui per Syennem transit (quæ à Meroe abest 5000 stadijs, apud hos autem primos ursam minorem totam arctico circulo includi, nunquamque occidere, nam stellam in extrema cauda lucidam (quæ maxime versus Austrum vergit) in ipso circulo ita collocari, ut horizontem tangat.* Hæc Strabo, eadem plane mente, qua Ptolemæus & Marinus, nisi quod ex Eratosthenis sententia tum hîc tum alibi semper 700 stadia uni gradui in terra tribuit, cùm Marinus & Ptolemæus 500 solum stadia congruere faciant, de qua re postea agamus.

Vide cap. 5 partis quartæ & præsertim cap. 14 ejusdem partis.

*Tropicus  
Canceri &  
Capricorni.*

Sequuntur circuli minores in Globis delineati. Hi omnes æquatori sunt paralleli. Primo Tropici, qui per puncta maximæ declinationis eclipticæ ab utraque parte æquatoris ducuntur. Qui ad Boream vergit, Tropicus Canceri; qui ad Austrum, Capricorni dicitur. Sol enim annuo motu eclipticam percurrent, cum ad terminum maximæ ab æquatore distantia pervenerit, retrocedit æquatorem versus. Hunc retrocessum *πρωήν* Græci vocant, & parallelos circulos per initia retrocessionis ductos, Tropicos nominant.

Ufus & officium Tropicorum est, 1 ut monstrent, quando Sol in Sphærâ obliquâ puncto nostro verticali sit proximus, & quando sit remotissimus. 2 ut ostendant, quando Sol suo motu diurno diem totius anni vel longissimum vel brevissimam efficiat. 3 ut sint veluti limites includentes in cælo regionem intra quam Sol perpetuo movetur. 4 ut separent in cælo Zonam torridam à duabus temperatis.

Tropicorum ab æquatore distantiam variè immutatam esse, ex collatis veterum & recentiorum observatis facile constat. Vt enim mittamus Strabonem, Proclum, & Leontium mechanicum, qui distantiam alterutrius Tropici ab æquatore graduum 24 posuerunt (neque enim satis accuratè tractasse videntur) ex accuratioribus maximorum artifi-

cum



cum observatis hoc ipsum licebit deprehendere. Ptolemæus enim alterutrum Tropici ab æquatore distantiam 23. gr. 51. & tertiam partem invenit, quantam ante eum Eratosthenes & Hipparchus, ideoque immutabilem existimavit. Machometes Aretensis distantiam hanc observavit 23. gr. 35. m. quantam ante eum Almamon Arabum Rex. Arzahel Hispanus 23. gr. 34. m. Almehon filius Albumasaris 23. gr. 33. cū dimidio m. Prophatius Iudeus 23. gr. 32. m. Purbachius & Regiomontanus 23. gr. 28. m. Ioannes Wernerus 23. gr. 28. cum dimidio m. Copernicus 23. gr. cum dimidio m. deprehendit.

Hæc Tropicorum ab æquatore distantia fit ob Solis, quam Astronomi appellant, declinationem maximam. Quæ Solis maxima declinatio diversa diversis temporibus inventa fuit. Nam à primis temporibus, quantum fieri potuit, per olympiades & annos Christi adusque nostra seu tempora Tychonis calculum deducentes talem invenimus circa gradus & minuta, cuiusmodi in tabella sequenti proponitur:

|                    |     |     |               |                  |                      |
|--------------------|-----|-----|---------------|------------------|----------------------|
| Aratus,            | 24, | 0   | 0             | Olympiade        | 124.                 |
| Hipparchus         | 23, | 51  | $\frac{1}{3}$ | Olympiade eadem. |                      |
| Eratosthenes       | 23, | 51  | $\frac{1}{2}$ | Olympiade        | 127.                 |
| C. Ptolemæus       | 23, | 51, | 20            | Anno Christ.     | 140.                 |
| * Albategnius.     | 23, | 35  | 0             | Anno Christ.     | 749. * Alias         |
| Airahel.           | 23, | 34  | 0             | Anno C. N.       | 1070. Mahome-        |
| Almehon.           | 23, | 33  | 0             | Anno C. N.       | 1140. tes Aretensis. |
| Prophatius Iudeus, | 23, | 32  | 0             | Anno C. N.       | 1300.                |
| Purbachius         | 23, | 29. | 30            | Anno C. N.       | 1458.                |
| Regiomontanus      | 23, | 30  | 0             | Anno C. N.       | 1490.                |
| Copernicus         | 23, | 28. | 30            | Anno C. N.       | 1500.                |
| Tycho Brahe        | 23, | 31  | $\frac{1}{2}$ | Anno C. N.       | 1592.                |

Quibus addenda sunt Tychonis hæc verba ex lib. 1. de stellâ novâ anni 1572 pag. 101: *mutari declinationem maximam, & ob id quoque reliquas intermediarias, diutina temporum labente serie ab artificibus compertum est, adeo ut ea circa æquum Ptolemæi & aliquot precedentium Astronomorum fuerit p. 23. 53, nec unquam maiorem deprehensam, ullis veterum monumentis constat.* Unde colligere est Aratum, qui primo loco ponitur, & grad. 24 assignavit, lato modo &, quemadmodum author de Strabone, Proclo & Leontio mechanico refert, minus accurate hæc tractasse.

### Circuli Arct. & Antarct.

Tantâ ab utroque polo distantia quanta est Tropicorum ab æquatore, ducuntur duo circuli minores, qui à polis ad quos accedunt

Circulus  
Arcticus  
& antar-  
cticus.

E

sumpt.



*Poli Eclip-  
tica.*

sumpserunt nomina; ut alter dicatur circulus Arcticus vel Borealis; oppositus autem, Antarcticus vel Austrinus. In his circulis *poli ecliptica* siti sunt, ubi Colurus solstitiorum eos interfecat. Strabo, Proclus, Cleomedes Græci, & quidam Latinorum certam aliquam distantiam hisce circulis à polis non attribuunt; varios faciunt & mutabiles pro diversa poli elevatione, sive inclinatione sphaeræ: ut alter describi concipiatur intervallo poli manifesti ab horizonte; & erit maximus parallelorum semper apparentium: alter æquali ab infero polo distantia; & est maximus semper latentium.

Arcticus & Antarcticus circuli ostendunt, 1 polos Zodiaci, eorumque distantiam à *polis Mundi*, 2 distinguunt Zonas frigidas à temperatis & una cum Tropici totum primum mobile in quinque partes seu regiones, quas *Zonas* vocant, dividunt.

### *Circuli verticales.*

*Circuli  
verticales.*

*Quadrans  
altitudinis.*

Præter hos circulos in Globis expressos, in familiari usu sunt rerum coelestium observatoribus, circuli quos vocant Verticales. Hi majores sunt circuli, quot libuerit, à vertice ad horizontem ducti. Arabes circulos Azimuth vocant, quo etiam nomine ut plurimum vulgo appellantur. Horum officium in Globorum usu præstabit quadrans circuli ænei in 90 partes divisus. Hunc vertici cujusque loci, cum postulat usus, oportet adjungere, ut terminus 90 à vertice graduum horizontem ubique attingat. Hic mobilis factus est, ut vertici cujusque loci affigiqueat. Vocant quadrantem altitudinis.

Arcticum & antarcticum circulos mutabiles seu mobiles esse Iosephus Scaliger se primum ex veterum, & præsertim Græcorum, mente commonnisse asserit in Commentarijs Manilianis, à se ante obitum recognitis atque evulgatis. Nec existimat, nisi Latinum aliquem scriptorem & quidem recentiorum quadringentis annis, imo vix ante Sacroboscum immobiles eos quempiam statuisse. Sed cum multa præclara eo loco a Scaligero indicata concurrant, & rem ob oculos per demonstrationes ponat, operæ præstium existimavi, quia & author obiter de eodem mentionem inijcit, si Scaligeri sententiam, & quidem ipsius verbis, hic apponerem: Ait itaque ad illos versus Manilij lib. 1 Astronomici:

*Circulus ad Boream fulgentem sustinet arcton,*


*Sexque fugit solidas a celi vertice partes:*

Ait, inquam, in hunc modum: Describuntur circuli Æquinoctiali paralleli xc. ij erunt, quos Geminus vocat αειφωρσς. Is autem, qui punctum Orientis ad communem intersectionem Meridiani & Orientis tanget, erit

μεινς



μέγιστον τῶν ἀειφανερῶν ac proinde Arcticus illius loci. Quia verò horizon-  
tes mobiles, sic & Arctici mobiles. Ita in climate Cnidi, ubi polus ad xxxvi  
grad. attollitur, Eudoxus scripsit Arcticum circulum totidem partibus a polo  
mundi distare. In alio climate alius erit, nempe pro ratione ἐξαρματῶν, id est,  
elevationis polaris. Hipparchus : ὅδ' ἐν Αθήναις ἀειφανὴς κύκλος ἀπέχει ἀπὸ  
τῆς πόλεως περὶ μοίρας λζ. ὅδ' ἐν Ρόδῳ περὶ μοίρας λς. & quanta erit altitudo loci, in  
tantum à polo distare punctum illud necesse est, cuius intervallo circulus Ar-  
cticus describitur. Itaque vetustissimi Græci Arcticum circulum definierunt  
τὸ ἀρκτικώτατον σημεῖον τῆς ὀρίζοντος, vel, τὸ ἀρκτικώτατον τῆς οἰκῆσεως σημεῖον. I-  
ta circulus Arcticus nihil aliud est, quam punctum habitationis, quod finito-  
rem propius tangit. Nam punctum circinationis commune cum horizonte ha-  
bet. In hoc differunt, quod centrum Arcti-  
ci circuli est polus Mundi. Centrum ho-  
rizontis est punctum verticale seu zenith  
loci. A F D E est horizon. A G C H, circulus  
Arcticus. A D, Meridianus. A, intersectio  
communis horizonis & Meridiani, ubi  
& contactus seu commune punctum cir-  
cinationis. D, Polus; C, Zenith loci. I, op-  
positum punctum diametri circuli Arcti-  
ci. Quod si poli elevatio xlv grad. absolu-  
te fuerit, ut Viennæ Allobrogum, tunc pu-  
ctum I, idem erit cum C. hoc est, opposita  
pars peripheriæ Arctici premet Zenith  
loci. Si fuerit minor xlv grad. Zenith erit extra circulum : si major, intra  
circulum. Ita fiet, ut quo propius Æquinoctialem accedetur, eo minores fiant  
circuli. Contra, majores, quo longius ab ipso receditur : sub Æquinoctiali au-  
tem, id est, sphaera recta, nulli porsus sunt Arctici. Pytheas scripsit habitantibus  
Thulen Tropicum esse vicem Arctici. Sive igitur intra Arcticum erit, sive  
extra, tantum à puncto I, distabit, quanta est differentia elevationis poli ab e-  
levatione Æquinoctialis supra horizontem loci. Exempli gratia : Romæ polus  
attollitur grad. 41. Ergo Æquinoctialis attollitur ad 48. 20. Differentia, 7.  
40. Proinde Zenith Romæ extra circulum à sui Arctici circumferentia distat  
grad. 7. 40. Sic habitantibus Thulen ea distantia est grad. xlii, utpote qui-  
bus polus est grad. 66. 30 : Tropicus autem radit punctum intersectionis com-  
munis. Quare Martiano Capellæ Arcticus circulus definitur semper appa-  
rens, & contingens confinia Finitoris nunquam merfus assurgēs. Con-





finia Finitoris dicit intersectiones horizontis & meridiani in *σημείω ἀπὸ τοῦ*  
*ἡμισφαιρίου.*

His ita positis videmus, quot habitationes, tot circulos Arcticos esse, non fixos, non ἀμετάβλητους, sed pro locorum differentia alios atque alios. Multum igitur errant recentiores, qui in Sphæra mechanica illum apponunt & alium à veterum descriptione, quum illum à puncto poli Eclipticæ circa polum Mundi describunt. Nam talis Arcticus non potest esse, nisi eorum, quorum inclinatio tanta, quanta maxima Solis declinatio: ut accidit ijs, qui Syenem Niloticam habitant. Illis enim polus attollitur ad grad. 23. 30. His animadvertis, Circulus Arcticus non potest in Sphæra mechanica locum habere, nisi Sphæra ad loci inclinationem fabricata sit. Aliter nullus est circulus Arcticus. Quum ego hæc in Aquitania de Circulo Arctico proposuissem, ubi multi docti, indoctique, nobiles pedagogique erant, non potest dici quanto sibilo exceptus fuerim. Quum eorum pertinacia meam constantiam non obtunderet, pene vapulaui. Tandem victi dixerunt, illum circulum esse utilem ad Zonas distinguendas. In quo maiorem risum mihi sustulerunt. Nam Zonæ locum hodie non habent in nobis, quibus totus orbis navigationibus Lusitanorum & Hispanorum patefactus est. Cujus rei gratia verba Strabonis confutandæ horum Mathematicorum sententiæ adduxi: εἰ δὲ Πολύβιος & ἄλλοι, τοὺς οὖν τινὰς ζώνας τις ἀπὸ τοῦ πόλου ἀφιστάμεναι, δύο μὲν τὰς ὑποπλάγιους ἀπὸ τοῦ πόλου, δύο δὲ τὰς ἑσπερίων καὶ ἑσπερίων ἐπὶ τοῦ πόλου. εἰρηματικῶς δὲ τὸν πόλον μὲν ἀπὸ τοῦ πόλου ὡς ἀπὸ τοῦ πόλου. Itaque friget eorum Philosophia. Sed impudentia adhuc finis non est. Vix invenias ex istis, qui mathematica profiteantur, quibus non videamur insanire, si in doctrina circulorum diversa à Iohanne Sacrobosco sentiamus. Quidam tamen nuper priore editione Manilij monitus, obiter & quasi invitatus dicit alium usum fuisse veteribus Arcticos circulos &c. Et post pauca: Quis auctor tam ridiculi commenti fuerit, nihil aliud possum dicere, quam Latinum scriptorem fuisse, & quidem recentiorum quadringentis annis. An alius ante Sacroboscum id professus sit, nescio. Certe in præsentia antiquior non succurrit. Ut igitur nostri errant, qui immobilem Arcticum constituunt contra veterum mentem: ita veteres illi, & post illos nostri castigandi, qui illum circulum tribus reliquis parallelum constituunt, quum paralleli circuli in sphaera potum eundem cum ipsa habeant. At polus Arctici semper est idem cum sphaeræ polo. Polus reliquorum trium variat, ut puncta tropica & æquinoctialia. Æquinoctialia enim & Tropica ardevertunt loca in Zodiaco, ita ut in aliquot annis unum gradum in antecedentia promoveantur. Circuli autem Æquinoctiales & tropici nulli alij sunt, quam qui ad illa puncta mobilia describuntur. Mobiles sunt



les sunt & proinde eorum poli mobiles quoque. Pro istis quoque vapulabimus priusquam longa dies hominibus hoc persuadebit, apud quos vis rationalis nihil potest.

Hæc Scaligeri & veterum de Arcticis circulis sententia fuit. Quam nuper Iohannes Pincierus, vir eruditissimus lib. 2. Cap. 13 Parergorum Otij Marpurgen- sis ita excussit ac refellere conatus est.

Arctici, inquit, circuli descriptio à Proclo reddita talis est : Arcticus circulus omnium qui perpetuo conspiciuntur, maximus est, attingitque horizontem uno puncto totusque supra terram cohibetur; Antartici autem talis : Antarticus circulus æqualis & parallelus arctico est, attingitque horizontem uno puncto totusque sub terram cohibetur. Procli igitur hæc est mens, arcticum & antarticum esse circulos mobiles: describi à puncto sphaerae Horizontem, à quo polo est proximus, tangente: mutari, quoties ab Aquilone in Austrum progredienti mutatur horizon & contra. Vnde efficitur, quo viciniores sunt polis, eò fieri angustiores: quo longius ab ijs removentur, eo reddi ampliores: & quia fixis sedibus carent, in sphaera armillari designari non posse.

Inde tria nascuntur incommoda : primo Arctici à Proclo descripti ad Zonas frigidas à temperatis distinguendas, ob incertum eorum situm & mutabilitatem, haud quaquam erunt idonei: Deinde apud illos, quorum sedes à polis abest viginti tribus gradibus & semisse (quanta scilicet est maxima Solis ab æquatore declinatio) arcticus cum tropico Cancri, antarticus cum tropico Capricorni, ut loquuntur, coincidat fietque utrobique ex duobus circulis unus. Erunt igitur illis re ipsa duo tantum sive paralleli sive circuli minores, qui non plures tribus Zonas efficient, duas frigidas & unam torridam. Frigidarum enim à temperatis in ea circulorum confusione nulla est distinctio. Imo sub ipso degentibus æquatore Arcticorum copia nulla. Tertiò habitationibus, ut vocant, accidentia certa haud poterunt assignari, nisi frigida & temperata secernantur & utraque fixis statisque limitibus coerceantur. Vt, cum enarrandum, quanam accidant inter tropicum Cancri & circulum Arcticum commorantibus, quanam sub ipso circulo Arctico: quanam inter circulum arcticum & polum mundi. Ad hanc enim rem fixis Arcticis est opus. Denique maximum lumen & adminiculum eriperetur tabulis geographicis & instrumentis Astronomicis, si circuli arctici in ijs depingi non possent, quod profecto contingeret, si nullam certam haberent sedem, sed subinde cum horizonte mutarentur.

Talia incommoda ab ijs facillime evitantur, qui circulum Arcticum à



polo Zodiaci antarctico circa polos mundi rotatis delineari docent, quasi arctici polorum Zodiaci sint vestigia. Scaligeri filij cum Proclo arcticos mobiles fingentis auctoritate non moveor, licet haud sim nescius, in tantam eruditionem tantumque iudicium vix cadere errorem. Quod ex Strabonis lib. 2. Geograph. afferunt, satis esse, si arctici in habitationibus temperatis sint, & apud quos sunt, apud eos non esse uniusmodi, ἅδεν πρὸς ἑλεγχον, ut ipsiusmet Strabonis verbis utar. Nullius enim tunc essent usus. Non possum igitur assentiri viro, à cuius dogmate natura rei & ratio dissentiunt.

Ad Proclum in extremo huius fabula actu redeo, qui cum ipsemet quinque Zonas agnoscat: exque ijs duas, quæ sunt circa polos, à circulis arcticis determinatas: eisque proximas duas temperatas, quarum limites hinc tropici, illinc arctici, inter quas torrida tropicis inclusa. Tacite profecto videtur immobiles statuere arcticos, sine quibus frigidarum & temperatarum statim termini esse neutiquam possunt.

Hactenus Scaliger & Pincierus. In quibus, quod de Zonis dicitur & veteres tradiderunt, alias æstu, alias frigore nimio esse inhabitates, & si nostratum hodie & Lusitanorum olim navigationibus contrarium & falsum. deprehensum sit, tamen in singulis peculiare quiddam occurrere nemo negaverit: adeo ut vel doctrinæ gratia hos omnesque circulos ac Zonas habere distinctas utile sit: Nec aspernandum si quid inventis veterum à recentioribus additum, quod ad usum & captum discentium accommodatius obscurisque lucem atque intricatis perspicuitatem conciliat.

## CAPUT. III.

DE SPHÆRA PARALLELA,  
RECTA ET OBLIQUA.

Sphæra seu  
Globi pos-  
itio triplex.

Sphæra pa-  
rallela, re-  
cta, obliqua

**P**RO varia habitudine æquatoris ad horizontem (vel enim parallelus est, vel secatur, idque vel ad angulos rectos vel obliquos) triplicem sphæra vel globi situm nobis tradiderunt. Primus est eorum, quorum verticibus polus alteruter imminet, his enim æquator & horizon paralleli sunt, vel potius eundem circulum constituunt. Secundus est eorum, quorum zenith est sub æquatore. Tertius omnibus præterea locis congruit. Primum situm liceat vocare sphæram Parallelam, secundum Rectam, tertium Obliquam. Prima & secunda positio simplex est, tertia multiplex & varia pro varia locorum latitudine. Harum omnium consequentes affectiones sic habent.

Sphæra






*Sphæra Parallela*, diurnâ revolutione neque orientes neque occidentes, nec altiores aut depressiores videt vel Solem, vel stellas. Præterea cùm Sol annuo motu Zodiacum percurrat, quem æquator in duas æquas partes dispescit; quarum altera ad Boream, altera ad Austrum vergit; sequitur ut Sol cùm percurrit ea signa quæ polo verticali propiora sunt, nunquam sub horizonte demergatur, id eoque perpetuum faciet

*Sphæra parallela accidentia.*

diem artificialem dum ea pertransit; quod spatium est sex plus minus mensium. Contra cùm signa à polo eminente remotiora peragrat, continuam faciet noctem per æquale plus minus spatium. Quo autem tempore Sol æquatorem attigerit diurna revolutione ita feretur, ut neque totus supra horizontem appareat, neque penitus occultetur, sed quasi dimidiatus apparebit, reliquus occultabitur.



*Sphæra Recta* hæc sunt affectiones. Sidera omnia oriuntur & occidunt æquali tempore; supra horizontem conspiciuntur, & infra horizontem demersa latent: artificiales dies perpetuo æquantur noctibus.

*Affectiones sphære rectæ.*

In Sphærâ recta omnia sidera oriri atque occidere, id est, omnia in universum supra horizontem per vices conspici atque infra eundem horizontem vicissim demergi, sicque & polum utrūque arcticum scilicet & antarcticum, videri posse

communis hætenus Gemini, Procli aliorumque sententia est: quam & author sequitur. Tamen si propius rem inspiciamus, non tam de Sphæra horizontis sensibilis, quam rationalis seu intelligibilis id verum erit. Nā in Sphæra etiam recta horizontis sensibilis vix poterit visus ad utrumque polum ob terræ tumorem pertingere: Quod & confirmat Iohannes Lerus Burgundus historia de sua in novum orbem profectio. Sic enim ille: *Non modò sub æquinoctiali*, inquit, *polus uterque non apparet, quemadmodum plerique arbitrantur, sed neuter, nisi duobus mensis ultra citraque gradibus.* Aliorum & inter nostrates quoque, qui illa loca navigarunt, contrarium affirmantium an potior & accuratior habenda observatio alijs dispiciendum relinquo.

*Sphæra Obliqua* hæc accidunt. Dies habent noctibus maiores, minores, æquales. Cùm Sol in pūctis æquinoctialibus constituitur (quod

*Sphæra obliqua quæ bis in conveniāt.*





bis in revolutione annua fieri diximus) dies noctibus æquantur. Cùm ab æquatore versus polum eminentem accesserit, augmentur dies, minuuntur noctes, quousque ipsum Tropicum attigerit, quo loco constitutus, longissimas dies, brevissimas noctes facit. Cùm ab æquatore ad polum latentem processerit, noctes facit majores diebus, usque dum pertingat Tropicum latenti polo viciniorem : ubi longissimas noctes, brevissi-

mas dies efficit. Sidera quædam nunquam occidunt, quæ continentur parallelo delineato distantia poli manifesti ab horizonte: alia nunquam orientur in æquali à polo occulto parallelo comprehensa. Hi paralleli sunt: quos (ut diximus) Græcè, ut etiam nonnulli Latinorum, vocant Circulum Arcticum & Antarcticum, alterum semper conspicuum, alterum semper latentem. Reliqua omnia sidera quæ hisce parallelis non continentur, suos habent ortus & vicissim occasus. Qui intra æquatorem & parallelum semper apparentem versantur, majori tempore superum, minori inferum hæmisphærium pertranseunt. Contra, quæ parallelo semper latenti viciniore sunt, majore tempore in infero horizonte versantur, minore in supero. Harum omnium affectionum hæc est causa. Sol in æquatore constitutus (ut & stella etiam si qua alia) diurnâ revolutione versatus, æquinoctialem describit circulum: extra æquatorem, parallelum majorem vel minorem, pro diversa quantitate declinationis Solis aut Stellæ ab æquatore. Hos omnes parallelos, cum ipso etiam æquatore, Horizon in Sphæra recta secat ad angulos rectos. Cùm enim mundi poli in horizonte constituti sint, vertex autem in æquatore, sequitur ut horizon æquatorem secet rectè, quia per polos transit, deinde quia æquatorem rectè secat, omnes etiam circulos æquatori parallelos secabit etiam rectè, ideoque singulos in binas æquas portiones dissecet. Æquæ autem portione omnium parallelorum (ut & æquatoris etiam) eminente supra horizontem cum ea quæ demergitur, necessarium est, ut æquali tempore Sol & omnes stellæ, diurnâ revolutione percurrant eam portionem quæ eminet, atque eam quæ latet. Ideo dies omnes æquantur noctibus, ideo sidera omnia duodecim horis in supero hæmisphærio, totidem in infero permanent. At in obliquâ sphærâ, quia alter polus ab horizonte elevatur, alter



alter deprimitur, diversa omnia accidunt. Cum enim horizon non transit per polos æquatoris, parallelos simili cum æquatore ratione non secabit, sed eorum, qui polo conspicuo viciniore sunt, majus segmentum eminet, minus demergitur. Ex ijs, qui polo latenti viciniore, minor pars apparet, major delitescit, solus æquator bisecatur, ut pars conspicua æqualis sit latenti. Hinc fit, ut in omni obliqua sphaere positione Sol, in æquatore constitutus, dies æquet noctibus. Cum manifesto polo accesserit, augentur dies, quia major arcus apparet. Cum versus polum latentem processerit, majores fiunt noctes, quia majus paralleli segmentum infra horizontem occultatur. Et quanto magis polus alteruter attollitur, tanto majores fiunt dies æstivales itemque noctes hyemales.

Triplicem sphaeræ positionem *parallelam, rectam & obliquam* recte author constituit; Nam Clavius cum Sacrobosco tantum duplicem agnovit, *rectam & obliquam*. Quærenti enim inquit Clavius qualem nam illi dicantur habere sphaeram qui directe sub polis habitant, respondendum *obliquam*. Sed errat cum Sacrobosco Clavius. Nam qui talem sphaeram habent, ut directe sub polis habitent, ijs cum horizonte æquator nequaquam facit angulos obliquos, quia horizon ibi & æquator prorsus idem est. Rectius ergo hæc sphaera *parallela* vel *neutralis* dicetur, quod eius punctum verticale in polos sphaeræ incidat. Omnium autem rectissime Iosephus Scaliger in Notis ad secundum Isagogicum Manilij libri 3. ad eum versum:

*Stantis erit cali species, laterumque meatus  
Turbinis in morem recta vertigine currit.*

Dixit sphaeram omnem aut jacere, sedere aut stare. Ita ut primus sphaeræ habitus sit *jacens*, qui dicitur ὀρθὴς σφαῖρα, propter rectos angulos horizontis cum æquinoctiali: alter *sedentis*, ἑγκλιμένης: Tertius *stantis*, τῆς μολοειδὸς. Tunc enim æquinoctialis qui horizontis vicem est, ac in ambitum rectum convertitur, omnino molæ trusatilis & habitum & conversionem refert. Minus autem proprie *Sphaera recta* dicitur propter rectos angulos, quos cum æquinoctiali facit, quia per eius polos transit, quum ea appellatio *stantis sphaeræ* magis propria sit, in qua æquinoctialis idem cum horizonte & circulo arctico. porro *sphaera jacens* una est, quia una æquinoctialis: *Stantes* duæ, quia poli duo. *Sedentis* diversitates & affectiones multas esse nemo dubitat & satis de ijs author.

Pag. 28 in  
Cap. 1 fol.  
de sacro  
bosco.

Sphaera ja-  
cens; sedens  
& stans.


## CAPITULUM IV.

## DE ZONIS.

**Q**UATOR Minores circuli æquatori paralleli universam terram in quinque tractus dividunt. Zonas Græci vocarunt. Atque



que hoc nomen obtinuit, ut apud Látinos etiam usurpetur. Sed & plagas etiam nominant. Græci interdum Zonæ nomen alienè à nostro instituto Planetarum orbibus attribuunt, ut Theon Alexandrinus in Commentarijs Arateis. *ἔχει γὰρ ὁ οὐρανὸς 7. ζώνας καὶ ἡμετέρας τῶν ζῳδιακῶν. ὧν τὴν μὲν πρώτην ἔχει ὁ Κρόνος: τὴν δὲ δευτέραν ὁ Ζεὺς.* i. e. Sunt autem in coelo Zonæ septem, Zodiaco neutiquam conterminæ, quarum primam Saturnus, secundam Iupiter obtinet, &c.



*Zona tres  
intempe-  
rata.*

*Torrida u-  
na.*

*Due tem-  
perate.*

Quinque Zonarum sive plagarum *tres intemperatas* & inhabitabiles veteres Physici & Geographi existimarunt: alteram propter æstum Solis perpetuò incumbentem, quam Torridam ideo nominarunt (hæc Tropicis utrinque terminari voluerunt): reliquas propter frigus, quia remotissimæ sunt à Solis radijs incolæ non posse duxerunt: quarum altera Arctico, altera Antarcticò circulo tota continetur. Duæ reliquæ Zonæ habitæ sunt temperatæ & habitabiles, altera ex his terminatur circulo Arctico & Tropico Boreo, altera Antarcticò & Tropico Austrino. Hæc recepta apud veteres de numero & finibus Zonarum opinio, nacta est inter antiquiores etiam suos oppugnatores.

Parmenides Zonam, quam vocant adustam, longè ultra Tropicum extulit, ut ferè duplam fecerit ad eam quæ Tropicis definitur. Hunc reprehendit Posidonius, quòd amplius dimidio ejus spatij, quod æstivo nostro Tropico & æquatore continetur, habitari cognoverat. Aristoteles Zonam torridam Tropicis, temperatas Tropicis & circulis Arctico



Arctico & Antartico terminavit: quem Posidonius etiam taxat, quod Arcticos circulos, quos varios & mutabiles fecerunt Græci, Zonarum terminos constituerit. Polybius sex Zonas fecit; adustam, Tropicis definitam, in duas etiam dividens per Circulum Æquinoctialem. Alij Eratosthenis autoritate moti, Zonam quandam angustam, temperatam & aptam habitationi, æquatori subjiciunt, quorum sententiæ accedit Avicenna Arabs. Recentiores nonnulli, nescio qua ratione adducti (hi sunt Nicolaus Lyranus, Thomas Aquinas, & Campanus) terrestrem Paradisum celebratum principio Geneseos, Æquatori subjicere non dubitarunt. Eratosthenes & Polybius universam Zonam, quam alij Adustam duxerunt, temperatam esse voluerunt.

Posidonius receptæ a veteribus Physicis opinioni refragatus est, quod Syenem sub Æstivo nostro Tropico positam, & Æthiopiam Syene interiorē, habitatam cognoverat, quorum verticibus Sol diutius immoratur, quam eorum qui Æquatori subjiciuntur. Inde concludit, loca Æquatori subjecta non esse inculta, quia quæ sub Tropico, non sunt incolis vacua. Ptolemæus c. 6. l. 2. Almag. conjecturam potius quam veram historiam existimat, quæ de habitationibus Æquatori subjectis referuntur. At in Geograph. l. 5. c. ultimo, descripsit nobis locum ultra Æquinoctialem, Agisymbam Æthiopum regionem (hanc regionem novi recentiores quosdam, sed contra Ptolemei fidem, Borealiorem facere Æquatore.) Hæc Ptolemæi inconstantia præbuit quibusdam occasionem suspicandi, non esse utrunque hoc opus ejusdem Ptolemæi.

Vana hæc esse figmenta, quæ de Zonis intemperatis veteres excogitarunt, si non persuadeant Eratosthenis & Polybij autoritas, neque Posidonij ratio: at hodiernæ Lusitanorum & nostratium navigationes evincunt, non solum Zonam, quæ torrida antiquioribus dicta est, incolis repletam esse, sed & intra circulum Arcticum, longè ultra septuagesimum ab Æquatore gradum, omnia esse habitata: ut nullus amplius nostra ætate dubitationi locus sit relictus, nisi forte quispiam malit, cum sacra & veneranda antiquitate etiamnum errare, quam cum recenti experientia utcunque testata & comprobata benè sentire.

Quod de Ptolemæo refertur ab authore, inconstantia eum argui, cum modo in Almag. cap. 6. lib. 2. fabulam non historiam existimat, quæ de habitatoribus Æquatori subjectis memorantur, modo Geograph. lib. 5. cap. ultimo refert, quæ cum iisdem vicissim pugnent, non omittendus aut excludendus extra



nam classem etiam Plinius erat. Nā cum Taprobanes, quæ nunc Zamatra existimatur æquatori subiecta, magnitudinem cap. 22 lib. 6. ex Eratosthene & Megasthene retulisset addidit cōtinuo, præter ea priscorū inventa ac testimonia, etiam Claudij principatu maiorem ejus notitiam contigisse Romanis, legatis eadem Romam advectis: Qui, inter alia, referrent aurum argentumque apud suos in pretio esse opesque majores quam apud Romanos, sed Romanis opulentia maiorem usum esse: Adeo ut hæc aliaque eodem loci prolixè à Plinio memorata, si cum verbis, quæ habet lib. 2 cap. 68. contendantur, adversa sibi locutus reperietur. Nam disputans eo loci atque inquirens quanta terræ portio habitetur *træ*, ait, *terra partes abstulisse nobis calum, torridam, nimirum seu mediam Zonam*, id est, quicquid terrarum est intra Tropicum Cancrī & Capricorni: & duas extimas seu frigidās, id est, quicquid terrarum est intra Arcticum versus polum Borealem; itemque intra Antarcticum versus polum austrinum: quomodo & poetæ olim de iisdem Zonis versibus suis prodiderunt:

*Quarum quæ media est non est habitabilis æstu,  
Nix tegit alta duas.*

Vult enim id ipsum Plinius, non habitari videlicet has extimas ob nimium gelu; & illam mediam, ob æstum nimium. Et quod magis magisque in admirationem nos trahat tanti authoris vulgum & poetarum excessus hac parte secuti, illud est, quod libro eodem capite anteriori ex Nepote præclare referat Eudoxū ex Arabiæ sinu egressum Gades usque navigio pervectum. Nam totum hoc iter, si ad calculum vocemus, complectitur id omne quod hodie Lusitani nostrique Caput Bonæ spei transgressi navigant bis nimirum equinoctialem, intra Zonam illam torridam, transeundo: ut omittam adferre quæ præterea ab eodem commemorantur lib. 6 cap. 23, quod nullo scilicet anno imperij Romani minus H. S. quingenties exhauriat India, merces mittendo, quæ apud Romanos centuplo veneant: Quodque annis omnibus è rubro mari navigetur ab iisdem Romanis, Sagittariorum cohortibus impositis: Nisi ad Plinij excusationem dicendum ea, quæ libro 2 dicuntur anteriori tempore literis ab ipso prodita; nec itinera tunc illa Romanis usque adeo familiaria existisse; præsertim cum referat libris sequentibus, nimirum lib. 6 cap. 23 item 17, totum ab Ægypto in Indiam cursum tunc, cum illa scriberet, certā notitiā patescere cœpisse; & Senecam paulo ante, tentata Indiæ commentatione, sexaginta annes ejus prodidisse, gentes duodeviginti centumque.

Sub torrida autem Zona commode habitari frugiferamque esse regionem, Sol præcipue causatur, qui ut 12 horarum dies, ita & noctes totidem horarum perpetuo facit: eaque noctes sub frigore dierum nimium æstum attemperant: Frigidam similiter utramque habitabilem esse eidem quoque Soli tribuendum; Nam in signis æstivis existens ijs, qui versus Boream sub grad. 84 agunt, nunquam occultatur cælique frigus suo calore hoc pacto dispellit.



## DE AMPHISCIIIS, HETEROSCIIS ET PERISCIIS.


**H**ABVM Zonarum incolas, ex diversa umbrarum ratione, in *Amphiscios, Heteroscios & Periscios* diviserunt. Qui inter duos *Amphiscij* Tropicos habitant, *Amphiscij* dicuntur, quod eorum umbræ meridianæ, nunc in Austrum (cùm Sol eorum verticibus Borealiore) nunc in Septentrionem (cùm Sol verticibus Australiore extiterit) projiciantur.

Qui inter Tropicos & circulum Arcticum degunt, *Heteroscij* nominantur: quod umbræ meridianæ vel in Austrum vel Septentrionem solum projiciantur. Sol enim ad Septentrionem æstivi nostri Tropici nunquam accedit, neque ad Austrum Tropici hyemalis unquam progreditur. Itaque qui sunt Borealiores Tropico Æstivo, umbras semper mittunt in Septentrionem: qui Australiores Tropico hyemali, umbras meridianas in Austrum jaculantur.

Qui intra circulos Arcticum vel Antarcticum versus polos incolunt, *Periscij* vocantur, quia gnomones projiciunt umbras in orbem: quoniam Sol totâ diurnâ revolutione supra horizontem fertur.

Schema horum tale est:

SEPTENTRIO.



MERIDIES.

Duplex itaque est Zona heteroscia, Septentrionalis & Meridionalis. Septentrionalis comprehenditur inter Tropicum Cancræ & Arcticum Zone Periscia. Dicitur ἐτερόσκια, septentrionalis, quia in ea radij Solares projiciunt umbram meridianam in eam tantum mundi partem, quæ ad polum arcticum spectat. Meridionalis heteroscia continetur inter Tropicum Capricorni & circulum Antarcticum Zone periscia. Dicitur ἐτερόσκια meridionalis, quia in ea umbræ meridianæ, tantum in alteram mundi partem, polum Antarcticum versus, projiciuntur.

G 3

DE



TRACT. DE GLOB.  
DE PROPRIETATIBVS MED.  
VM ZONÆ TORRIDÆ IN-  
HABITANTIVM.

\* ad Cap. 3  
supra.

**Q**VI medium Zonæ torridæ inhabitant, sunt in sphaera recta, nam uterque mundi polus horizonti incumbit & Zenith ipsorum est in æquinoctiali, unde & phænomenorum proprietates hæ sunt: 1 omnes stellæ ipsis æqualiter oriuntur & occidunt, præter arcticum & antarcticum polum, ut ex Lerio iam modo \* demonstratum est; 2 perpetuum est illis æquinoctium. 3 solem habent bis verticalem, in principijs scil.  $\gamma$  &  $\alpha$ . 4 Sol Zodiacum peragrando, quantum in meridiano descendit à Zenith in austrum, tantundem etiam digreditur seu descendit ab eodem in Boream. 5 quatuor habent solstitia, duo verticalia, cum Sol est in punctis æquinoctialibus & duo lateralibus, cum Sol est in punctis solstitialibus. 6 illi quotannis geminas habent æstates Sole ad puncta æquinoctialia accedente, sic geminas quasi hiemes habent, sole nimirum prope tropicos accedente & versante. 7 quinque umbrarum differentias habent orientalem, occidentalem, meridionalem & perpendicularem. quapropter etiam inhabitatores huius plagæ amphiscij id est, utrinque umbras jacentes, appellantur.

PROPRIETATES HABITANTIVM SVB FINEM TORRIDÆ,

AD INITIVM SCILICET TEM-

peratæ Septentrionalis.

**Q**VI ad initium temperatæ Zonæ Septentrionalis vivunt, in sphaera obliqua sive sedente constituti sunt, ipsis enim polus mundi arcticus 23 grad. & semisse est elevatus, Zenithque eorum incidit in tropicum Cancræ, inde has proprietates habent: 1 omnes stellæ quas circulus arcticus ambitu suo continet sunt perpetuæ apparitionis, antarctico vero inclusæ perpetuæ occultationis; intermediae autem stellæ habent arcus diurnos inæquales nocturnis, exceptis eis, quæ in æquinoctiali existunt. 2 habent inæqualitatem dierum & noctium artificialium. 3 Sol in anno semel ipsis fit verticalis, nempe in principio cancræ, ergo in meridiano circulo nunquam ultra Zenith in boream ascendit, sed extra principium cancræ semper austrinus est. 4 duo habent solstitia, unum sublime sole existente in principio cancræ, alterum humile, quando sol est in principio Capricorni. 5 unam similiter æstatem & unam hiemem habent. 6 quatuor habent umbrarum differentias, orientalem, occidentalem, borealem & perpendicularem. Hic incipiunt Heteroscij.

PRO-



# PROPRIETATES HABITANTIVM IN ZONA TEMPERATA

## SEPTENTRIONALI.

**Q**V i habitant in obliqua sphaera, ita ut elevatio poli arctici major sit quam 23 gradibus & semisse, minor tamen quam 66 gr. & semisse, ipsis Zenith seu punctum verticale semper intra tropicum canceri & circulum arcticum interjectum est, unde has proprietates nanciscuntur. 1 plurimae stellae ipsis semper conspicuae manent, quanto enim altius attollitur polus, tanto plures stellae casui obnoxiae esse desinunt, totidem vicissim opposita parte perpetuo latentibus. 2 habent inaequalitatem dierum & noctium artificialium. 3 Sol illis nunquam est verticalis, sed in meridiano ipsis semper est australis. 4 unam aestatem unamque hiemem & duo solstitia habent. 5 tres umbrarum differentias experiuntur, orientalem, occidentalem & Septentrionalem: unde & heteroscij dicuntur.

*Proprietates habitantium sub finem zonae temperatae, ad initium scil. frigidae Septentrionalis.*

**Q**V i circa finem Zonae temperatae Septentrionalis vivunt, ipsis polus arcticus elevatus est 66½ grad. inciditque illorum Zenith in arcticum circulum, unde sequentes proprietates habent: 1 omnes stellae, quae Tropico canceri usque ad polum mundi arcticum includuntur, sunt perpetuae apparitionis, & contra qui includuntur tropico Capricorni versus antarcticum polum, sunt perpetuae occultationis. 2 Sole existente in principio Canceri habent diem artificialem 24 horarum, & in principio Capricorni ejusdem longitudinis noctem. 3 Sol semper australis in Meridiano conspicitur, sed in principio Canceri existens & ad horizontem delatus etiam Septentrionalis apparet. 4 duo illis solstitia, altum in 69, humile in 75, unam aestatem unamque hiemem habent. 6 quatuor umbrarum differentias comperiunt, orientalem, occidentalem, meridionalem: & Septentrionalem existente praesertim sole in principio Canceri. His locis desinunt Heteroscij & incipiunt Periscij.

*Proprietates habitantium intra Zonam frigidam Septentrionalem sub polo scil. Arctico.*

**Q**V i medium Zonae frigidae Septentrionalis inhabitant, ipsis constitutio sphaerae est parallela sive stans. nam aequinoctialis ipsorum horizonti unitur, unde his proprietatibus fruuntur: 1 nullae illis stellae oriuntur aut occidunt, sed omnes quaecunque sunt ab aequinoctiali boreales usque ad ipsum polum, rotantur circulis tam horizonti quam aequinoctiali parallelis. 2 integro fere semestri,



meſtri, dum ſcilicet Sol ſigna Zodiaci borealia perambulat, dies ipſis eſt; nox vero perpetua, dum idē Sol ſigna meridionalia abſolvit. 3. unicum tantum ſolſtitium habent Sole nimitum in principio Cancrī exiſtente. 4. unam æſtatem & unam hyemem, vel potius æſtatis tempore tenuem frigoris remiſſionem ſentiunt. 5. umbra ipſis in orbem circumfertur, & in omnes terræ partes æqualiter projicitur: unde periſcij quaſi circum umbratiles vocantur.

Atque hæc fuerunt proprietates Zonarum ſeptentrionalium, quæ ſi ad oppoſita cæli & terræ ſpatia referantur, illico etiam proprietates Zonarum meridionalium innotefcent: quicquid enim de una terræ medietate dicitur, id de altera quoque intelligendum eſt, ordine videlicet inverſo. Nam habitantes in medietate ſeptentrionali cum habent diem maximum, oppoſiti incolæ in meridionali medietate diem breviffimum habebunt, cum illi æſtatem, hi hyemem &c. Idemque intelligendum eſt de alijs quoque affectionibus, ut umbris, ortu occaſuque ſtellarum & ſimilibus.

## CAP. VI.

DE PERIOECIS, ANTŌECIS  
ET ANDIPODIBVS.

**T**EMPERATARVM Zonarum incolas, & comparatione ejusdem Meridiani paralleli ejusdem aut æqualis ad diverſas æquatoris partes, antiquiores Geographi ita diviſerunt, ut cuiſlibet habitationi in his plagis tres alias diverſas adjecerint, earumque incolas, *Periæcos*, *Antæcos* & *Antipodes* vocarunt.

*Periæci.*

*Periæci* degunt ſub eodem Meridiano, itemque parallelo, æqualiter ab Æquatore (ſed ab oppoſitis ejus punctis) diſcreti.

*Antæci.*

*Antæci* eundem Meridianum & æqualem parallelum, ab eodem Æquinoctialis puncto in diverſas partes æqualiter diſſiti, incolunt.

*Antipodes.*

*Antipodes* (qui & *Antichthones*) ſunt, qui ſub eodem Meridiano equali parallelo, in oppoſitas partes & ab oppoſitis ejus punctis æqualiter diſſiti, habitant, vel qui incolunt terræ partes è diametro oppoſitas.


Sunt itaque noſtri Periæci Antipodibus noſtri Antœci, noſtri Antœci Antipodibus noſtris Periæci: noſtri Periæci Antœcis noſtris ſunt Antipodes.

*Eorum cō-*

*parationes.*

Nobis cum noſtris Periæcis multa ſunt communia. Eandem temperatam incolimus. Hyemem, æſtatem, incrementa dierum & noctiū, eadem





eadem eodemque tempore habemus. Diversum hoc, quod quo tempore nobis media dies illuceat, Perioecis intempesta nox adest. Qui hoc etiam discriminis posuerunt, quod cum nobis Sol oritur, nostris Perioecis occidit, & è contrario; errores nobis suos conseripserunt. Ita enim fieret, ut cum dies nobis est longissimus, ijs esset brevissimus, quod à veritate alienissimum. Eundem etiam de Antœcis errorem commiserunt, cum eundem nobis & illis ortum & occasum Solis faciunt. Erroris causa fortassis: quod eundem horizontem nobis & Antœcis statuerunt, itemque Perioecis : nisi quod nos superum, illi inferum hemisphærium incolimus. Lapsus vel mediocriter in Astronomia exercitato indignissimus. Nobis & Antœcis hoc commune, quod media dies simul utrisque, itemque nox. Diversa hæc. Tempestates anni permutantur. Nostra æstas ipsorum hyems, noster dies longissimus ipsorum est brevissimus. Diversas Zonas temperatas incolimus. Nobis & Antipodibus omnia sunt contraria: dies, noctes, eorumque initia & fines, & anni etiam tempestates. Nam quo tempore Sol nobis æstatem

H

& diem



& diem maximum largitur, ipsis hyemem & noctes maximas, nobis cum oritur, illis occidit, & è conuerso. Nos enim superum, illi inferum ejusdem horizontis hemisphaerium, incolimus.

## CAP. VII.

DE CLIMATIBVS  
ET PARALLELIS.

Clima.

Parallelus.

**P**ro diversa maximorum dierum quantitate, Geographi totum terrarum orbem ab Æquatore utrinque ad Polos diuiserunt in *Climata & Parallelas*. *Clima* vocant terræ spatium comprehensum inter duo quævis loca, quorum dies longissimi semisse unius horæ differunt ab invicem. *Parallelum* dicunt spatium, quo dies maximi quarta horæ parte se excedunt, ita ut quodvis *Clima* duos parallelas complectatur. Sunt autem *Climata*, ut *Parallelas*, spatio inæqualia. Primum enim *Clima* (itemque *parallelus*) majus est secundo, secundum tertio.



tertio. In hoc conveniunt, quod æquales obtinent maximorum dierum differentias. Antiquiores numerabant Climata septem, alij duo adjecerunt: ut hinc paralleli oriantur quatuordecim, illinc octodecim. Ptolemæus per quadrantes horarum Parallelos numerat viginti quatuor: per integras horas, quatuor: per totos menses, sex. unde præter Æquatorem ab utraque parte triginta octo paralleli exsurgent.

In meridiano materiali horum Globorum novem signata sunt Climata, ad horarum semisses ad invicem distantia. Deinde notata sunt ulterius discrimina dierum per integras horas, postea ad usque Boreum polum per totos menses, ad suâ quæque latitudinē expressa.

Singulorum Climatum & Parallelorum latitudines ab Æquatore, distantias ab invicem, & maximorum dierum longitudes, sequens tabula indicabit.

| m. sec. |    |    | m. sec. |    |    | m. sec. |    |    | m. sec. |    |    |
|---------|----|----|---------|----|----|---------|----|----|---------|----|----|
| 1       | 59 | 59 | 24      | 54 | 48 | 47      | 40 | 55 | 70      | 20 | 31 |
| 2       | 59 | 57 | 25      | 54 | 22 | 48      | 49 | 9  | 71      | 19 | 31 |
| 3       | 59 | 55 | 26      | 53 | 55 | 49      | 39 | 22 | 72      | 18 | 31 |
| 4       | 59 | 51 | 27      | 53 | 27 | 50      | 38 | 34 | 73      | 17 | 31 |
| 5       | 59 | 46 | 28      | 52 | 58 | 51      | 37 | 46 | 74      | 16 | 31 |
| 6       | 59 | 40 | 29      | 52 | 28 | 52      | 36 | 56 | 75      | 15 | 30 |
| 7       | 59 | 33 | 30      | 51 | 57 | 53      | 36 | 6  | 76      | 14 | 28 |
| 8       | 59 | 25 | 31      | 51 | 25 | 54      | 35 | 16 | 77      | 13 | 26 |
| 9       | 59 | 15 | 32      | 50 | 52 | 55      | 34 | 24 | 78      | 12 | 24 |
| 10      | 59 | 5  | 33      | 50 | 18 | 56      | 33 | 32 | 79      | 11 | 22 |
| 11      | 58 | 53 | 34      | 49 | 44 | 57      | 31 | 40 | 80      | 10 | 20 |
| 12      | 58 | 41 | 35      | 49 | 8  | 58      | 31 | 47 | 81      | 9  | 18 |
| 13      | 58 | 27 | 36      | 48 | 32 | 59      | 30 | 53 | 82      | 8  | 16 |
| 14      | 58 | 13 | 37      | 47 | 55 | 60      | 29 | 59 | 83      | 7  | 14 |
| 15      | 57 | 57 | 38      | 47 | 17 | 61      | 29 | 5  | 84      | 6  | 12 |
| 16      | 57 | 40 | 39      | 46 | 38 | 62      | 28 | 10 | 85      | 5  | 10 |
| 17      | 57 | 22 | 40      | 45 | 58 | 63      | 27 | 14 | 86      | 4  | 8  |
| 18      | 57 | 3  | 41      | 45 | 17 | 64      | 26 | 18 | 87      | 3  | 6  |
| 19      | 56 | 43 | 42      | 44 | 35 | 65      | 25 | 22 | 88      | 2  | 4  |
| 20      | 56 | 22 | 43      | 43 | 52 | 66      | 24 | 24 | 89      | 1  | 2  |
| 21      | 56 | 0  | 44      | 43 | 8  | 67      | 23 | 16 | 90      | 0  | 0  |
| 22      | 55 | 37 | 45      | 42 | 24 | 68      | 22 | 28 |         |    |    |
| 23      | 55 | 13 | 46      | 41 | 40 | 69      | 21 | 30 |         |    |    |



| Clima-<br>ta. | Paral-<br>leli. | Dies Æsti-<br>vales.<br>Hor. Scr. | Latitudo.<br>Gra. Scr. | Intervalla<br>Climatum<br>Gr. Scr. |
|---------------|-----------------|-----------------------------------|------------------------|------------------------------------|
|---------------|-----------------|-----------------------------------|------------------------|------------------------------------|

|            |   |   |       |       |      |
|------------|---|---|-------|-------|------|
| Amphiscij. | 0 | 0 | 12 0  | 0 0   | 4 18 |
|            | 1 | 1 | 12 15 | 4 18  |      |
|            | 2 | 2 | 12 30 | 8 34  | 8 25 |
|            | 3 | 3 | 12 45 | 12 43 |      |
|            | 4 | 4 | 13 0  | 16 43 | 7 30 |
|            | 5 | 5 | 13 15 | 20 33 |      |
|            | 6 | 6 | 13 30 | 23 10 | 7 3  |
|            | 7 | 7 | 13 45 | 27 36 |      |

|    |    |       |       |      |
|----|----|-------|-------|------|
| 4  | 8  | 14 0  | 30 47 | 6 9  |
|    | 9  | 14 15 | 33 54 |      |
| 5  | 10 | 14 30 | 36 30 | 5 17 |
|    | 11 | 14 45 | 39 2  |      |
| 6  | 12 | 15 0  | 41 22 | 4 30 |
|    | 13 | 15 15 | 43 32 |      |
| 7  | 14 | 15 30 | 45 29 | 3 48 |
|    | 15 | 15 45 | 47 20 |      |
| 8  | 16 | 16 0  | 49 1  | 3 13 |
|    | 17 | 16 15 | 50 33 |      |
| 9  | 18 | 16 30 | 51 58 | 2 44 |
|    | 19 | 16 45 | 53 17 |      |
| 10 | 20 | 17 0  | 54 29 | 2 17 |
|    | 21 | 17 15 | 55 34 |      |
| 11 | 22 | 17 30 | 56 37 | 2 0  |
|    | 23 | 17 45 | 57 34 |      |
| 12 | 24 | 18 0  | 58 26 | 1 40 |
|    | 25 | 18 15 | 59 14 |      |
| 13 | 26 | 18 30 | 59 59 | 1 26 |
|    | 27 | 18 45 | 60 40 |      |
| 14 | 28 | 19 0  | 61 38 | 1 13 |
|    | 29 | 19 15 | 61 53 |      |



# ET EORVM VSV PARS I.

37

| Clima-<br>ta. | Paral-<br>leli. | Dies Aesti-<br>vales.<br>Hor. Scr. | Latitudo.<br>Gra. Scr. | Intervalla<br>Climatū.<br>Gr. Scr. |
|---------------|-----------------|------------------------------------|------------------------|------------------------------------|
|---------------|-----------------|------------------------------------|------------------------|------------------------------------|

Heteroscij.

|    |    |       |       |      |
|----|----|-------|-------|------|
| 15 | 30 | 19 30 | 62 25 | I I  |
|    | 31 | 19 45 | 62 54 |      |
| 16 | 32 | 20 0  | 63 22 | 0 52 |
|    | 33 | 20 15 | 63 46 |      |
| 17 | 34 | 20 30 | 64 6  | 0 44 |
|    | 35 | 20 45 | 64 30 |      |
| 18 | 36 | 21 0  | 65 49 | 0 36 |
|    | 37 | 21 15 | 65 6  |      |
| 19 | 38 | 21 30 | 65 21 | 0 29 |
|    | 39 | 21 45 | 65 35 |      |
| 20 | 40 | 22 0  | 65 47 | 0 22 |
|    | 41 | 22 15 | 65 57 |      |
| 21 | 42 | 22 30 | 66 6  | 0 17 |
|    | 43 | 22 45 | 66 14 |      |
| 22 | 44 | 23 0  | 66 20 | 0 11 |
|    | 45 | 23 15 | 66 25 |      |
| 23 | 46 | 23 30 | 66 28 | 0 5  |
|    | 47 | 23 45 | 66 30 |      |
| 24 | 48 | 24 0  | 66 31 | 0 0  |

Menses.

Periscij.

|   |       |
|---|-------|
| 1 | 67 15 |
| 2 | 69 30 |
| 3 | 73 20 |
| 4 | 78 20 |
| 5 | 74 0  |
| 6 | 90 0  |

H 3

SECVN.



# SECUNDA PARS.

## CAPVT I.

### DE IIS QUÆ PROPRIA SVNT COELESTI GLOBO, AC PRI- MO DE PLANETIS.



ACTENVS, quæ utriusque Globi sunt communia. Sequuntur quæ cuique sunt peculiaria & propria, ac primo, quæ coelesti : ut sunt stellæ in suos Asterismos atque constellationes efformatæ.

Stellarum autem in coelo lucentium duo genera deprehenderunt, qui primorum coelestium motus attentè observarunt. Primum est Planetarum, secundum stellarum Fixarum. Planetas sive errantes ideo vocarunt, quia nec ad invicem, nec ad eas quæ fixæ nominantur, eundem situm vel positionem semper obtinent. Fixas autem eundem inter se situm, semper tenere, Ptolemæus, collatis suis observationibus cum ijs quæ ab Hipparcho tradita sunt, multis exemplis comprobavit c. 1. l. 7. Almag.

Dividuntur stellæ in *fixas* & *errantes* seu *Planetas*, non quasi propriæ illæ immobiles & fixæ, hæ mobiles & vagæ atque erraticæ sint, sed comparate ea omnia ut dicuntur, ita etiam accipienda sunt. Nam dum stellæ fixæ distantiam, situm & ordinem inter se suum licet assidue aspectu primi mobilis circumagatur, servant, planetæ verò excepto motu, quem cum primo mobili communem habent cum eadem omnia cum inter se, tum ad fixas immutent & varient, eas fixas, hos planetas dixerunt. Nam aliàs per se & singuli planetarum si seorsim considerentur, nihil eorum motibus & periodis est certius, adeò ut huc respiciens Cicero planetas seu errantes dictos velit per antiphrasin quasi minime errantes.

Planetas præter duo Luminaria (Solem inquam & Lunam) quinque numerant. Hi præter motum diurnum, quo ab ortu ad occasum feruntur, secuti raptum primi mobilis, liberum habent & proprium quisque



quisque motum quo contra ab occasu ad ortum, secundum successi-  
onem signorum, super polis Zodiaci feruntur, quem suo quisque mo-  
do & tempore absolvit. Eorum ordo motuumque periodus sic ha-  
bet.

Saturnus,  $\kappa\rho\acute{o}\nu$  &  $\phi\acute{\alpha}\iota\nu\omega\nu$  (Iulius Higinus stellam Solis vocat) om-  
nium Planetarum supremus, maximo ambitu circulo non tamen (ut in-  
de coniecit Plinius) ideo minimus videtur. Periodum absolvit 29. an.  
5. mens. 15. dieb. ut Alfragano placet.

Iupiter,  $\zeta\epsilon\upsilon\varsigma$  &  $\phi\acute{\alpha}\epsilon\theta\omega\nu$ ; Zodiacum percurrit an. 11. men. 10. dieb. 16.  
fere.

Mars  $\alpha\rho\eta\varsigma$  &  $\mu\upsilon\rho\omicron\epsilon\iota\varsigma$  (quod & Herculis sidus quidam vocant) duo-  
bus annis conficit suum cursum.

Sol  $\eta'\lambda\iota$  uno anno, hoc est diebus 365 & quarta parte paulo mi-  
nus, suam facit conversionem.

Venus,  $\alpha\phi\rho\omicron\delta\iota\tau\eta$ ; quam alij Iunonis, alij Isidis, alij matris Deum no-  
mine appellavere; cum præcedit Solem, præveniens & ante matutinū  
exoriens,  $\phi\acute{\omega}\sigma\phi\omicron\rho$  Lucifer nominatur, ut alter Sol diem maturans:  
cum subsequitur, ab occasu refulgens, & prorogans Lucē, vicem Lu-  
næ reddens,  $\epsilon'\sigma\pi\epsilon\rho$  Vesper nuncupatur. Quam ejus naturam Py-  
thagoras Samius primus deprehendit, Olympiade circiter xxxi i. co-  
dem attestante Plinio. lib. 2. cap. 8. Peragit autem cursum suum, annuo  
item, ut proximè, spatio. Neque, ut Timæo placuit, unquam recedit à  
Sole amplius 46 grad. Recentiores multo liberaliores, duobus signis  
vel 60 gradibus nunquam à Sole discedere affirmant.

Mercurius  $\epsilon\rho\mu\eta\varsigma$  &  $\sigma\tau\acute{\iota}\lambda\beta\omega\nu$ ; à quibusdam Apollinis Sidus appella-  
tum, anno etiam uno signiferum lustrat: & ut Timæo & Sosigeni pla-  
cet, nunquam remotior à Sole 25. grad. ut recentioribus videtur, non  
amplius unius signi intervallo sive partibus 30 absistit à Sole.

Luna  $\sigma\epsilon\lambda\eta\gamma\eta$ ; infima Planetarum, suam periodum absolvit diebus  
27. hor. 8. paulo minus. Hujus varias  $\phi\acute{\alpha}\sigma\epsilon\iota\varsigma$  & figuras, (quod interdum  
curvata in cornua, modo equā portione divisa, modo sinuata in orbem  
aliàs pleno orbe conspicitur, aliàs prorsus nulla) & cæteras hujus Si-  
deris diversitates, primus (inquit Plinius) deprehendit Endymion, ide-  
oque Lunæ amore captus famâ traditur.

Feruntur Planetæ omnes orbibus ad terram eccentricis, hoc est,  
quorum centra à terræ centro diversa sunt. Horum orbium semidia-  
metri ad semidimetientem terræ comparati, habent rationem.

Qualium



|   |   |           |             |
|---|---|-----------|-------------|
| Qualium semidiameter terræ est 1. taliū semidiameter orbis. | { | Lunæ.     | 48.56.m.    |
|   |   | Mercurij. | 116. 3.m.   |
|   |   | Veneris.  | 641.45.m.   |
|   |   | Solis.    | 1165.23.m.  |
|   |   | Martis.   | 5032. 4.m.  |
|   |   | Iovis.    | 11611.31.m. |
|   |   | Saturni.  | 17225.16.m. |

Eccentricitates orbium comparatæ ad ipsos orbis, sic habent.

|   |   |           |                 |
|---|---|-----------|-----------------|
| Qualium semidiameter deferētis est 60 talium eccentricitas. (Maurolic. ex Alfon.) | { | Lunæ.     | 12.28.m.30.sec. |
|   |   | Mercurij. | 2. 0.m.         |
|   |   | Veneris.  | 1. 8.m.         |
|   |   | Solis.    | 2.16.m. 6.sec.  |
|   |   | Martis.   | 6. 0.m.         |
|   |   | Iovis.    | 2.45.m.         |
|   |   | Saturni.  | 3.25.m.         |

Eccentricitates quorundam Planetarum (præcipuè Solis) à Ptolemæi ætate imminutas decrevisse deprehensum est. Eccentricitatem Lunæ Ptolemæus 12. grad. 30. m. definivit, Alfons. 12. gr. 28. & dimid. m. Veneri Ptolemæus tribuit eccentricitatis 1. grad. 15. m. Alfon. 1. gr. 8. m. Eccentricitatem Solis Ptolemæus ex suis & Hipparchi etiam observatis deprehendit 2. gr. 30. m. Alfons. 2. gr. 16. & decima parte m. Anno 1312 deprehensa est 2. gr. 2. m. 18. sec. Copernicus invenit ulterius etiam imminutam 1. gr. 56. m. 11. sec. Vt immeritò hac de causa Copernici scripta spongijs, vel autorem scuticis dignum censeat illustrissimus Iulius Scaliger, iniquior quàm par est in Copernicum.

Præter eccentricitates orbium Planetarum observatu digna est eorum magnitudo. Hæc in cognitione præsertim diametrorum consistit. Diameter enim planetæ confertur cum diametro Terræ in modum ut sequitur:

|          |   |                                     |   |    |    |    |
|----------|---|-------------------------------------|---|----|----|----|
| Diameter | { | ad Terræ diametrum semper habet uti | { | 9  | ad | 2  |
|          |   |                                     |   | 32 | ad | 7  |
|          |   |                                     |   | 7  | ad | 6  |
|          |   |                                     |   | 11 | ad | 2  |
|          |   |                                     |   | 3  | ad | 10 |
|          |   |                                     |   | 1  | ad | 28 |
|          |   |                                     |   | 5  | ad | 17 |

Diameter



Diameter Solis ad diametrum Lunæ est ut 187 ad 10.

Porro ut exemplo, quod dicimus, demonstretur, Esto Sol, qui, ut positum, habet diametrum ad Terræ diametrum, sicut 11. ad 2. Cubus igitur Solis est 11. Cubus Terræ est 2. Iam diametris cubice multiplicatis, & maiore cubo per minorem diviso, emergit differentia globorum Solis & Terræ. Si multiplicaveris enim 11 per 11 emergunt 121. Hunc factum si iterum multiplicaveris per 11 factus erit 1331. Multiplica duo cubice, id est, per se ipsum, fac. 4. jam hunc factum iterum multiplica per primum, id est 4 per 2 fient 8. Iam divide 8 per maiorem cubum, nimirum 1331, provenient 166 $\frac{2}{3}$ . Quæ erit differentia globorum Solis & terræ.

Haftenus de Planetis. Fusiùs tractantur à Ptolemæo, Copernico, & ijs qui Planetarum Theorias conscripserunt. Prolixior eorum tractatio aliena à nostro instituto : cùm in Globis propter erraticum & vagantem eorum motum depingi non possint. Hæc obiter dicta sint.

## CAPUT II.

DE STELLIS FIXIS  
ET EORVM EFFOR-

MATIONIBVS.

**S**equuntur stellæ Fixæ suis Asterismis expressæ, sive formis & constellationibus, si malis. Plinius Signa & Sidera vocat. De numero harum constellationum, figurâ item & nominibus, stellarum etiâ numero, quæ cuique tribuuntur, dissentiunt autores. Plinius numerum 72 Signorum agnoscit lib. 2. cap. 41. Ptolemæus, Alfraganus & qui secuti (ut plurimum) constellationes 48 enumerant. Alij unum & alterum adjiciunt: Cincinnum sive Crinem Berenices, & Antinuum. Germanicus Cæsar & Festus Avienus Rufus, Aratum secuti, pauciores faciunt. Iulius Higinus 42 statuit: Serpentem cum Ophiuchô conjungit: Præcisionem equi vel Equiculum prætermittit: Libram Signis non annumerat: Scorpionem in duo dividit: quod præterea multi faciunt: Corvum, Feram & Coronam Australem, suis constellationibus non annumerat; obiter solum meminit. Taurum, quem Ptolemæus, ante eum Hipparchus & plerique secuti dimidiâ parte conspiciunt fecerunt: Vitruvius, Plinius & ante hos Nicander (ut Theonipacet Arati Scholiasti) integrum faciunt, & Pleiades in ejus cauda statuunt. De numero stellarum quæ cuique Imagini tribuuntur, plurimum



mum à Ptolemæo dissentiunt Iul. Higinus, Commentator Germanici, (sive is Bassus sit, ut Philander vocat, sive ab ipso Germanico conscripta sint ea Commentaria, ut è Lactantio alij volunt) quandoque Theon in Commentarijs Arateis, semel & iterum Alfraganus. Si causam, cur his nominibus, Constellationes insigniantur, aliam quæris, præter hanc quod stellarum positio has formas quodammodo exprimit, legas Bassum & Iulium Higinum, abundè è Græcorum fabulis de hoc argumento disputantes. Hipparchum primum nomina, magnitudines & loca stellarum posteris tradidisse, Plinius sua fide refert. Sed iisdem ante Hipparchum nominibus, Timochares, Aratus, Eudoxus, usi sunt. Neque enim Hipparchus Arato antiquior, ut Theon voluit. Alter floruit anno ccccx ab initio Olympiadum, ut palam est ex ejus vita à Græco scriptore tradita. Hipparchus autem vixit post annum dc. à principio Olymp. ut ejus observationes à Ptolemæo traditæ testari poterunt, præterquam quod Hipparchi nomine extant Commentaria quædam in Eudoxi & Arati Phænomena, nisi hæc Commentaria ab Eratosthene (ut alijs videtur) conscripta sunt, qui Hipparchi tempora antecessit.

De Hipparcho quod dicitur non ulterius capiendum quam de ratione stellarum, quæ vel primæ vel secundæ vel tertiæ magnitudinis sunt. Ita enim Servius ad 1 librum Georgicor: *Hipparchus*, inquit, *scripsit de signis & commemoravit etiam unumquodque signum quot claras, quot secundæ lucis, quot obscuras stellas habeat*. Nam aliàs nomina stellarum diu ante Hipparchum, id est, mille & ultra annis usurpata vel ex Seneca intelligi potest, qui lib. 7 Natural. Quæstion. cap. 25 ita ait: *Nōdum sunt anni mille quingenti ex quo Græcia stellis numeros & nomina fecit*. At Seneca anno Christi 65 jussu Neronis interfectus est: Hipparchus autē ante Christum anno 283 sub Ptolomeo Philadelpho adhuc floruit. Quin & Iobus, quē generū Iacobi ex Dina uxore Philo Iudæus facit, *Arcturum, Pleiades & Orionem* nominat, interprete Hieronymo capite 9. vers. 9. *Qui facit*, inquit, *Arcturum, Orionem et Pleiades ac penetrat in Austri sidera*. Et Amos propheta cap. 5 vers. 8, *Quærite opificem Pleiadum & Orionis &c*. Verisimile autem est duo fuisse hominum genera, qui stellas in asterismos redegère, *Agricolas & nautas*: Ab agricolis sunt *Aries, Taurus, spica virginis, Capricornus, Auriga, Heniochus, Capella, Hædi, plaustrum*, Homero etiam nota nomina. A nautis *Pleiades, Hyades, Navis, Cete* & similia, juxta illud Maronis 1 Georg.

*Navita tum stellis numeros & nomina fecit.*

*Pleiades, Hyades clarumque Lycaonis astrum.*

Et hodie quoque quæ sunt versus polum Antarcticum asterismorum nunc nota nobis vocabula quibus nisi navicatoribus Lusitanis & Belgis nostratibus



bus debemus? Non autem audiendi sunt, qui hæc usitata constellationum nomina prorsus damnant, quasi a Christianis non sine detrimento Christianæ religionis usurpari queant. Nam cum absque superstitione hodie usurpentur, tum & magna earundem nomenclationum necessitas est, quia sine illis disciplinarum atque artium consensus atque harmonia retineri nequit. Sunt enim hæc vocabula ubivis gentium ac terrarum in artium præsertim explicatione jam recepta atque usitata. His itaque utamur dum vera nomina, quibus opifex supremus unamquamque stellarum nuncupavit, ut David testatur psal. 146, nobis prorsus sint incomperta. De Arabibus autem qui rejectis humanis figuris, ferinas substituerunt, vide Ios. Scaligerum in Sphæram Manilij.

¶ *Stellas Fixas effectu insignes 1600 annumerari dixit Plin. lib. 2. c. 41. quorum autoritate & fide suffultus, nondum cognoscere potui: cum Ptolemæus 1022 in universum posuerit, annumeratis etiam ijs, quæ sporades, vagæ & informes nominantur. Quas splendoris magnitudine & claritate in sex ordines distribuit: ut sint primæ magnitudinis xv, secundæ xlv, tertiæ ccviii, quartæ cccclxxiv, quintæ ccxvii, sextæ xlix: quibus obscuras ix, & nebulosas v addere oportet. Has omnes suis quasque imaginibus expressas & magnitudinibus, adjectis etiam nominibus, quibus à Græcis & Latinis appellantur, (nonnullis etiam, quibus Arabes utuntur nominibus, appositis) in Globo cœlesti depictas videas.*

Quemadmodum vero supra magnitudines planetarum ex diametris illorum collatis cum Terræ diametro intelligi posse monstravimus; ita & stellarum quoque fixarum magnitudo cognoscitur. Cujus rei ejusmodi schema esto,

|  |   |   |   |   |   |     |    |    |   |
|--|---|---|---|---|---|-----|----|----|---|
| Diameter<br>stellarum<br>magnitu-<br>dinis | { | 1 | { | <i>ad Terræ<br/>diametrum<br/>se habet,<br/>ut,</i> | { | 119 | ad | 4  | { |
|  |   | 2 |   |   |   | 269 | ad | 60 |   |
|  |   | 3 |   |   |   | 25  | ad | 6  |   |
|  |   | 4 |   |   |   | 19  | ad | 5  |   |
|  |   | 5 |   |   |   | 19  | ad | 36 |   |
|  |   | 6 |   |   |   | 21  | ad | 8  |   |

stellas porro fixas Ptolemæo & veteribus in plaga Austrina incognitas, ac postmodum a Lusitanis ac nostris certis vocabulis insignitas, suo quasque loco mox dicemus.

Has omnes constellationes) adjectis appellationibus Arabicis, partim ex Alfragano, partim ex Scalig. comment. in Manil. & Grotij notis ad Arati Imagines, præcipuè ut Iacobus Christmannus ex Epitome Arabica Almagesti Ptolemæi nobis tradidit) suo ordine enumera-



bimus. Qui autem fusio rem tractatum desiderat, consulat 7 & 8 l. Almag. Ptol. Copernici Revolutiones cœlestes, & Erasmi Reinolt Tabulas Prutenicas: ubi singulæ Stellæ numerantur, suâ cuique longitudine, latitudine & magnitudine adjecta.

Videndus & Christoph. Clavius in 1 Caput Sphæræ Ioh. de sacro Bosco pag. 168; Et, præter omnes, præcipue Tycho Brahe; qui libro de stella nova anni 1572 juxta proprias & accuratas cœlitus deductas observationes inerrantium stellarum omnium quotquot nostro in Climate commode conspici possunt canonicas tabulas proposuit pag. 258 & sequentibus.

Sed hoc observandum est, quod Copernicus & Erasmus Reinoldus longitudes stellarum numerât à prima stella Arietis, Ptolemæus ab ipsa intersectione æquatoris & eclipticæ. Neque enim rectè monet Victorinus Strigelius, Ptolemæum numerare stellarum fixarum longitudes à prima etiam Arietis stella.

## CAP. V. T. III.

HEMISPHERII BOREALIS  
CONSTELLATIONES.

**V**rsa minor. Arabibus *Dub Alasgar*, hoc est, Vrsa minor, & *Al-rucaba* quod plaustrum significat: hoc tamen nomen tributum est extremæ illi in cauda, quæ nostris temporibus stella nominatur Polaris, utpote quia polo vicinissima. Duæ sequentes in cauda, Græcis *χορευται* quasi ludentes. Duas lucidiores in anteriori corporis parte *Alferkathan* Arabes vocare docet Alfraganus. Stellæ numerat vii. & una est prope hanc informis. *Thales* constellationem hanc primus reperit, & canem vocavit, ut docet Theon Arati Scholiastes.

2. Vrsa major *Dub Alacher*, quæ in dorso prima est, numero autem 16. Vocatur *κατ' ἐξοχήν Dub*. & quæ in ilibus, numero 17 *Miraë*, potius ut Scaligero placet *Mizar*, quod significat locum præcinctionis, prima in cauda, 25. numero, *Alfonsinis Aliore*, Scal. *Aliath*. Huc Asterismum Nauplium invenisse Theon asserit. Stellæ habet 27. Theoni 24. Vtrunque Vrsam, ut testatur Aratus, Græci *ἀμαζαν* hoc est currum vocarunt. At propriè 7 lucidiores ursæ majoris, quæ currus figurant gerunt, *ἀμαζα* dicitur. Has Arabes *Beneth As* vocant, h. e. filias feretri, ut Christmann docet: corruptè legunt *Benenas*, & ad extremam caudæ re-



dæ retulerunt : alij autem legunt *Benethasch*, quod filium ursæ significare volunt. Majorem ursam in navigationibus Græci observarunt, unde ἐλκωπας vocavit Homerus, ut Theoni videtur, ursam enim majorem ἐλκην Græci dixerunt: minorem Phœnices secuti sunt, ut testatur Aratus.

3. Draco. Arabes *Atanin* vocant, & frequentius *Aben*. Scal. legit *Taben*. unde quintam numero, quæ est in capite, vocat *Rastaben* quæ vulgo dicitur *Rasaben*. Huic annumerantur stellæ 31.

4. Cepheus *Alredaf*. Huic præter duas informes prope Tiaram, stellas tribuerunt xi: quarum quæ numero est 4<sup>a</sup> dicitur *Alderaimin*, hoc dextrum brachium significat, vocatur etiam hæc constellatio Arabibus *Phicares*, & Flammigerum interpretantur, fortè à Græco πυρκαῖς deductum.

5. Bootes, Βούτης, Bubulcus, sed Arabes, quasi scriptum esset Βοωτής, quod est clamator, vocarunt *Alhava* hoc est vociferator & *Alsamech alramech*, hoc est, deferens lanceam. Hujus inter crura micat stella informis primæ magnitudinis, Græcis itemque Latinis *Arcturus*, Arabibus. *Alramech*, vel stella lucidissima *Somech haromach*. A Theone in medio Zonæ vel cinguli locatur. Stellis 22 constat hæc Imago.

Arcturi meminit Iobus, interprete Hieronymo & alijs, qui septuaginta appellantur, cap. 9. vers. 9, quomodo & supra innuimus. In ipso autem Hebræo textu *gnasch* sive *asch* dicitur, à voce *gnus*, quod est, congregabit. Notat in Onomastico suo Hesychius *Booten* à quibusdam etiam *Orionem* appellari. Quo & illum Manilij versum

*Arctos & Orion adversis frontibus ibant*

trahendum existimat H. Grotius in Notis ad Arati imagines cælestes. Quin & totum Bootem sive Arctophylacem dici Arcturum, quia ἄρξ & Φυλαξ idem notant, observat ad Manilium Scaliger. Hebræi vero quod Arcturum, ut dixi, à congregatione appellant, inde esse putem, quod ursam majorem secum jungat. Est enim stella post caudam ursæ majoris, unde & nomen habere videtur, quasi ἄρξ & Φυλαξ. Unde & Plinius cap. 41 lib. 2: *Bootes sequitur septentriones*.

6. Corona Borea. Arabes vocant *Aclilaschemali*. Lucida, quæ est, quâ parte corona est solubilis, & est numero 1, dicitur *Alphecca* id solutionem significat: dicitur & *Munir*. id omnibus lucidis stellis commune. Stellas habet 8.

7. Hercules *Alcheti hale rechabateh*, hoc est, procidens in genu suū, & simpliciter *Alcheti*: est enim laboranti & defatigato similis (ut vult Aratus, inde latinis Nisus vel Nixus (quod apud Vitruviū in Neffes



malè transformatū) & Græcis ἐν γόνατι quod est ingeniculatus. Hujus numero 1<sup>a</sup>. quæ est in capite, dicitur *Rasalchti*, malè Alfonso *Rasaben*. Quæ 4<sup>a</sup> est, dicitur *Marsic*, rectius *Marsic* quod est reclinatorium, pars Brachij qua innitimur. 8<sup>a</sup> numero, quæ est ultima trium in lacerto, dicitur *Maẏim* vel à fortitudine *Maasim*. Stellæ habet 8 præter eam, quæ in extremitate pedis dextri, communis Bootæ & unam informem ad dextrum brachium.

8. Lyra *Schaliaf* & *Alvakah*, hoc est, cadens scil. vultur, constat Stellis 10 Hippar. & Ptolemæo. Timochares 8 tribuit, ut Theon asserit. Alfraganus 11. Hujus lucida, numero prima, Alfonso *Vega* dicitur.

9. Gallina, *Cygnus*, *Aldigaga* & *Altayr*, hoc est, volans sc. vultur, huic dederunt, præter informes duas prope alam sinistram, stellæ 17, quarum 5<sup>a</sup> vocatur *Deneb adigege*. i. cauda gallinæ, & peculiari nomine *Arided*, quod interpretantur quasi redolens lilium.

Notabile & observatu hoc loco haud indignum est, novam in pectore cygni stellam anno 1600 observatam, quæ multorum exinde mathematicorum curas exercuit. Inter cæteros, præter Iustum Byrgium Cæsareæ majestatis automato-  
pæum, Iohannem Beierum, Mæstlinum aliosque. Iohannes Keplerus discipulus olim Tychonis Pragæ tractatum super eâ edidit, postquam jam sexenium eundem in pectore cygni locum tenuisset, magnitudinis quasi tertiæ.

10. Cassiopeia *Dhath Alcurfi*, hoc est, domina sellæ, stellæ numerat 13, quarum 2<sup>a</sup> Alfonso *Scheder*, Scal. *Seder*, quod pectus significat.

In asterismo quoque Cassiopeie novum sidus primæ magnitudinis apparuit anno 1572 Novemb. 11; fulsitque menses undecim. Variorum de eo varia fuerunt judicia. Omnium tamen eo propemodum sententia redijt, in ipso æthere orbis lactei ad oram Cassiopeie sedem fixisse. Qui accuratius observaverant (quos inter illustris ille Tycho Brahe fuit, qui & ingens volumen, plenum accuratissimis observationibus, de eodem confecit) uno omnes ore asseverabant, nec paralaxim nec ullum inter verum & apparentem stellæ locum discrimen a se animadversum, ut omittam, quod iidem addebant, sub eodem octavæ sphæræ situ perpetuo constitisse. Vnde manifesto arguuntur ij, qui nullam à prima creationis die novam in cælo stellam exortam volunt; quos inter Lambertus Danæus fuit *Physices Christianæ Tract. 4 cap. 10*. At non hujus solum ille meminisse debuerat, cum anno 1575 *Physicen* suam ediderit, sed & ejus, quam Hipparchus, teste Plinio, suo ævo in ipso quoque æthere deprehendit. Nam quod idem Danæus, stellam, quæ in nativitate Christi apparuit, vel cometam, vel unam ex ordinarijs stellis, quæ singularem cursum tenuit existimarit; prius admitti nō potest, cum stella diserte nominetur; nec alterum, locum habet, cum Magis & a-

terea

Lib. 2.  
cap. 6. Na-  
tural. hist.



tērea tamen hanc magorum stellam cum Hipparchicā illā, & de qua nunc diximus, anni 1572, plane fuisse eandem, sed peculiare quiddam & ab illis eximium habuisse, facile concesserim: De quo videndus uberius Tycho de nova stella pa. 319 & seqq.

11. Perseus *Chamil Res Algol* hoc est, deferens caput Algol vel Medusæ, quæ enim in summa sinistra manu spectatur, dicitur Arabib. *Ras Algol*; Hæbreis *Rosch hassatan*, quod est caput Diaboli. Huic præter tres informes attribuunt stellas 26, quæ autem 7<sup>a</sup> est numero, Alfonso *Alchemb*, pro *Alchenib*, vel *Algeneb*, ut Scal. vult, quod latus significat.

12. Auriga id est *Roha* & vocatur *Memaßich Alhanam*, hoc est, retinens habenas. Stellas habet 14. quæ autem in sinistro humero præluet, numero 3<sup>a</sup> Aïg Capra, Arabib. *Alhajok*, Scaligero *Alatod*, quod hircum significat, duæ verò quæ in manu sinistra 8<sup>a</sup> & 9<sup>a</sup> εϕοι hœdi, Alfonso. *Suclateni*, Scal. *Sadateni*, hoc est, brachiū sequens. hos primus inter sidera ostendit Cleostratus Tenedius, ut Higino placet.

13. Aquila *Albhakkab*, recentiores vulturem volantem vocant sive *Altayr*, sed contra mentem Alfragani, qui Cygno ut diximus hoc nomen attribuit. Huic stellas 9 annumerant, præter 6 informes, quas in Antinoi amasij sui memoriam Hadrianus imperator Antinoi nomine insigniri voluit.

14. Delphinus *Aldelphin* stellas numerat 10.

15. Telum; Sagitta, *Alsoham*, dicitur etiam *Isthusc*, quod à Græco οἰσὺς formari existimat Grotius. Stellas habet 5.

16. Serpentarius *Alhava* & *Hasalanguæ*. Stellas habet 24 & 5 informes. 1<sup>a</sup> autem dicitur *Rasalanguæ*.

Conspectum est in pede Serpentarij novum item sidus anno 1605, quod inter primæ magnitudinis referri haud dubie potuit. Apparere cœperat circiter Octobrem mensem anni, ut dictum, 1605, sequente vero, anno 1606 in Februario disparuit. Adeundus Kepplerus, qui de eo commentarium edidit.

17. Serpens *Alhafa*, constat stellis 18.

Equiculus, *Kataat Alfaras* hoc est, *ωεγρμὴ ἵππω*, Equi sectio, obscuris quatuor stellis constat.

19. Pegalus *Alfaras alathem*, hoc est, equus major, stellas habet 10. Hujus dexter humerus *Almeukeb*, atque eadē numero 3<sup>a</sup> dicitur *Seat Alfaras* brachium equi: quæ autem in rictu, 17<sup>a</sup> numero vocatur, *Enif Alfaras*, hoc est, nasus equi.

20. Andromeda *Almara Almasulsela*, hoc est, foemina catenata.

Alfra-



Alfraganus vocat foeminam quæ non est experta virum. Stellas numerat 23, quæ est 12<sup>a</sup> & in perizomate, vulgo *Mirach* Scal. *Mizar*. quæ autem 15<sup>a</sup> vocatur *Alamac*, potius *Almaac* quod foccum vel cothurnum significat.

21. Triangulum *Almutaleth* & *Mutlethun*, quod triplicitatem significat. Stellarum est 4.

Inter has omnes Borealis hæmisphærij constellationes, quæ sunt numero 21, sunt tantum primæ magnitudinis stellæ tres: Quarum prima est *capella* dicta in sinistro humero *aurigæ* sive *Erichtonij*, alias *Heniochi* dicti. 2<sup>a</sup> lucida *lyra*. 3<sup>a</sup> *Arcturus*, intra crura *Bootis*. Stellæ autem, omnes in hac plaga sunt 360, adnumeratis ijs quæ secundæ, tertiæ, quartæ, quintæ & sextæ cum nebulosis & obscuris magnitudinis sunt.

## CAP. V. IV.

SIGNA ZODIACI  
BOREAE.

**A**RIES *Alhamel* stellas habet 13 Ptolemæo, Alfragano 12. Præter 5. informes.

2. Taurus *Altor* vel *Ataur*, hujus in oculo prænitens, Romanis Palilicium, Arabibus *Aldebaram*, quasi dicas stellam prælucidam, itemque *hain Altor*, id est oculus Tauri. Quinque vero, quæ visuntur in fronte ejus, hyades Græcis (Latinis *luculæ*) sic dictas volunt Theō & Hero Mechanicus, quod literæ Y figuram obtinent; potius fortassis quod pluviarum effectrices. Thales Milesius duas hyades dixit, borealem & australem. Euripides 3. Achæus 4. Hippias & Pherecides 7. Sex autem vel potius 7, quæ in ejus dorso conspiciuntur, Græcis *Pleïades* (forte à multitudine) Latinis *Vergiliæ*, Arabes *Atauria* quasi *Taurinas* dixeris: Nicander post eum Vitruvius, & Plinius in cauda tauri, Hipparchus extra taurū in sinistro pede Persei, posuerunt. Has in *Taprobana* insula nunquam conspici, Plinius & Solinus referunt. Ridicula planè relatio, neque alio quovis quam Plinio aut Solino digna.

Plinij verba non quidem simpliciter sic loqui videntur, cum addant idem de *Septentrionibus*. Ita enim habent cap. 22 lib 6; ubi de legatis, qui ex insula *Taprobana* Romam venerant: *Septentriones Vergiliaeque apud nos, veluti novo celo, mirabantur*. Si *Taprobane* sub ipso æquatore sita, sane ob rationem quam supra ad cap.



cap. 3 partis 1 ex Lelio attuli, de Septentrionibus non ita novum hoc effet: Ne quidquam absoni scripsisset Plinius, si hunc in modum scripsisset: *Septentriones apud nos, veluti novo calo, mirabantur*. Nihil interim absque libris ingestum velim, qui sciam non præter solitum titubare in his atque impingere subinde Plinium. Vide & supra cap. 4 partis 1.

Eorum enim, qui Taprobanam incolunt, verticib. prope imminēt. Taurus habet stellas 33, non annumeratis informibus 11.

3. Gemini *Algeuze*, hos alij Castorem & Pollucem; alij Apollinem & Hercule: unde apud Arabas alter *Avellar* pro *Aphellan*, alter *Abra-calus* pro *Iracles* Scal. dicti videntur. Stellas (præter septē extra formam) 18 obtinet, quarum est in capite, *Rasalgeuze*.

4. Cancer, *Alfartan*, præter quatuor informes stellis constat novem, quarum quæ in pectore nebulosa & est 1<sup>a</sup> numero, *Mellef* vocatur, id concretum vel densitatem Scaligero significat.

5. Leo, *Alased*, hujus in corde lucidissima quæ prænitet, 8<sup>a</sup> numero, *Kale alased*, id est, cor leonis vocatur, Græcis βασιλικόν, quod qui sub eâ nascuntur, regiam habent nativitatem, inquit Proclus, quæ autem in extrema cauda ut ultima numero est, *Deneb Alased* hoc est, cauda ea leonis, quæ Alfragano dicitur *Asumpha*. Stellas habet 27, cum informibus inter extrema leonis & majorem ursum, ut Ptolemæo placet, (Theon Aratum secutus Virgini annumerat) Cincinnum novum sidus efformarunt. Conō Mathematicus in Ptolemæi & Berenices gratiam Crinem Berenices vocavit, & Callimachus poeta suis versibus celebravit.

6. Virgo *Eladari*, frequentius vocatur *Sunbalu*, id spicam significat, quæ autem in summa sinistra manu præfulget, *σάκος* spica vocatur, Arabibus *Hazineth Alhasel*, quod manipulum farraginis significat: male in dextra Vitruvius & Higinus spicam collocant. Stellas habet Virgo 26, præter sex sporades sive informes.

## CAPUT V.

# AUSTRALIS HEMISPHERII EFFIGIES, AC PRIMO, QUÆ IN ZODIACO.

**L**IBRA *Almizan*, cujus latus meridionalis vocatur *Mizan Aljemin*, id est, libra dextra vel meridionalis. Libram antiquiores in  
K. signis,



signis non numerabant: Posteriores Chelas Scorpio amputatas, libræ tribuerunt, inde Arabes lancem boream vocant *Zubenesci mali* hoc est, *χηλή βορέα* ☉, quæ autem ad Notum vergit, *Zubenalgenubi* *χηλή νότι* ☉ vocatur. Stellis 8 insignita est præter 9 extra signum.

8. Scorpio, vulgo *Alatrab*, rectius *Alacrab*. unde quæ in corde, numero octava, dicitur *Kelebalacrab*. hoc vult cor Scorpii. quæ autem in extremâ caudâ secunda, *Leschat*, rectius *Lesath*. quod idem venenatorum significat, hoc nomine vocatur Scorpii aculeus. Vocatur etiam *Schomlek*, Scalig. per transpositionem legit *Mosclek*, id flexum vel arcuationem caudæ significat. Stellæ habet 21, & tres extra formam.

9. Sagittarius, *Elcufu* vel *Elcaufu*. id arcum significat. Stellis 3 insignis conspicitur.

10. Capricornus, *Algedi*, huic dederunt stellæ 28. quarum quæ est 23<sup>a</sup>, dicitur *Deneb Algedi*, hoc est, cauda capri.

11. Aquarius, *Eldelu*. hoc situlam significat. Hujus 10<sup>a</sup> num. in extrema manu, *Seat*, id brachium est, vocatur. Stellæ 42 numerat.

12. Pisces, *Alsemcha*. Stellæ habet 34, & informes quatuor.

Inter asterismos, qui hoc capite quinto & antecedente quarto ab authore sunt enumerati, quique in Zodiaco omnes continentur, quinque reperiuntur stellæ primi honoris sive magnitudinis: Estque omnium prima *oculus Tauri*, 2<sup>a</sup> *cor leonis*, 3<sup>a</sup> *cauda leonis*. 4<sup>a</sup> *spica*. Virginis 5<sup>a</sup> *circa os piscis Austrini*. Reliquæ aut secundæ, aut tertiæ aut quartæ aut quintæ aut sextæ magnitudinis censentur cum aliquot nebulosis. Suntque ita in hac plaga stellæ omnes 346.

## CAPUT V.

# AVSTRALIS HÆMISPHERII IMAGINES EXTRA ZODIACVM.

**C**ETVS. Arabibus, *Elkaitos*, Stellæ 22 numerat. Hujus 2<sup>a</sup> vulgo *Menkar*, Scaligero *Monkar Elkaitos*, hoc rostrum ceti. decima quarta, *Baten Elkaitos*, venter ceti, penultima *Deneb Elkaitos*, id cauda ceti.

2. Orion vocatur Arab. partim *Asugia*, hoc audacem vel furiosum significat: quod nomen hydre etiam accommodatur: partim *Elgenze*, *Genze* autem est juglans, forte allusum ad Latinum *Jugula*. quo nomine Fe-



ne Festus Orionem indiget, quod amplior sit cæteris, ut Nux Juglans. hoc autem nomen *Elgeuze*, Geminis etiam tribuitur. Dicitur item *Algibbar*, quod fortem vel Gigantem significat. Stellis 38 conspicuus est. Harum secunda, quæ in humero dextro, *Ied Algeuze*, hoc est manus Orionis, ut Christmanno placet: vulgo *Bed Elgeuze*, fortè *Betelgeuze*, quod est Lucida Orionis: tertia numero, vocatur *Alfonis* Bellatrix. Quæ est in sinistro pede, numero trigesima quinta, dicitur *Rigel Algeuze* vel *Algibbar*. id pedem Orionis significat.

Iobi capite 9 vers. 9 Orionis fit mentio, quemadmodum supra commonuimus. Textus Hebræus habet vocem, quæ *insaniam, furorem atque instabilitatem* notat; *Kesil* enim dicitur: fortasse quod ejus ortus tempestatibus orbem variè conturbet, sitque, ut loquitur poeta, *nimbosus & aquosus*. Hieronymus & alij Orionem vertunt. Notandum autem Hebræorum vocabulum *Kesil* respondere Arabico *Asugia*, quod itidem *audacem vel furiosum* significare author ait. Iterum Orionis meminit Iobus capite 38 vers. 31. *Nunquid cohibebis delitias pleiadum, aut lora Orionis dissolves*. quamvis ibi varient interpretes. Videatur & propheta Amos cap. 5 versu 8.

3. Eridanus, *Alvabar*, id est, fluvius, unde *Nar* Hetruriæ fluvius per contractionem dictus quibusdam videtur. Stellis habet 34. Quæ autè 19<sup>a</sup> vulgo *Antegenar*. Scal. *Anchenet etar*, hoc flexû vel curvaturâ fluvij significat. & 29<sup>a</sup> dicitur *Beemim* vel potius *Theemim*, quod geminas & sibi conjunctas significat, ut dubium sit, an non ad duas stellas ubivis vicinas, hoc nomen applicetur. Lucida autem in ejus extremitate, ultima numero, dicitur *Acharnahar*, quasi dixeris, post fluvium, vel in fine fluvij. Vulgò *Aarnar* nominatur.

Avienus suis in versibus *Nilum* dixit, istis nimirum:

—— — *Pharium pars altera Nilum*

*Commemorat, largo segetes quod nutriat amni.*

Plantus eleganter circumscripsit in Trinummo Sc. *Huic ego*. Ità enim ibi: *Ad caput amnis quod de calo exoritur sub solio Jovis.*

4. Lepus, *Alarnebet*, stellas 12 numerat.

5. Canis *Alcheleb Alachbar*, hoc est, canis major & *Alsahare aliemaliya*. i. e. canis dexter vel meridionalis. Illud autè *Alsahare*, quod & *Scera* Scaliger arbitratur, ductû ab Arabico nomine, quod *ἰσχυροβία* significat, morbû quo rabiosæ canes afficiuntur. Grotius dubitat, an nō potius sit *Elseiri*, quod deductum videri possit à Græco *ἐλσῖρι*. Sic enim vocatur splendidissima in ore, Arabibus *Gabbir* vel *Echer*, corruptè *Harbor*. Habet stellas 11.



6. Procyon, Antecanis: quia ante canē oritur. *Alcheleb Alasgar*, hoc est, canis minor, & *Alfahare alsemaliya*, hoc est, canis sinister vel septentrionalis, vulgò depravatè *Algomeiça*. Stellæ habet duas.

Est insigne epigramma apud Ausonium de cane caelesti, terrestri & marino huc etiam spectans, modò vero suo vultu, id est, hunc in modum exhibeatur:

*Trinacrii quondam currentem in littoris ora*

*Antecanis leporem caruleus rapuit:*

*At lepus. In me omnis terra pelagique ruina est,*

*Forsitan & celi; si canis astra tenet.*

Quo loci versu secundo *ante canis caruleus*, est canis marinus. Vulgo hætenus editum nullo sensu *ante canes leporem*. *Antecanis* autem illi positum ad imitationem Ciceronis, qui omnium inter Latinos primus *procyona*, *antecanem* dixit, ut patet ex versibus, quibus Arati Phænomena Latine reddidit.

7. Argo, Navis. *Alsephina* Arabib. *Sephina* navem significat. Dicitur etiam *Merkeb*. id currum denotat (sic poetis Græcis ἄρμα θαλάσσης, currus maris pro navi solet dici). Hoc autem nomen Alfonso, apponunt ei, quæ numero sexta est. Stellis 45 insignitur, quarum penultima *Sohel* vel *Syhel*, id ponderosum notat, vocatur: forte ab eâ mente, quâ Basso terrestris nominatur, quod humillima & circa terram esse videatur. Græcis κλυβος, Hebræis *Chesil* vocatur, ut Christmanno videtur. Quod si verum sit, Arias Montanus in Itinerario Benjaminî Tudelensis non rectè pro Orione capit. Azaniæ incolæ Equum vocarunt, cap. 7 lib. 5. ut testatur Ptolemæus.

Geograph.

8. Hydra, *Alsugahh* vel *Asuia*, id fortis est vel furiosus. Ægyptij vocarunt Nilum, ut Theoni placet in comment. Arataeis. Præter duas extra imaginem, stellæ habet 25 quarum 12<sup>a</sup> Alfonso *Alphart* vocatur.

9. Crater, Vrina *Albatina* & *Elkis*. id pateram significat. Stellæ habet 7.

10. Corvus, *Algorab*, habet item 7.

11. Centaurus eodem nomine Arabibus vocatur. Stellis 37 insignitur. Ex his, quæ in pedibus posterioribus sunt, effingunt crucem illâ adeo in Hispanorum navigationibus celebratam.

12. Fera, *Asida*, quod lænam, & *Alsubahh*, id feram vel lupum significat, cui attribuerunt stellæ 19.

13. Ara sive Thuribulum, *Almugamra*, Bassus vocat sacrarium. Stellæ habet 7.

14. Co-



## ET EORVM VSV PARS II.

53

14. Corona Australis. *Ala clil algenubi*. Stellæ habet 13 in duplicata spira fulgentes, ut inquit Alfraganus. Theon XII tribuit.

15. Piscis austrinus, *Ahaut Algenubi*, stellæ habet 12 Ptolemæo, Alfragano 11. Hujus in ore quæ conspicitur lucens *Phom ahaut*, hoc est os piscis, vulgo formahant.

Describitur etiam in Globo cælesti Zona quædam colorem quasi lactis tota retinens: unde nomen invenit, ut vocaretur via lactea. Est autem non æqualis & regulata, sed latitudine, colore, stellarum frequentia, & ipso situ differens atque varia; quibusdā partibus simplex, alijs gemina conspicitur. Tractum ejus in Globo expressum & à Ptolemæo fusè explicatum videas c. 2, 8. l. Almag.

Hæc plaga stellæ primæ magnitudinis habet septem. quarum prima est in humero Orionis dextro; 2<sup>a</sup> in sinistro pede ejusdem Orionis. 3<sup>a</sup> in extremo fluvij Eridani; 4<sup>a</sup> in ore canis majoris Sirius dicta, 5<sup>a</sup> in femore canis minoris, *procyon*; 6<sup>a</sup> Canopus in Navi Argo; 7<sup>a</sup> in Centauri pede dextro. Quib<sup>9</sup> accedunt secundæ mag. 18. Tertiæ 60. quartæ 168. quintæ 53. sextæ 9. Neb. 1. Quæ in universum omnes censentur. 316.

Totum autem Firmamentum, comprehendens una cum Zodiaco Borealem & Australem plagas, habet stellæ 1022, conficientes asterismos seu *μορφώσεις* 48. Nec enim plures Ptolemæus & ante eum Hipparchus atque Eudoxus designarunt. quamvis Plinius, ut & author supra cap. 2 commonuit, numerū stellarum & constellationum multo majorem faciat. Verum de eo ad calcem capituli, quod proxime sequitur.

Constellationes, quæ à nostratibus & Lusitanis circa Polum Austrinum sunt observatæ suisque nominibus insignitæ, ad finem sequentis capituli adjiciemus.

## C A P V T VII.

### DE STELLIS IN GLOBO NON EXPRESSIS.

**P**RÆTER hæc astra, à Ptolemæo nobis enumerata, multa alia se conspicienda præbent, præsertim hyberno tēpore & serena nocte, cum & plura se exhibent conspicienda, & quæ videntur, majora apparent. Causam quæris, extra nostrum institutum. Sed paululum digrediamur, præsertim quod nonnulli in causa hujus rei designanda longiusculè aberrarunt. Sunt enim qui (pro eâ quam habent in Physicis & Opticis peritiā) volunt vel concipi plura, quam revera sint



sint per imaginationem vel deceptionem visus, vel (quod æquè est ridiculum) aerem hyeme tenuiorem & puriorem ea præbere conspicienda, quæ æstate (cùm est crassior) latent. Atque hunc errorem non tam apud alios deprehendo, quam demiror maximè, quòd Iohannẽ de Benedictis magni nominis Mathematicum devium traduxerit. Diversa enim & plane contraria est ratio. Ideo enim quia aer crassior, ea propter plura itemque majora perspiciuntur. Ratio ex Optices cognitione probat, visus iudicat, experientia docet, autoritas suadet. Radios per medium quod est crassius refractos, & veluti in canales quosdam diffusos, maiorem verà objecti imaginem visui objicere, non alienè ab Opticorum mente docet Strabo ex Posidonio. Perspicillorum ope plura videri, & quæ videntur, majora quam sine ijs concipi, norunt infimi è vulgo. Fertur (inquit Cleomedes) Sol de profundis spectatus puteis major apparere, quam cum è celsioribus locis conspicitur, idque propter humidiores & crassiorẽ aerem in imo puteo. Si fieri posset, ut per parietes & solida quævis corpora Sol spectaretur (ut de Lynceo fabulata est antiqua Græcia) major multo conciperetur, ut rectè docet Posidonius. Orientem itemque occidentem Solem maiorem videmus (præsertim in altis maribus) inquit Strabo. Maiorẽ dicimus, non tamen decuplo, quanto maiorem apud Indos quam alijs in locis Solem apparere Ctesia rerum Indicarum Eclogæ fabulantur; multo minus centuplo, ut (ad extremum Hispaniæ promontoriũ, quod *Sacrum* vocarunt, occidentem Solem conspici) dixit Artemidorus, quod in eo merito taxavit Posidonius. Alfraganus hujus rei causam vult, quia vapores è terra elevati, aspectui & orienti Soli interpositi, maiorem nobis Solem exhibent. Eandem volunt Strabo & Cleomedes ex Posidonio: neque hoc multũ alienè ab optimorum Physicorum mente. Hæc hætenus.

Speñantur etiam in parte mundi Austrina stellæ multæ, quarum, quod ab artificibus nostri orbis observari nõ possent, nulla ad nos pervenit notitia. Ex his etiam memoratis multa nobis non conspiciuntur ad Borealem mundi polum magis accedentibus. De stellis prope Austrinum mundi polum apparentibus, accipe historiam verè admirandam, quam ex Americo Vespuccio retulit Franc. Patricius Senensis in fine l. 15. Novæ Philosophiæ. Sic habet. *Cælum decentissimè exornatur sideribus quibusdam, quæ sunt nobis incomperta. Quorum ego consignantissimè memini, percensui fere viginti, tantæ claritudinis, ut apud nos*

*Venus*



*Venus & Iupiter. Deinde. Pro comperto itaque habui, majoris esse magnitudinis quàm autument mortales, & imprimis tres Canobos conspiciat sum, duos claros admodum, tertium obscurum & dissimilem alijs. Et mox. Quæ verò ipsum polum ambiunt tria sunt, quæ figuram præ se ferunt trianguli orthogoni; quorū id, quod medio loco visitur, circumferentiam habet grad. novem cum dimidio: & ubi hæc exoriuntur, à læva conspicitur Canobus albicans eximie magnitudinis. Postea. His succedunt tria alia præclara sidera, quorum medium habet diametrum circumferentie grad. duodecim cum dimidio, & in medio eorum cernitur alter Canobus. Hunc sequuntur sex alia conspicua sidera, quæ claritate cunctis octavæ spheræ sideribus præstant, quorum medium in superficie firmamenti diametrum habet circumferentie grad. 32. Hæc astra concomitatur Canobus ingens sed niger, quæ omnia cernuntur in via lactea. His ex Corsalio addit quæ sequuntur. Andreas verò Corsalius scribit, duas nubeculas satis magnas circa polum versari, & inter eas stellam esse à polo gradibus circiter 11 distantem: supra quas cerni ait crucem admirabilem inter 5 stellas quæ eam circundant, cum alijs quæ cum ea revolvuntur, procul à polo grad. 30. quæ tante sit pulchritudinis, ut nullum cæleste signum ei possit comparari. Hæc est historia verè mira de Austrinæ mundi partis Phænomenis. Auditum admissi risum teneatis? Tres procudit Canobos Vespucius, unicum agnovit Ptolemæus & antiqua Græcia, in temone Argus navis constitutum. Hoc est præterea animadversione dignū, quod Patricius (quantum ego ex illius scriptis conjicere possum) ex malè expressis Vespucij verbis, ab ipso peiùs intellectis, stellam quandam diametri apparentis magnitudinis grad. 32 pulchrè sibi efformavit, cùm Solis diameter minuta 32 vix attingat. Quæ autem nobis comperta sunt & explorata de his Austrini mundi Phænomenis in navigatione plusquam annua 1591 & 1592 ultra æquinoctialem circulum sic se habent. Tres solùm stellæ primæ magnitudinis nobis conspectæ sunt, quas nostra Anglia non cernit. Ptolemæus in Alexandria has omnes vidit. Prima est in temone Argus, Canopum vocant. Secunda in extremitate Eridani. Tertia in dextro Centauri pede. Si quartam adjicies, quæ in sinistro Centauri genu spectatur, valde conspicuam, non multum adversabor. Alias primæ magnitudinis Austrina mundi pars non videt: vix unam aut alteram secundæ magnitudinis ostendit Ptolemæo non conspectas. Neque enim aliqua universi cœli pars paucioribus & minoris luminis stellis ornatur, quàm quæ Austrino polo vicinior.*



vicinior. Vidimus Andreae Corsalij nubeculas, alteri diametro quasi subduplam vel subtripulam, colore non absimiles circulo lacteo, ab ipso polo non admodum remotas. Nostrates nautæ Magellani nubeculas solebant nominare. Admirandam quam Corsalius vocat crucem, Hispani crufero, nostrates *Crofters* nominant, conspeximus. Stellæ ex quibus constituitur, vidit Ptolemæus, sunt enim lucidiores in posterioribus Centauri pedibus. Hæc omnia sæpius eoque diligentius ideo spectavimus, quod de admirandâ magnitudine stellarum Austrini orbis, non dissimilia ijs, quæ refert Patricius, apud Cardanum legisse memineram.

Quæ in hoc Austrino orbe a nostris postmodum & Lusitanis navarchis observatæ habentur constellationes suisque indicatæ nomenclaturis sunt hæ: *Triangulum australe; Grus, Phoenix, Hydrus, Dorado piscis, Aurata* aliàs in ipso Eclipticæ polo; *Chamæleon cum musca; piscis volans, Apis Indica, Paradys-boghel, Pavo; Indus den Indiaen; Toucan avis, alias pica Braslica.* Quæ & ipsæ in globis cœlestibus *Hondianis* accurate omnes exhibentur. Inter eas magnitudinis prima nullæ reperiuntur, secunda 7. Tertia 6. Quarta 35. Quinta 56. Sexta 11. informes 6. Nebulosa 2, præter nebulas ipsas binas. In universum autem stellæ sunt, omisis nebulosis, 121. Quas si 1022, superius jam enumeratis adjecerimus, erunt 1143. Quarum 1022 ab authore quoque nostro cap. 2 partis 2 ex sententiâ Ptolemæi agnitæ ac receptæ fuerunt, tantum quod dubium hunc calculû reddat Plinius, cuius verba sunt lib. 2 cap. 41: *Patrocinator vastitas celi immensa, discreta altitudine in duo atque lxx signa. Hæ sunt rerum aut animantium effigies, in quas digessere celum periti. In his quidem mille sexcentas annotavere stellæ, insignes videlicet effectu visuæ.* Ecce stellæ mille sexcentas agnoscit, cum post eum Ptolemæus tantum mille viginti duas, ut posuimus, agnoverit; asterismos etiam sive signa duo & sexaginta describit, quæ in Hipparchi, Eudoxi ac Ptolemæi catalogo tantum quadraginta octo inveniuntur. Scaliger ad Manilium pag. 67 ut nodum solveret, legebat in verbis Plinij, *patrocinator vastitas celi, immensa altitudine, discreta in duo de L signa*, id est, in duodeviginti. At interim hæret scrupulus in verbis ejusdem Plinij sequentibus, ubi stellæ mille & sexcentæ enumerantur.

Addi præterea in eadem plaga recensitis jam asterismis duos adhuc reperio *columbam oliviferam & phænicopterum.* Quorum *columbam*, Nohæ appellant. constituunt eam stellæ xi. Earum in dorso duæ sunt magnitudinis secundæ, *Boni Nuncij* dicti; ad alam dextram *placati numinis*, ad sinistram *abcessus aquarum* appellantur diluvij tempore. *Phænicopterus* nobis dici posset *roodt-bleughel.* De eo Martialis lib. 13.

*Dat mihi penna rubens nomen, sed lingua gulosis*

*Nostra placet: quid si garrula lingua foret?*

Hispani vocant *Flamengo.* Expansis alis *Piscem Notium*, quæ in arcum curvatur



curvatur, rostro appetit. Stellis fulget xii: quarum quæ in capite secundæ magnitudinis (cujus classis duas alias habet, unam in dorso, in alâ sinistra alteram) *oculum phœnicopteri*, par vero, quod in medio collo, *collare vel torquē*, appellat *Merula* lib. i *Cosmographiæ*. Postremo notandum *Polum Austrinum* Indis *Dramasa* appellari. Ita enim *Plinius* lib. 6 cap. 19: *Austrinum polum Indis Dramasa vocant.*

## TERTIA PARS.

## CAPVT I.

DE GEOGRAPHICA DESCRIP-  
TIONE GLOBI TERRE-  
STRIS, ET PARTIBVS

## TERRÆ COGNITÆ.



OTAM tellurem, tanquam immensam Insulam. Oceano cinctam, *Dionysius Afer* in initio suę periegeseos tradit. Idē ante eum *Homerus* & *Eratosthenes* (quem *Dionysiu* in plurimis secutū monet *Eustathius* ejus *Scholiastes*) voluerunt, ut docet *Strabo*. Idem post eum *Mela*. Ad Boream terminarunt mari glaciali, quod *Saturninum* & mortuū vocat *Dionysius*; ad Orientē *Eoo*, quod & *Sericum* vocant; ad Meridiem mari *Rubro* (*Indicum* *Ptolemæus* vocat) & *Æthiopico*; ab Occidente *Atlantico* alluitur. Ex hoc Oceano in tellurem se infundunt (ut antiquioribus *Geographis* placuit) quatuor sinus præcipui. Duo à Meridie ex *Erythræo* mari influunt, sinus sc. *Perficus* & *Arabicus*. Ab Occidente ex Oceano *Atlantico* immittitur sinus vastus, qui *Mediterraneum* vocatur mare. A Septentrione ex Oceano *Scythico* *Caspium* mare infundi voluerūt; quod præruptis & excelsis rupibus magna ex parte clausum est; unde flumina tantavi devolvuntur, ut cum ad præcipitia pervenerint, aquā in mare, ne consperso quidem littore, tam longinquē ejaculentur, ut litus quasi flumine contactum exercitibus sit pervium, referente apud *Strabonem* *Eudoxo*. *Caspium* mare Oceano (ut diximus) *Scythico* confluere *Strabo*, *Plinius*, *Mela*, *Solinus* voluerunt: sed eorum errorem, præter recentem & comprobatam experientiam, hoc etiam  
L extorquere



extorquere posset; quod ejus aquam dulcem esse, Magnus' primum Alexander, deinde Pompeius deprehenderunt; ut qui tum Pompeio militabat, testatur M. Varro apud Solinum. Atque hac præcipue ratione id ipsum probare apud Strabonem nititur Polycletus. Hoc omne quidam antiquiorum in duas diviserunt partes, Asiam & Europam. Qui secuti sunt, tertiam adjecerunt, quam Africam, interdum Libyam vocant. Ex his Asia est maxima, sequitur Libya, Europa est omnium minima, secundum Ptol. l. 7 Geographiæ.

*Europa &  
Asia limi-  
tens.*

Europa ab Oriente, quâ Asiæ adjacet, terminatur interjacente mari Ægeō (nunc *Archipelago*) Ponto Euxino, quem terris undique coactum paludis olim in morem constituisse, & magna fluminum accessione auctum, vi viam aperuisse in Propontidem & Hellespontum, apud Strabonem existimavit Strato. Hodie autem vocatur Pontus Euxinus *Mare Maggiore*, palude Mæotide (*Mare delle Zabacche*) Tanai fluvio (vulgo *Don*). & Meridiano, qui inde ad Scythicum vel glaciale mare protenditur. Reliquis ex partibus mari alluitur. Ad Meridiem ab Africa dirimit fretum Gaditanum & Mediterranci maris pars. Hujus freti longitudinem stadiorum 120 voluit Strabo: totidem & Plinius. Latitudinem Strabo 70 stad. Mela 10 mil. passuum, id est, 80 stadiorum posuerunt. T. Livius & Cor. Nepos, maximam latitudinem 10 m. pass. vel 80 stadiorum, minimam 7 m. pass. vel 56 stad. At à Mellaria Hispaniæ vico, ad Promontorium Africæ Album dictum, 5 solum mill. passuum vel 40 stadia numerantur à Turannio Gracula, qui juxta ea loca genitus est, referente Plinio in Præf. lib. 3. Europam quondam Africæ continentem adhæsisse Eratosthenes putavit. Tradiderunt ejus loci incolæ (inquit Plinius.) Effossam Isthmum labore Herculis fabulantur. Ab Occidente Europa finitur Oceano Atlantico. Britannico, Germanico & Glaciali, quâ Boream spectat.

Hæc Europæ Borealis pars primum detegi & aperiri cœpta sub Augusto, vel ut rectius dicam, auspicijs Augusti Cæsaris innotuit. Nam, ut habet Plinius libro 2 cap. 67, *Septentrionalis Oceanus majore ex parte navigatus est auspicijs divi Augusti, Germaniam classe circumvecta ad CIMBRORVM PROMONTORIUM: & inde immenso mari, prospecto, aut fama cognito, ad Scythicam plagam.* Intelligit scilicet Plinius maritimas expeditiones Tiberij Drusi & Germanici; & præsertim Drusi; quod ex verbis Taciti quæ sunt in Germania disci potest: Sunt enim ejusmodi: *Ipsum quinetiam Oceanum illa tentavimus: & superesse adhuc Herculis columnas fama vulgavit: sive adiit Hercules, seu quidquid ubique magnificum est, in claritatem ejus referre consensimus.* Nec defuit audemus Druso Germanico, sed obstuit Oceanus in se simul  
atque



atque in Herculem inquiri. Mox nemo tentavit: sanctiusque ac reverentius visum, de a-  
 Etis Deorum credere, quam scire. Antea hæc plaga totusque Borealis tractus Roma-  
 manis erat NOVVS ORBIS, IGNOTVS ORBIS quemadmodum alibi  
 ex Albinovani elegia in obitum ejusdem Drusi observasse nos memini. PRO-  
 MONTORIUM vero, quod Plinius nominat, CIMBRORVM, nunc vulgo  
 Scagen appellatur.

Quas autem in eadem plaga, ut obiter hoc addam, HERCVLIS CO-  
 LVMNAS memorat jam citatus Tacitus eas facere Hadrianus Iunius, qui has  
 aliquando oras vidit, refert ad eam Scandinaviæ (male est in Iunio Norvegia)  
 excelsam rupem seu promontorium, quod hodieque Col indigenis nec nō nau-  
 cleris nostratibus appellatur. Nam & id religione etiamnum sacrum est; & ut  
 narrat de Gaditanis Columnis Strabo, ad eas ubi pervenerant olim navigantes,  
 quasi cursu & meta laborum absoluta, Herculi sacra fecisse; ita & hic tirones,  
 quibus mare illud Boreum navigatum non est, statis ceremonijs (quod & ipsi a-  
 liquando promontorium idem præternavigantes, vidimus) inaugurati excipi-  
 untur maloque nautico alligati marinæ aspergine, quam haustro affundunt, seu  
 libamento quopiam expiantur. Iunius autem, qui eam voculam Col vel ab Her-  
 cole vel à Columna mutilatam auguratur, an & alios sibi assentientes habiturus sit,  
 multum ambigo. Verum de eo & toto hoc Boreali tractu alibi aliquando oportu-  
 nior dicendi erit locus.

Africam ab Asia separat (ut Dionysio & Melæ placet) Nilus fluvius. *Africa &*  
 us & Meridianus per ejus defluxum ad Æthiopicum usque mare du- *Asia ter-*  
 ctus. Ptolemæo magis placet, ut dirimantur sinu Arabico (quem mi- *mini,*  
 nus rectè vocant Mare Rubrum) & Meridiano, qui inde ducitur ad  
 Mare Mediterraneum per Isthmum, qui eadem sejungit, quique Æ-  
 gyptum Arabiæ & Iudææ facit continentem. Neque enim videtur ei  
 congruum, ut Ægyptus distrahatur, & pars ejus Africæ reliqua Asiæ  
 tribuatur: quod fiet, si Nilus fluvius statnatur terminus. Neque hoc  
 Straboni videtur inconcinnum, cum ejus Isthmi longitudo, quæ duo  
 maria dirimit, 1000 stadijs major non sit. Et rectè videtur dixisse: *non*  
*major stadijs 1000.*

Vtcunque enim Posidonius paulo pauciora numerat 1500 stadijs,  
 Plinius tamen non amplius 115 M. pass. hoc est 920 stadijs, continere  
 voluit. Idemque Strabo à Pelusio ad Heroum urbem in intimo recessu  
 sinus Arabici sitam, distantiam 900 stadiorum posuit. At si Plutar-  
 cho attendere libeat, quâ Isthmus maximè coarctatur & constringi-  
 tur, duo maria non amplius 300 stadijs distabunt. Atque hac (cum ab  
 Augusto navali prælio copiæ Antonij fractæ, & res penitus accisæ es-  
 sent) Cleopatram Romanorum servitutem refugientem, conata in esse



subductam classem trajicere, ut novas sedes à Romanis quā remotissimas quæreretur, in Antonij vitā idem refert Plutarchus. Quā mente inter duo maria 15 vix stadia superesse dixerit Copern. l. 1. cap. 3. planè non intelligo, nisi quod mendum existimem quod operarum incuria irrepsit. Atque, hoc erratū utcunque sit grave, utinam hoc solum hujus excellentissimi viri scriptis insideret. Isthmum hunc ab antiquis temporibus aquis coopertum, prius quam Oceanus Atlanticus Mediterraneo mari conflueret, Eratosthenes existimavit: atque hāc Menelaum Homericum ad Æthiopes navigasse, Grammatici quidā Homeri Scholiastę comminiscuntur Strabone attestante. Huic autem Eratosthenis relationi (sive historiam, sive fabulam, vel conjecturā malis dicere) quæ videntur fidem facere, paucula quædam adjiciemus. Primo Ægyptum (si non universam, eam saltem quæ infra Delta sita, inferior Ægyptus nominatur) Nili (vel potius Maris) donum, ex aggestione limi & arenæ, ante Strabonem Herodotus conjectavit. Pharon insuper insulam, quam Alexandriae ponte conjunctam suā ætate refert Plin. lib. 5 cap. 31 (idēoque & peninsula à Strabone dicta videtur) integrę noctis & diei navigatione ab Ægypto quondam fuisse disjunctam, ex Homero referunt Strabo & Plinius. Atque hinc Strabo conjicit, Homerum (cū Thebarum in Ægypto sæpius mentionem faciat) Memphis omnino non meminisse, quod aut exigua tum fuerit, aut prorsus non fuerit, terrā aquis Homeri ætate coopertā, ubi postea Memphis ædificata est. Huc etiam facere videtur interjecti littoris inter duo maria depressio, quæ tanta est, ut de perducendā inter eā fossā, primū Sesostris, deinde Darius, postremo Ptolemæus cogitarint. Et littus Ægyptij maris ultra montem Casium, mari inundatum suā ætate se vidisse memorat Strabo. Item magnæ recessiones æstus, quæ sunt tum in sinu Arabico tum etiam Persico, ab hac conjectura Eratosthenis non multum alienæ videntur. In tantum enim minuuntur æstus in sinu Arabico, ut inde quæsitam esse occasionem memoret Iul. Scal. calumniandi miraculosum trāsitum 600 amplius millium Israelitarum per mare rubrum, quē factum esse dixerunt prope initium recessum maris, observatā æstus recessionē, eodemque affluente Ægyptios esse submersos.

Hoc mare septuaginta interpretes perpetuo *Erythraum* vocant: Hieronymus, *rubrum*; ipse textus Hebræus intelligens maris sinum, qui & Ptolomæo est *sinus Arabicus*, mare *Suph*, nominat, id est, *mare algosum*, seu *caricosum*, quod in eo  
juncus



*juncus & catex uberrime proveniat. Quod & Plinius notavit lib. 13 cap. 25. Nascuntur & in mari frutices arboresque minores in nostro. Rubrum enim & totus Orientis Oceanus refertus est silvis. Non habet lingua alia nomen, quod Græci vocant phycos: quoniam alga herbarum magis vocabulum intelligitur: hic autem est frutex. Videatur & Strabo lib. 16.*

Locus, quem ex Scaligero citat author, est in Exercitationibus adversus Cardanum, Exercitat. 52. Sed operæ est prætium ipsum Scaligerum loquentem audire, ut & constet quis ei de eo sensus & iudicium fuerit. Ita enim ille loco jam indicato: *In plaga Indica secundum Gangis atque Indis fauces magnus est æstus. In Erythraeo tantus, ut os fores sacrarum literarum temere mentiti sint: Moysen in sicco transmississe, vactum reflexionis occasionem. Quod tamen fieri non potuit. Propterea quod ad Sues usque quod in intimo recessu jacet, mare operit litus illud: neque nunquam regrediens ita nuda, ut inferiores partes, qua transierunt Hebræi, sua decessione aperiat.*

Et prope fauces sinus Persici juxta promontorium Macarum, refert Plinius, Numenium Antiochi præfectum contra Persas dimicantem, primum classe, deinde recedente æstu equitatu etiam eodem die, bis ibidem superasse. Plin. lib. 6 cap. 28. Atque hæc de Eratosthenis conjecturæ. Redeamus nunc ad Africæ terminos. Ab Oriente (ut diximus) ab Asiâ separat meridianus per finem Arabicum & mediterraneum mare ductus. Reliquis ex partibus circumambit mare: Meridie versus, Æthiopicum, Atlanticum ab Occidente, ad Boream Australis Europæ terminus. Ptolemæi ignorationem de Australi parte Africæ quam facit Asiæ continuam per incognitam terram, Australem maris Indici & sinus Æthiopici partem ambientem, si antiquorum relationes non probent; nec Herodoti, qui refert quosdam à Dario missos totum hunc ambitum circumnavigasse; nec Heraclidis Pontici, qui perhibet Magum quendam à Gelone venisse, qui se diceret navigio totam hanc oram circumivisse (quia suspectas habet Posidonius contra Polybium; neque Eudoxi Ciziceni historia à Posidonio approbata, quam Strabo, Plinius, & Mela ex Cornelio Nepote gravissimo viro refert, (quia hanc historiam non multum abesse à Pythææ Evenieri & Antiphanis mendacijs existimavit Strabo); neque Iubæ regis traditiones de hac eadem re à Solino relatæ; ut ut inquam antiquiores istæ traditiones Ptolemæi ignorantiam non probent: manifestissimè tamē evincunt Lusitanorum recentiores navigationes, factæ per Promontorium Africæ extremum (quod Bonæ spei vocarunt) ad extremas usque Indias. Mitto interim inter antiquorū relationes, quod refert Plinius, regnante C. Cæsare Augusti filio, in sinu Arabico reperta &



agnita esse signa ex naufragijs navium Hispanicarum: & Carthaginis potentia florente, Hannonem à Gadibus ad Arabiam circumvectum navigationem eam scripto prodidisse.

*Asia quæ  
mari allui-  
tur.*

*Asia* ab Europa & Africa (utranque autem ab Occidente spectat) quibus separetur terminis, dictum est. Reliquis ex partibus Mare alluit; congelatum vel Hyperboreum ad Septentrionem; Oceanus Sericus & Eous ad Orientem; Rubrum & Indicum à Meridie, Borealia Asia, ut & Europæ non mari sed incognitâ terrâ ambiri voluit Ptolemæus, volunt quidam recentiores, qui Groenlandiam quam vocamus, Indiæ continentem arbitrantur. De hac eorum opinione ut plurimum dubitemus faciunt nostratum multæ navigationes, qui extrema Norvegiæ longè intra Arcticum circulum prætervecti, ultra strictum illud, quod novam quam vocant Zemlam à Russia separat, omnia mari circumdari testantur, ut mittam quod ex Cornelio Nepote, gravissimo scriptore refert Mela, datos esse Q. Metello Celeri (qui Proconsul Gallijs præerat) à Suevorum rege, Indos quosdam, qui vi tempestatû abrepti, ex Indicis æquoribus in Germaniam delati sunt, & quod Patrocles apud Strabonem asserit, posse per oram maritimam Bactris, Hircania marique Caspio multò septentrionaliorem, Indiam usque circumnavigari, ijs autem locis præfuit Patrocles, & quod refert Plinius, totam hanc oram ad Ortum, ab India ad usque mare Caspium, enavigatam esse armis Macedonum, Seleuco & Antiocho regnantibus.

*Quantitas  
hæc  
terra apud  
Vetere.*

De quantitate habitatæ terræ variè scripserunt antiquiores. Ptolemæus ejus longitudinem ab Occidente Orientem versus definivit Meridiano transeunte per insulas Fortunatas, & eo qui per Synarum Metropolim ducitur: ut complectatur semissimæ equatoris, sive gradus 180, horas æquinoctiales 12, stadia in equatore 9000. Latitudini terminum Australissimum posuit parallelum, qui ultra Æquatorem vergit ad Meridiem grad. 16 m. 25. Borealem terminum fecit parallelum, qui per Thulen ducitur, grad. 63 ab æquinoctiali distantem: ita ut tota latitudo 79 gr. 25 m. vel integris. 80. gr. concludatur, stadijs 40000 proximè. Excurrit itaque in Ortum & Occasum longius quam in Austrum & Boream, sub æquinoctiali dimidio paulo amplius, in parallelo Borealissimo quinquagesima parte propemodum. Merito itaque extensionem terræ in Ortum & Occasum Longitudinem, in Austrum & Boream Latitudinem vocarunt antiquiores, attestante Ptol.



1.1 Geograph.c.6. Strabo longitudinem agnoscit, quantam Ptol. 180 grad. æquatoris, itidem & Hipparchus, utcunque in stadiorum numero plusculum dissentiant. Nam posuerunt longitudinem quæ est sub æquatore 126000 stadiorum, secuti Eratosthenis mensuram, quæ tribuit uni gradui 700 stadia. Latitudinem multo minorem fecit Strabo, stadiorum paulo minus 30000, & definivit parallelo ducto per Cinnamomiferam stadijs 8800 ab æquatore ad Boream distante, eoque qui transit per loca Britannia Borealia stadijs circiter 4000. Parallelum per Cinnamomiferam Australiorem Taprobana, aut per ejus extrema Meridiem versus transire facit Strabo. Sed magnam prodit ignorantiam, cum ejus pars Australior ultra æquatorem excurrat attestante Ptolemæo 7. Geograph.c.4. ut mittam nuperas Lusitanorum navigationes. Dionysius Afer longius etiam aberrat, qui Taprobanam Tropico Cancræ subjecit.

Haftenus de finibus & terminis orbis habitati ab antiquioribus constitutis. Nostra ætate Hispanorum & nostratium navigationibus, Africa ora maritima ad 35 amplius Austrinae latitudinis gradum penitus lustrata est, & Europæ pars Borealior intra Arcticum circulum ad 73 usque gradum latitudinis cognita est, præterquam quod novæ orbis partes inventæ, ultra spem & fidem antiquiorum, ne vel solo nomine ipsis cognitæ.

*Partes orbis noviter detectæ.*

*Sinas* non *Chinas* scribendum, ut vulgo author alijque hodie scribunt, vel ex Ptolemæo liquere potest, qui perpetuo *Sinas* nominat. Tabula quoque geographica ejusdem Ptolemæi octava, *Asiam* adhuc exhibens, *Scythas Cathas* (Cathaie regionem noster vocat) intra montem Imavum & Emodum collocat: *Sinarum* vero partem ultra eundem Emodum & Ottorocaram sericos montes, ortum & austrum versus: ut mirum sit hodie Mathæum Riccium è Societate Iesu, in sua Sinensi expeditione Cathaie regnum à Sinensibus haud esse distinguendum tam multis pertendere. Verum adversus ejusmodi assertionem etiam alijs ac prioribus argumentis testimonijsque agere ac contrarium liquidissime demonstrare in promptu ac facile esset, modo hic locus pateretur.

*America*, quasi alter orbis excurrent ultra 52 Austrinae latitudinis gradum, terminata freto Magellanico, ad Boream se projicit intra circulum Arcticum: quæ ex parte Mari etiam terminari, nostratium multæ navigationes magnum faciunt fidei argumentum. Mitto oras maritimas obiter conspectas, nondum satis lustratas, ultra mare illud, quod Borealia Europæ & Asiae ambit, itemque eas quæ sunt Australiores Mari Indico & Erythreo: quas, quin Australiori freti Magellanici terræ con-

*America*



ra continentes judicemus, nulla dum experientia contrarium potest evincere.

*Europa.*

*Europa* (sive ab Europa Tyria Agenoris, aut ut alijs placet, Phœnicis filia, ut videtur Herodoto; sive ab Europa Nympha Oceani, ut vult Hippias apud Eustathium; sive ab Europa quodam, ut Nicia placet apud eundem Eustathium; nomen fortiatur) has præcipuas continet regiones: Hispaniam, Galliam, Italiam, Germaniam, Bohemiam, Borussia, Rhetiam, Livoniam, Slavoniam, Græciam, Hongariam, Polonia, Moscoviam sive Russiam, Norvegiam, Suediâ & Daniam. Huic adjacent Insulæ præcipuæ Britannicæ: Altera Scotiæ & præcipuè Angliæ imperio nobilis: Altera est Hibernia Angliæ regno subdita. Deinde sunt Açores & multæ insulæ in Mediterraneo mari, ut Sicilia, Sardinia, Creta, &c.

Observandum in *Europa*, 1 celebriores Monarchias esse Imperatorem Romanum, regem Hispania, Gallia, Britannia, Dania, Suetia Polonia, & Moscovia: quibus addi potest Romanus pontifex, qui licet regis titulum non usurpet, potestate tamen & dignitate haud inferior habetur; ut & Turca qui Europæ quoque partem tenet; 2 Montes primarios esse Alpes, Italiam à Germaniâ ac Gallia secludentes; item Pyreneos, qui Hispanos à Gallis separant. 3 flumina præcipua, Danubium, Rhenum, Albim, Vistulam, Borysthenem & Tanaim, quibus adde Hispaniæ Tagum, Galliarum Rhodanum & Garonnam: Thamesin Britannia. Postremo merces Europæ sunt, aurum, argentum, stannum, plumbum, ferrum, oleum, frumentum omnis generis, linum, lanæ, Sal &c.

*Africa* hæc notabilia habet: 1 Europâ major est, Asia vero minor, utraque minus culta. 2 Mari atque Oceano undique terminatur nisi qua Asiæ adhæret. 3 Primariæ ejus partes sunt, Mauritania, Numidia, Libya, Cyrenaica, Egyptus & Ethiopia. 4 inter reges & regna celebria sunt Marocco, Fessa, Algeria nec non Ethiopia Preigianus. 5 Mons primarius est Atlas, & qui ad ortum Nili. 6 flumina præcipua sunt Niger & Nilus, qui omnium totius mundi maximus, & secundum \* Diodorum Siculum 700 insulas circumfluit: 7 Mercimonia Africae sunt, Ebur, Zibethum, gurum, Gossipium, gemma & aromatica quedâ, Sal, leones, cameli.

\* cap. 3 lib.  
1 Per. an-  
tiq.

*Africa.*

*Africa* sive ab Aphro quodam nomen accepit, socio expeditionis Herculis contra Gerionem, ut vult Eustathius; vel ab Iphrico quodâ Arabum rege, unde in lingua Arabum Iphrichia vocatur, ut testatur Iohannes Leo; vel à torrente æflu, ut dicatur ἀφρικκ, quasi sine frigore (ut alijs placet) has habet præcipuas regiones: Proximè freto Gaditano (quod hodie dicitur, fretum Gibraltar) jacet Barbaria, antiquitus dicta Mauritania, quæ cōtinet regna, Marocco, Fessa, Algeria, Tuncti. Proximè



# ET EORVM VSV PARS III.

63

Proximè Barbariam Ægyptus est Mari etiam Mediterraneo adjacēs. Interius post Barbariam sequitur Biledulgerid, antiquioribus dicta Numidia. Tertia est, quæ Latinis & Græcis Libya dicitur. Arabes Sarram vocant. Sequitur Nigritarum regio, adjacens fluvio ejusdem nominis, qui Niger dicitur. Hodie vocant multi Senagam. Multa ignobilia regna continet, ut sunt Gualata, Guinea, Melli, Tombutum, Gagos, Guberis, Agades, Canos, Casena, Zegzege, Zanfarā, Burnum, Gaoga, Nubia. Succedit amplissimum imperium Æthiopum regis, quem Pretegiāni vocant, Christiana religione ab Apostolorum usque temporibus nobile, Abyssinorum nomine notum, rectius Habasinos vocandos esse monet Arias Montanus in Itinerario Benjaminī Tudelensis. Eorum imperium in Asia etiam jampridem latissimè patebat. His ad Occasum adjacent obscura regna, Manicongo & d'Angola: ad Ortum & Meridiem, Melinde, Quiloa, Mozambique & Benamatapa. Insulæ præcipuæ quæ huic adjacent, sunt Madagascar, Insulæ Canariæ, & Cap. Viridis, & Insula S. Thomæ Æquatori subjecta.

*Asia* (sive dicta sit ab Asia matre Promethei, ut vulgò volunt, sive ab Asiæ quodam Heroe, ut placet Hippia apud Eustathium) tota hodie subjecta est Turcarum Imperatori & Persarum regi ad usque Indiam Orientalem, quæ plurimum subjecta est regibus Ching & Pegu. Borealia Asiæ occupant Muscovitæ, Tartari, & qui regionem Cathaie incolunt. Insulas habet, præter Cyprum & Rhodum in Mediterraneo mari; ad Austrum, Sumatram, Zeilam, Iavam utramque, Moluccas, Philippinas, Borneo, & infinitas propemodum alias; ad Ortum jacent Iapones Insulæ.

Quod ad Asiam attinet, imprimis hæc observanda, 1 duplicem esse, *minorem* aliam, aliam *majorem*. 2 *Minorem* describi ab Oriente ponto Euxino; à meridie Euphrate fluvio, ab occasu mari Mediterraneo, à Septentrione mari Ægeo. 3 Huius olim regiones fuisse *Ciliciam, Phænephiliam, Cariam, Lyciam, Joniam, Lydiam, Æoliam, Mysiam, Bithyniam, Paphlagoniam, Cappadociam, Galatiam, Lycæniā & Pisidiā*. 4 ad majorem Asiam pertinuisse *Syriam, Armeniam, Chaldaam, Arabiā, Persiam, Tartariam, Hircaniam, Parthiam & Indiam*. 5 utramque hodie primaria hæc imperia simul complecti, *Turcicum, Persicum, Tartaricum, Indicum & Sinarum*. 6 Montes primarios esse *Taurum, Caucasum & Imaum*. 7 Flumina præcipua *Euphratem, Gangem & Indum*. 8 Inter merces Asiaticas esse *aurum, uniones, gemmas, aromata omnis generis, moschum, thus, balsamum, Ambram, sericum, ebur & elephantos*.

*America*, quæ ab Americo Vespucio, qui primus hanc terram aperuit nomen accepit fines ac terminos habet; ab Oriēte (quâ Europam spectat

M

speciat



ſpectat & Africam) Oceanum Atlanticum; ad Occidentem, Mare quod vocant del Zur; Australiſſimam partem claudit fretum Magellanicum: Borealiſſimam partem adhuc incognitam, Mari cōgelato terminatam magnum fidei argumentum faciunt multæ noſtratum navigationes, D. Martini Forbiſher, & Ioann. Davis. Has præcipuas numerat regiones: ad Boream terrā Laboris, quæ Hispanis dicitur Tierra de Labrador. Succedit Baccalearum regio, inde nova Francia: deinde Virginia, poſtea Florida, proximè nova Hispania, urbe Mexicana maximè nobilis, poſtrema eſt Braſilia & Peruvia ad Auſtrum vergētes. Multas habet adjunctas Inſulas. Plurimæ in ſinu jacent Mexicano, Americæ ad Ortum, quorum inſigniore ſunt Cuba, Hispaniola, & multæ ignobilioreſ aliæ.

Sunt præterea aliæ orbis partes nondum ſatis luſtratae & cognitæ: ultra mare Indicum terra Auſtralis, *Nova Guinea*, utrum inſula an cōtinens terræ Auſtrali, nōdum ſatis cognitum; quemadmodum & tractus Magellanicus; Borealis orbis partes, Europæ, Aſiæ & Americæ obiectæ, quas noſtratum multæ navigationes detexerunt.

## CAP. II.

DE AMBITV TERRÆ, VEL MAIORIS  
IN EA CIRCULI, ET DE MEN.

SVRA VNIVS GRADVS.

*Diffenſus  
auctorum  
de ambitu  
Terra.*

**D**E ambitu maximi in terra circuli, cū ad Geographiæ ſtudiū & navigandi ſcientiam apprimè ſit neceſſaria ejus cognitio, reſtat ut dicamus. Neque videbor (ſpero) ab inſtituto aberrare ſi aliquanto prolixius huic argumento inſiſtam: præcipue quia magna eſt in hac re diſſenſio inter magni nominis ſcriptores, ut quem ſequamur, etiamnum ſit in controverſo.

Ariſtoteles in ſine 2 de cœlo (idque ex Mathematicorum, ut ait, ſententia) circumferentiæ terræ 400000 ſtadiorum attribuit. Cleomedes 300 millia numerat. l. 1. Lyſimachiæ enim & Syenes vertices per decimam quintam ejuſdem Meridiani partem diſtare, ſciotericis inſtrumentis deprehenſum refert. Intervallū autem 20000 ſtadiorum ponit, unde ambitus 300000 elicietur, tantus enim numerus exurget, ſi

20000



20000 per 15 multiplicaveris. Eratosthenes (si Straboni, Vitruvio, Plinio, & Censorino credimus) 252000 complecti voluit. Hipparchus (attestante etiam Plinio) adjecit stadiorum paulo minus 25000: Strabo eadem qua Eratosthenes usum mensurâ, cum alibi tum in fine 2. Geograph. docet: ubi inquit, ex Hipparchi sententia quantitatem terræ continere stadiorum 252000 quantam & Eratosthenes tradit. Eratostheni suffragatur fabulosa Dionysiodori relatio apud Plin. lib. 2. ca. ult. *In sepulchro Dionysiodori reperta est (inquit) epistola scripta ad superiores, qua testabatur semidiametrum terræ ad 4200 stadiorum continere.* Hic numerus sexies assumptus 2520000 producit.

Vitru. lib.  
2. c. 6. Plin.  
li. 2. c. 108.  
Cens. c. 13.

Cleomedes, Eratosthenis & Posidonij observata referens, aliquanto minorem circuitum ex Eratosthenis sententia facit, nempe 250000 stadiorum. Syenem enim & Alexandriam sub eodem ponit Meridiano. Syene sub æstivo posita Tropico, Sole Principium Cancris obtinente, gnomones habet meridie expertes umbrarum. Profundum puteum in hujus rei fidem effossum eodem tempore totum illuminatum id ipsum testari, ante Plinium retulit Strabo. Alexandriae Sole in eodem loco constituto, eodem tempore gnomon umbram projicit ad quinquagesimam partem peripheriæ, qui ad rectos angulos erigitur, ut ejus summitas ejusdem peripheriæ sit centrum. Intervallum autem Syenes & Alexandriae esse stadiorum 5000, præter Eratosthenem, Plinius & sæpiusculè Strabo posuerunt. Quod si 5000 per 50. multiplicaveris, exsurgit numerus 250000. quot stadia universæ terræ ambitui Eratosthenes attribuit. Posidonius (methodo non multum ab simili) circumferentiam terræ 240000 stadia continere, nititur probare. Primum Rhodum & Alexandriam sub eodem posita Meridiano pro confesso sumit, quod & Ptolemæus agnoscit l. 5. Alm. c. 3. Canobus autem stella lucidissima in temone Argus (quam Græcia non cernit, ideoque videtur Aratus ejus non meminisse) in Rhodo primum conspicitur; at in ipso horizonte, statimque ad mundi conversionem occidit; aut (ut ait Proclus) ægrè conspicitur, aut certè ab editis locis. At cum à Rhodo Alexandriam usque perveneris, sublimis apparet. Quartæ enim signi parte, cum ad Meridianum accesserit, ab horizonte attollitur, hoc est quadragesima octava parte Meridiani per Rhodum & Alexandriam. (Eadem Proclo mens, si legeris, *Canobum in Alexandria conspicuè cerni quarta circiter signi portione supra horizontem extante.* Mendosè vulgo legitur, *in Alexandria non cerni*, fortasse à Pavis pro iu-

Cleom. l. 1.

Li. 2. c. 75.

Lib. de  
Spha.



*Qaves irrepsit.*) Distantiam autem Rhodi & Alexandriae definit stadiorum 5000 quantam & Plinius. 5000 autem per 48 multiplicata, producant 240000 numerum stadiorum totius terrae circumferentiae congruentem ex Posidonij sententia. Ptolemaeus passim in Geographia, & ante eum Maximus Tirijs, 500 stadia tribuerunt uni gradui maximi in terra circuli, qualium totus ambitus 360 continet, ut tota circumferentia complectatur non amplius 180000 stadijs. Ptolemæi mensuram terrestris ambitus antiquioribus cognitam, ab ipso Posidonio approbatam testis est Strabo lib. 2 Geographiæ.

*Causa diff-  
sensus.*

Magna hæc dissensio de terrestris ambitus mensura. Et quævis opinio maximorum virorum autoritate se tuetur. Quem sequamur, dubium. Causam quæris dissensus? A quæ hoc in dubio. Nonius & Peuce-  
rus diversis usos stadijs volunt. Maurolycus & Philander è passuum diversitate stadiorum discrimen ortum arbitrantur. Maurolycus multum desudat, ut consensum faciat, at frustra, non patiuntur. Multa docent passuum genera. Verum. At stadiorum quærimus, saltem pedum. Passibus (quod sciam) non dimetiebantur Græci suum stadium, sed pedibus aut *ὀρυσίαις*. est autem *ὀρυσία* extensionis manuum cum interjecto pectore mensura, sex pedes complectens, familiaris nostris nauris mensura in dimetienda Maris aut fluminum profunditate. Passum multi vertunt, nescio quàm rectè, judicenteruditi. Xylander in Strabone transferendo ulnam semper vertit. Stadium pedes habet 600 inquit Herodotus benè antiquus Græcæ scriptor, idem Suidas multò recentior. Stadium continet orgyas 100: orgya cubita 4: cubitum pedem unum cum dimidio vel 24. digitos, attestante Herone Mechamico (saltem ejus Scholiaste) ex infima opinor Græciæ antiquitate. At Censorinus, inquires, tria stadiorum genera proponit. Italicum quod est 625 pedum, quod in mundi mensura potissimum intelligendum esse docet. Aliud est Olympicum, quod 600 pedum. Prætereaque Pythicum pedes 1000 complexum. Verùm enim verò omisso stadio Pythico, si attentius paulo rem consideremus, deprehenditur, Italicum & Olympicum, utcunque nomine discrepēt, se non differre. Italicum enim quod 625 pedes Rom. complectitur, quod & Plin. testatur l. 2 c. 23 æquale erit Olimpico quod 600 pedes Græcos continet; quoniam 600 pedes Græci æquantur 625 Romanis pedibus. Pes enim Græcorum excedit pedem Romanum vigesima quarta parte, quanta est differentia inter 600 & 625.

In tanta



In tanta opinionum diversitate conjiciamus & nos, quæ tanti dissensus causa, & quem ex his sequamur. Mittamus autem Aristotelem, cujus assertio solo nomine defenditur. Cleomedis enim opinionem de 200000 stadiis vix mentione nostra dignaremur, nisi Archimedes Syracusanus ejusdem, ut suo ævo non penitus reprobata, meminisset. Discutiamus Eratosthenem & Posidonium, quorum opiniones certis fundamentis niti videntur. Causam dissensus existimamus, quod Eratosthenes & Posidonius locorum distantias quas tradunt dimensi non sunt, sed ex vulgari peregrinantium traditione acceperunt: præterquã quod Posidonius in suis etiam observatis longius aberravit. Ptolemæus autem ex dimensis intervallis suam firmatam esse sententiam, cum ait: Cognitæ terræ latitudo est partium 76 unius tertie ex una duodecima vel integrorum grad. 80 stadiorum 40000, ut unus gradus complectatur stadia 500. quod ex accuratioribus dimensionibus deprehensum est. Eratosthenem in designandis locorum intervallis longius aberrantem insectatur Hipparchus, & incredibilem locorum ignorantiam refellit, attestante Strabone l. 1. Ab Alexandria Carthaginẽ usque ultra 13 stadiorum millia numerat Eratosthenes, cum non sint plura 9 millibus, inquit Strabo. Posidonius quod ponit intervallum, inter Rhodum & Alexandriam 5000 stadiorum, ex nautarum opinione desumptum, quorũ alij 4000 alij 5000 tribuunt, fatetur apud Strabonem Eratosthenes: se autem deprehendisse ait sciotericis instrumentis, non esse majus 3750. Strabo paulo etiam minorem facit distantiam, stadiorum 3640. Ptolemæum itaque qui accuratioribus dimensionibus suam comprobata & stabilitam fatetur opinionem, veritati propius accessisse par est ut credamus.

Franciscus Maurolycus Messanensis Abbas, dum Posidonio adversus Ptolemæum patrocinatur, incautus decipitur. Suspectam habet Ptolemæi fidem in designanda Rhodi latitudine, quam posuit graduum 36 Corruptos in tabulis Geographicis esse numeros monet, quod certissimum. In Rhodiensi latitudine quæ probet, videamus. *Posidonij*, inquit, *observata non minorem faciunt ejus latitudinem gr. 38 cum dimidio.* nisi in Alexandria etiam latitudine falsus sit Ptolemæus, quod non posse fieri existimat Maurolycus. At nos contra dicimus, Ptolemæum adversari huic latitudini, non solum in libris Geographicis, sed passim in libris magnæ constructionis præsertim 6 c. l. 2 ubi eandem Rhodi latitudinem, quam in Geographicis tradit, adjicit etiam maxi-



mi dici quantitatem, Meridianas gnomonum umbras tum æquinoctiales tum Tropicas, quæ omnia id ipsum evincunt, eandem etiam latitudinem sæpiusculè in Planisphærio ponit, nisi dixeris, in eo etiam transferendo Massem interpretem Arabicum, aut qui ex Arabico Latinum fecit, Rodolphum Burgensem nobis imposuisse. Usque dum sumus ergo pares. At Posidonio (inquit) favent Proclus, & Eudoxi Cnidij observata à Strabone tradita. Hoc quid sit videamus. Posidonius (inquit Strabo) refert se de excelsâ quadam domo in urbe à freto Gaditano ad 400 stadia distante, stellam vidiſſe, quam existimavit eſſe Canobum, & qui inde versus meridiem ex Hispania paululum progressi sunt, fatentur se eum viderere. Est etiam in Cnido Eudoxi specula, non multo domibus sublimior, ex qua is fertur Canobum spectasse. Est autem Cnidus in Rhodio Climate, in quo & Gades & ejus ora maritima. Hæc Strabo. Quid hinc contra Ptolemæum? Canobum in Cnido conspici posse? Non negamus. Cnidum in Rhodiaco Climate? Agnoscit Ptolemæus, neque enim majorem gr. 36. 15. m. statuit l. 5. Geograph. Annon in Cnidia etiam latitudine falsus Ptolemæus? Non majorem eſſe Rhodiensem latitudinem quàm Ptolemæus posuit, è Proclo etiam convincitur. Longissimum diem Rhodi horarum 14. cum dimidio facit Proclus. Equalem Ptolemæus Rhodo & Cnido attribuit. Idem Strabo, nisi quod semel horarum 14. posuit, unde sequeretur minorem habere latitudinem. Sic autem habent Procli verba. In Rhodio Horizonte ita Tropicus ab horizonte dirigitur, ut cum circulus universus in 48 partes secetur, 29 supra horizontem appareant, 19 sub terra lateant. Ex qua divisione sequitur, ut apud Rhodios longissimus dies horas æquinoctiales habeat 14. cum dimidia, nox autem 9. cum dimidia. Non inficior, Posidonij traditionem de portione Meridiani verticibus Rhodi & Alexandriæ intercepta, Plinium, Proclum aliosque fefelliſſe. Alfraganus secundum suum Clima ducit per Cyprum & Rhodum, ejusdem maximum diem facit horarum 14. cum dimidia, latitudinem 36. cum duabus tertijs, exigua admodum differentia ab ipso Ptolemæo. Ipse etiam Maurolycus, dum in Dialogis Cosmograph. parallellos numerat, eum qui per Rhodum ducitur latitud. 36. cum parte duodecima facit, longiusculè à Posidonio discedens. Eratosthenis etiam observationes Posidonio plurimum adversantur. Intervallum Rhodi & Alexand. 3750 stadiorum sciotericis gnomonib. deprehendit Eratosthenes. Hoc quid sit dispiciamus. Latitudinis differentiam inter hæc loca, sciotericis suo more deprehendit graduum



graduum 5 paulo plus. Huic differentiae ex assumpta sua de ambitu terrae mensura (700 stadia cuique gradui numerās) 3650 stadia tribuit. Neque enim aliud artificium novimus, quo per scioterica stadiorum numerus inter duo loca investigari possit, nisi prius stadiorum numerum vel totius terrae circumferentiae, vel datae ejus parti convenientem assumpserimus.

Videamus jam nunc, ecquid ex ipsius Eratosthenis observatis comprobare possimus, non posse Posidonij nedum Eratosthenis de mensura terrae opinionem defendi. Observationem autem de differentia latitudinis Alexandriae & Syenes non excutimus, ut probemus, ex ipsius Eratosthenis assumptis, non posse ambitum terrae ultra 241610 stadia extendi, quod demonstrat Petrus Nonius 18 c. l. 2 de Navigatione. Neque quaerimus, quam recte horum locorum intervallum faciat stadiorum 5000, cum Solinus ab Oceano ad usque Meroem non numeret amplius 620 milliaribus, quae sunt stadia 4960. Meroë autem longe ultra Syenem sita est. Neque interpellabo de exigua illa differentia, qua dissentit ab eo Plinius, qui ab Elephantine Insula (quae est infra novissimum Cataractem 3 M. pass. & supra Syenem 16 M. pass.) Alexand. usque intervallum ponit 586 M. P. unde inter Syenem & Alexandriam spatium non erit amplius stadijs 4560. Aliam longe hujus nostrae probationis rationem inimus. Vnicum hoc postulamus: Quantum spatium sui orbis Solis diameter occupat, per simile spatium in orbe terrestri gnomones fieri umbrarum expertes, cum Sol verticibus imminet. Hoc si concedatur (quod ultro apud Cleomedem fatetur Posidonius) evicimus, Solem in principio Cancrī constitutum, Syenes vertici imminere, ibique & ad 300 circiter hinc inde stadia, gnomones umbrarum immunes facere tradit Eratosthenes. Videamus, quantam sui orbis partem Solis diameter subtendat. Hinc enim, si vera sit quae praecessit Eratosthenis positio, elicietur ambitus terrae mensura. Firmicus Maternus, Solis Lunaeque diametrum non minorem uno gradu facit. At at aberrat longius. Majorem justo quamque nos postulamus quantitatem ascripsit. Aegyptij per instrumenta hydroscopica invenerunt Solis diametrum occupare septingentesimam quinquagesimam partem sui orbis. Quod si septingentesimae quinquagesimae parti totius ambitus terrae respondeant stadia 300, totus ambitus non erit major 225000. Instrumenti hujus fabricam & usum docet Proclus cap. 3 designationum Astronomicarum. Multa Theon de eo in Com.



Com. in 5 l. Alm. Ptol. & Maurolycus Dial. 3 Cosmograph. At he-  
observationis genus Ptolemæo non probatur. Multis obnoxium er-  
roribus ostendunt Theon & Proclus. Vltcrius ergo discutiamus o-  
porter.

Aristarchus Samius, referente Archimede, Solem apparentem se-  
ptingentesimam quinquagesimam partem circuli Zodiaci obtinere  
dixit, id est 30 m. & æqualem esse apparenti Lunæ diametro 7 & 8 (ut  
memini) prop. sui lib. de mag. & dist. Solis & Lunæ. Idem voluit Ari-  
starchus. Interim non explico me ab eo scrupulo, quem iniecit mihi  
suppositio ejusdem Aristarchi in eodē libro de diametro Lunæ 2 gr.  
Archimedes Syracusanus ex suis observatis per instrumenta dioptrica  
definivit, Solis diametrum majorem esse ducentesima parte anguli re-  
cti, hoc est, 27 m. minorem vero centesima sexagesima quarta parte  
anguli item recti, hoc est 33 m. Atqui non adeo fidendum esse his etiā  
observatis per instrumenta dioptrica, ut diametros Luminarium inde  
exactè sumi posse credendum sit, idem fatetur Archimedes; cum ne-  
que visus, neque manus, neque instrumenta quibus experiri oportet  
satis habeant fidei ad exquisitam demonstrationem. Ptolemæus per  
eandem instrumenta dioptrica, itemque per eclipsium rationem, depre-  
hendit Solis diametrum esse 31 m. 20 sec. æqualem Lunæ, cum est in  
maximā à terrā distantia, utpote in plenilunio & coitu. Quod autem  
hanc magnitudinem eandem perpetuo & immutabilem dixit, suspe-  
ctum habere videtur Proclus 3 cap. designation. Astron. motus Solsi-  
genis Peripatetici autoritate, qui in ijs libris, quos inscripsit de revo-  
lutionibus, advertit, in eclipsibus Solaribus quandoque perspicui orbi-  
culum quendam Solis luminosum, extrema Lunæ undiquaque ambi-  
entem, quod si verum sit, fieri non potest, ut Solis apparens magnitudo  
semper sit equalis Lunæ in oppositionibus & conjunctionibus. Hac  
fortasse de causa, qui Ptolemæum secuti sunt, accuratius ista exami-  
nare conati. Primus Albateni deprehendit, Solis diametrum in Apo-  
gæo sui eccentrici esse 31 m. 20 sec. quantam voluit Ptolemæus, sed  
in Perigæo esse 33 m. in 40 sec. Ultra hoc Copernicus invenit dia-  
metrum in maxima distantia 31 m. 48 sec. cum proxime ad terram  
fertur 33 m. 54 sec. Sequamur quod videtur in medio positum. Acci-  
piamus diametrum 32 m. Vnde ex superius præmissis si 300 stadia re-  
spondeant 32 m. totus ambitus non erit major stadijs 202500. minor  
ambitus, quam Posidonius, multo minor quàm quem Eratosthenes  
posuit.



posuit. Hæc de mensura terrestris ambitus è Græcorum traditionibus dicta sunt, salvo maximorum virorum iudicio.

Nostrates 60 milliaria vel 20 Leucas uni gradui tribuunt, ut tota circumferentia sit milliariorum 21600, idque ad Ptolemæi mentem exactè congruit. Pedem enim nostrum Anglicum Græcorum pedi æqualem invenimus, comparatione facta cum Græcorum pede, quem Agricola & alij ex antiquis monumentis tradiderunt. Milliæ autem 5000 pedes complectitur nostrates. Stadium 600 Græcos. Si mensuram stadij per 500 (tot enim stadia Ptolemæus uni gradui tribuit) itè si milliæ mensuram, quæ est 5000 pedum, per 60 (quot nos milliaria uni gradui damus) multiplices, par utrinque numerus producitur 300000 sc. pedum: ut ex his fundamentis extra controversiam sit, receptam. Nostratium Nautarum opinionem cum Ptolemaica convenire.

Itali 60 item milliaria unius gradus mensuram faciunt, sed mensura minor est Ptolemaica. Germani 15 tribuunt uni gradui, quorum singula quatuor milliaria Italica complectuntur: æquè infra Ptolemæum. Nam ex eorum traditione uni gradui respondent non amplius 480 stadia, quum singula milliaria Italica complectantur 8 stadia, (nisi forte magis placet Polybij sententia, qui apud Strabonem præter 8 stadia 2 plethra, hoc est, tertiã partem stadij cuilibet milliari convenire docet, quæ est ipsissima nostri milliæ mensura.) Appianus docet 15 milliaria Germanica equari 60 Italicis: 60 Italica 480 stadijs, minor mensura Ptolemaicâ 20 stadijs: milliæ Italicis 2, cum dimidio.

Hispani uni gradui tribuunt Leucas, partim 16 cum duabus tertijs, partim 17 cum dimidia. Quanta sit eorum mensura comparata stadijs Græcorum vel milliæ nostris, Italicis aut Germanicis, nondum habeo compertum. Videtur Nonius Leucam Hispanicam schoeno aut Parasange æquare, quod si verum sit, qui Leucas 16 cum duabus tertijs tribuunt uni gradui, æqualem mensuram Ptolemaicæ assumunt: qui 17 cum dimidio, aliquanto majorem.

Restant Arabum traditiones de hac re. Eorum antiquiores circumferentiæ totius terræ addixerunt milliariorum 24000, sive parasangas 8000. ita ut unus gradus complectatur 66 milliaria cum duab. tertijs. Hac mensura utitur Alhazenus in fine libelli de crepusculis. Alfraganus & recentiores à temporibus Almanonis 20400 milliaria amplexi sunt,



sunt, ut gradus unus 56 cum parte tertia, milliaria contineat. *Abilfeda* in principio operis Geographici memorat, præcepto Almanonis regis Arabum, seu Caliphæ Babylonij, quosdam ablegatos, qui in campis Singar & vicinis maribus, juxta rectum iter & poli situm observarent, quot milliaria responderent uni gradui cœlesti & deprehensum esse ab ijs in conficiendo uno gradu 56 milliaria sine ulla fractione, nonnunquam præter 56 tertiam partem milliariis requiri, hoc est 1333 cubita cum duabus tertijs. Quæ sit ratio milliariis Arabici, ad nostra, Italica, vel Germanica comparati, non est explicatu facile. Non minus 10 stadijs, unumquodque complecti arbitramur. Parasangæ (ut Iacobus Christmannus ex *Abilfeda* magno Arabum Geographo nos docet) tria milliaria Arabica continet, tam apud vetustiores quam recentiores. Parasangæ autem (ut ex Herodoto, Xenophonte & alijs patet) triginta stadia complectitur, ideo milliare unum 10 stadia comprehendit. Hoc accedit ad faciendam fidem, Duo Cubitorum genera Græci tradiderunt. Commune sive mediocre, quod pedi Græco uni & dimidio æquatur, & continet digitos 24, qualium pes habet 16. Alter cubitus erat regius in usu apud Persas, major communi tribus digitis. Alfraganus autem docet, milliare Arabicum continere 4000 cubita, prout cubitū est in mediocri mensura. Hic cubitus si sit æqualis Græco, continebit unum milliare 6000 pedes Græcos, quot 10 stadia cōplectuntur. Parasangæ autem cum alijs 40 stadia, alijs 60 annumerent: nemo tamen minus 30 attribuit: cui opinioni si cum Herodoto, Xenophonte & alijs acquiescamus (neque enim nostri est instituti discutere, utrum diversis in locis, diversis Parasangæ mēsuris usi sint, ut existimare videtur Strabo qui de Schoenis Ægyptiorum id ipsum observavit, cum Nilo flumine, ab urbe ad urbem subveheretur, aliās alijs schoeni mensuris usos esse Ægyptios subindicans) si inquam ijs acquiescamus, qui 30 stadia uni Parasangæ attribuunt, milliare unū non minus stadijs 10 comprehendet. Hæ conjecturæ si veræ sint, non est assentiendum summis viris P. Nonio & Iacobo Christmanno, qui Arabicum milliare æquant Italico. In tanta opinionum diversitate de mensura terræ, sequatur quisque quem libeat. Nisi autē Arabum recentiores nobis obstarent, qui dimensis etiam itineribus ferunt suam sententiam comprobata, non dubitarem Ptolemæi opinionem cæteris antepone. Omnium opinionum, quæ aliquid habent probabilitatis, hæc est Synopsis.

*Ambitus*



|   |                   |                                     |
|---|-------------------|-------------------------------------|
| Ambitus<br>universæ<br>terræ est<br>stadiorū.     | 252000            | { Straboni.<br>Hipparcho.           |
|   | 250000            | { Eratostheni.                      |
|   | 240000            | { Posidonio & Antiquioribus Arabum. |
|   | 180000            | { Ptolemæo & nostratibus.           |
|   | 204000            | { Arabibus recentior.               |
|   | 172800            | { Italis & Germanis.                |
| Unius<br>gradus<br>mensura<br>est stadi-<br>orum. | 700               | { Straboni.<br>Hipparcho.           |
|   | 694 $\frac{1}{2}$ | { Eratostheni.                      |
|   | 666 $\frac{2}{3}$ | { Posidonio & Arab. antiqu.         |
|   | 500               | { Ptolemæo & Nostratibus.           |
|   | 566 $\frac{2}{3}$ | { Recent. Arab.                     |
|   | 480               | { Italis.<br>Germanis.              |
| Milli-<br>are est<br>stadio-<br>rum.              | 8                 | ut Italicum.                        |
|   | 8 $\frac{1}{2}$   | Anglicum.                           |
|   | 10                | Arabicum.                           |
|   | 32                | Germanicum.                         |



Ad inventionem peripheriæ seu ambitus globi terreni assumuntur hæ hypotheses: 1 quod maximus terræ circulus in 360 gradus exemplo celestium distribuat. 2 quod unus maximi terræ circuli gradus 500 stadia seu passuum Romanorum 62500 expleat, quibus quindecim-milliaria Germanica cum  $\frac{1}{2}$  respondent seu æquivalent: quemadmodum divisio stadiorum in 32 ostendit, id est, si uni gradui 15 milliaria Germanica attribuantur. 3 quod 32 stadia constituent unum miliare Germanicum.



His præsumtis, multiplicantur 360 grad. per 15 milliaria: & producuntur milliaria Germanica 5400. Seu multiplicantur 360 grad. per 500 stadia; & fiunt stadia 18000. Et tanta est terræ perimeter seu peripheria.

Si autem 360 multiplicentur per 60 fiunt milliaria Italica & Anglica 21600; si vero per 25 fiunt milliaria Francica 9000. Vnde talis constituenda tabella:

Gradus




# ET EORVM VSV PARS III.

77

|   |     |            |                      |      |         |
|---|-----|------------|----------------------|------|---------|
| Gradus unus<br>continet mil-<br>liaria, | 15  | Germanica. | Milliare<br>quodque. | 4000 | Passus. |
|   | 60  | Italica.   |                      | 1000 |         |
|   | 60  | Anglica.   |                      | 1000 |         |
|   | 22  | Francica.  |                      | 2400 |         |
|   | 17½ | Hispanica. |                      |      |         |

Simili ratione possumus quoque facillimo negotio terræ ambitum investi-  
gare ex aliqua stella fixa, ut ex spica virginis vel quavis alia stella. Si enim in ter-  
ra sumantur sub eodem meridiano duo loca, quorum intervallum rectilineum  
exploratum habeatur, & in utroque loco altitudo meridiana stellæ cognite ob-  
servetur, differentia altitudinum erit numerus graduum superficiei terræ inter  
duo loca interjectorum. Quare cum notum sit, quemadmodum jam indicatum  
est, quot miliaria dictis gradibus respondeant, nullo modo ignorari poterit  
quotnam miliaria toti terræ circuitui competant. Exēpli gratia; *Basilea* & *Wor-  
matia* sunt sub eodem meridiano, elevatio poli *Basilea* 47 grad. 30. min. *Worma-  
tia* 49 grad. 45 min. differentia 2 grad. 15 min. Distantia 34 miliarium minus  
quadrante. Dicendum ergo: quemadmodum se habent 2 grad. 15 min. ad 34  
miliaria minus quadrante: sic se habent 360 gradus, ad 5400 miliaria Germa-  
nica.

## Q V A R T A P A R S. D E G L O B O R V M V S V.



A C T E N V S de Globis, eorum dimen-  
sione, circulis, & instrumentis ad eorum u-  
sum necessarijs. Sequitur, ut quam varius  
& multiplex sit eorum usus videamus, &  
ad praxim deveniamus. Eorū usus Astro-  
nomiæ, Geographiæ, & artis navigandi  
cognitionem expetentibus apprimè ne-  
cessarius. Nam & ad inveniendum Solis  
locum, longitudes, latitudes, & posi-  
tiones locorum, dierum quātitates & ho-  
ras, itemque ad inveniendam longitudinem, latitudinem, declinatio-  
nem, ascensiones rectas & obliquas, amplitudinem ortus & occasus

N 3

Solis



Solis & stellarum, aliaque huiusmodi propemodum infinita, methodum tradunt facilimam. Præcipuos usus brevi percurramus, singulos pertractare nimis prolixum. Hæc autem omnia quæ Globorum usu deprehenduntur, multo accuratius numerorum ope, per doctrinam Triangulorum Planorum & Sphericorum, inveniri posse norunt Mathematicos periti. Sed hoc artificium, præterquam quòd tædium ob prolixitatem afferat, multam in Mathematicis exercitationem desiderat. At per Globorum praxim, promptè, expeditè, vix aliquâ mathematicos cognitione adhibita, inveniri possunt.

Ad plenioram intellectionem eorum, quæ deinceps dicentur, duo præmittenda veniunt. Quorum primum *de Globi positione* aget, alterum *de Climatibus*.

Quod ad *globi positionem*, ante omnia is collocandus horizonti ad perpendicularum respondens. 2 ventorum distinctiones, quæ sunt in artificiali horizonte, veri horizontis ventis ita adæquari debent, ut ortus ortum, occidens occidentem &c. spectet. Cui rei serviet præcipue compassus qui Globi pedimento additus habetur.

Collocato eum in modum globo, volvi ac revolvi potest, ità tamen ne basis seu pedimentum loco suo sollicitetur, habendaque ratio latitudinis loci, in quo degis: quæ prout vel major vel minor fuerit, ad eum quoque modum elevandus est supra horizontem polus. Nam quanta fuerit loci latitudo, tantum quoque supra horizontem polus assurgit. Exempli gratia, alicujus loci latitudo borealis sit 50. 51 vel 52 grad. vel etiam plurium aut pauciorum, elevandus est totidem etiam gradibus supra horizontem polus Borealis. Si vero latitudo fuerit Australis, contrario modo agendum, constituendusque tum supra horizontem polus australis. At sub æquatore, ubi latitudo nulla invenitur, uterque polus Australis & borealis horizonti imponendus.

**C L I M A** porro est spatium terræ habitabilis inter duos circulos æquatori parallelos comprehensum, in quo dies longissima semisse horæ variatur. Qui sub æquatore habitant diem nocti æqualem nempe 12 horarum perpetuo habent; at progredientibus ab æquinoctiali versus polorum alterutrum semper fit major inæqualitas dierum artificialium. ex qua variatione dictum artificialium, diversitas climatum desumitur ac distinguitur. Quandocunque enim mutatio diei in loco aliquo, quod ad semissem horæ, contingit, illico etiam aliud fit clima. Assumserunt autem Geographi in quolibet climate parallelos tres, quorum duo extremi, primus nempe & tertius, cōprehendunt & terminant quodlibet clima. Secundus autem per climatis medium transit, unde parallelorum ad climata ratio est dupla. Climata enim ab invicem, ut diximus, semihoris distant: paralleli horæ quadrantibus distinguuntur.

Ad numerum climatum quod attinet, a veteribus communiter septem climata, a Ptolemæo in tabulis ascensionum, secundo magnæ constructionis etiam novem agnoscuntur, quæ sua nomina ab insigni loco, monte vel fluvio, per quæ  
medium



medium climatis transit, traxerunt. Primum clima ab æquinoctiali versus Polum arcticum *ἀπὸ μεροῦς* vel per Meroën vocatur, eo quod medium hujus climatis per Meroën, quæ est insula Africæ, Nilo circumfusa, transit: ubi dies longissimus est 13 horarum. principium ergo ejus 12 cum dodrâte. Huic opponitur clima Austrinum, quod appellari possit, Antidiameroës. Sed hæc climata neque Ptolomæus neque veterum quisquam posuit. Simili tamen & eadem ratione & illud terræ latus in climata distingui potest, reservatis iisdem Borealium locorum nominibus, ac præposita Græca dictione *ἀντι*, quæ contra sonat: Modus & schema hujus tale esto:

### Climata Borealia.

1. Diameroës:
2. Diasyenes,
3. Dialexandrias,
4. Diarhodu,
5. Diarhomes,
6. Diapontu,
7. Diaboristhenes,
8. Diabritannias,
9. Diatanaidos.

### Climata Australia.

- Antidiameroës.
- Antidiasyenes.
- Antidialexandrias.
- Antidiarhodu.
- Antidiarhomes.
- Antidiapontu.
- Antidiaboristhenes.
- Antidiabritannias.
- Antidiatanaidos.

Alij, inter quos est Ioh. Gigas Systematis Cosmographici lib. 2 cap. 2 prob. 1, minus aptam hanc climatum divisionem censent. 1, quia summa est eorum inæqualitas, ita ut latitudo primi sit plus, quam 117 miliarium Germanicorum; postremi vix quadrantis miliaris. 2 quia fundamentum illud, quod horarum incremento nititur, ficulneum & nullius propemodum utilitatis esse videtur, cum æque facile sit, diei quantitatem inquirere, ac climatis numerum. Longe i- *Nova Cli-*  
gitur satius fore idem putat, quodlibet hæmisphærium per decades graduum, *matum va-*  
æqualiter in novem climata dividere. Sic primum clima inciperet in Equinocti- *lio.*  
ali & desineret in elevatione poli 10 graduum, quod *Æthiopicum* vocari posset.  
*Secundum* pertingeret ad 20 gradum & esset *Arabicum*, quia pars Arabiæ felicis  
in eo sita. *Tertium* usque ad 30 gradum, *Ægyptiacum*. *Quartum* ad 40 usque gra-  
dum *Syriacum*. *Quintum* ad 50 usque gradum, *Italicum*. *Sextum* ad 60 gradum  
usque *Anglicum* aut *Germanicum*. *Septimum* usque ad gradum 70 *Suedicum* aut  
*Lappicum*. *Octavum* ad 80 usque, *Glaciale*. *Nonum* ad polum usque *Polare*.

Ab altera æquinoctialis parte similis esset ratio: & hoc modo quodlibet hæ-  
misphærium novem haberet climata, quorum septem habitationi satis com-  
moda, parallelis in duplo numero ad quintum quemque gradum. Cognoscitur  
situs cujuslibet loci numero graduum elevationis: sic Roma quia ultra 40 gra-  
dus habet, est in quarto, Westphalia in quinto, Sicilia in tertio; *Calecutum*, Indiæ  
primaria urbs, in secundo, *Zeilan* in primo, & sic deinceps.



## CAPVT I.

*De longitudine, latitudine, distantia, & positionis angulo, vel situ locorum, in Globo terrestri expressorum.*

**T**ERMINVM metiendæ longitudinis locorum, antiquiores à Ptolemæi usque temporibus posuerunt Meridianum per Fortunatas Insulas ductū. Canarias hodie dici receptum est à plurimis; quàm rectè, non examinamus. Obiter monemus, latitudinem Ptolemaicam Fortunatarum, longiusculè aberrare à latitudine Canariensium, propius accedere ad latitudinem Insularum, quas hodie vocant Capitis Viridis. Fortunatas omnes Ptolemæus intra gradum 10 30 m. & grad. 16 latitudinis boreæ posuit. Canarię autem 27 minimum ab æquatore gradibus remotæ sunt. Arabes intimum recessum Oceani Atlantici principium numerandæ longitudinis statuerunt, à quo Fortunatas insulas grad. 10 ad Occidentem distare, Iacob. Christmānus ex Abilfeda docet. Recentiores plurimum ab Insulis, quas Canarias vocant, longitudes numerant. Nonnulli ab ijs, quas Açores nominant: & ab hoc termino in his Globis longitudes numerantur.

Est igitur longitudo, arcus æquatoris interceptus meridianis dati loci & Insulæ S. Michaelis (quæ una est Açorensiū) vel alterius cuiusvis loci, unde longitudinis initium determinare solent.

Si verò longitudinem alicujus loci in Globo expressi cognitam velis, eundem locum meridiano adijunge, & signato loco æquatoris quē meridianus pertransit, numera à Meridiano Insulæ S. Michaelis gradus æquatoris ad eum locum interceptos, tot enim sunt gradus longitudinis dati loci.

Eodem modo & differentiam longitudinis inter duo quævis loca expressa mensurare poteris. Est enim differentia longitudinis nihil aliud quàm arcus æquatoris interceptus duorum datorum locorum meridianis. Differentiam hanc longitudinis observatione investigandi multi multos modos tradere conati sunt. Certissimam rationem esse per eclipses præsertim Lunares, eruditioribus in confesso est. Sed eclipses rarò accidunt, rarius conspiciuntur, rarissimè ac paucissimis locis ab artificibus observantur: unde paucorum locorum longitudes hac



nes hac ratione designatæ inveniuntur. Orontius & ante eum Iohannes Wernerus, ex cognito, ut præsupponunt, Lunæ motu, ejusque transitu per alicujus loci meridianum, differentiam longitudinis dari posse arbitrantur. Labilis & inconstans ratio, multis subjecta difficultatibus.

*Locorum longitudes ex Eclipsibus  
observandi ratio.*

Ex ephemeridibus recte calculatis, aut ex Tabulis Prutenicis, sive alterius docti mathematici exquisito calculo cognoscendum, qua hora eclipsis aliqua Lunæ contingat eo in loco, ad quem tabulæ constructæ sunt: Deinde eadem eclipsis observanda in loco illo, cujus longitudo quæritur: quod si in horis & minutis cum eclipsi ex tabulis excepta convenerit, dicendum loca illa eandem habere longitudinem, & sub eodem meridiano sita esse: si vero numerus horarum loci fuerit major, erit quoque locus orientior. minor horarum numerus auferatur de majori, quod vero relinquitur in gradus & minuta convertatur, multiplicando horas per quindecim & minuta horaria (si aliqua adfuerint) per quatuor dividendo: sic enim resurgent gradus, & si quæ minuta post divisionem superfuerint, per quindecim rursus multiplicentur, & provenient minuta graduum quibus loca inter se distant: quæ distantia, longitudinum differentia appellatur. Hæc differentia ad longitudinem loci illius, ad quem tabulæ constructæ sunt, addenda, si locus sit orientior. Econtrario autem auferenda ab eadem longitudine, si fuerit occidentior. Exemplum tale proponit Adrianus Adriani Metius *Exemplum* in Sphærica sua Doctrina: Ex tabulis Prutenicis exquisita calculatione anno 1598 futurum invenio initium eclipsis Lunaris Februarij die undecimo hora matutina 4 minuto 16 idque in civitate Borussia Regiomonte videlicet, cujus longitudo sive distantia ab insulis Canarijs est 41 gr. 16. ad hanc enim longitudinem tabulæ illæ constructæ sunt. Pono jam me eandem eclipsim observare Marpurgi ejusdem Februarij die hora 3 minuto 12. Quia hic horarum numerus minor est, patet etiam quod Marpurgum sit urbs occidentior quam Regiomons: auferatur itaque minor numerus de majori nempe 3 h. 12. ex 4 h. 16. residuum 1 h. 4. indicat differentiam longitudinum in horis, quæ 16 gr. efficiunt: hos itaque differentiarum gradus auferes denuo ex longitudine civitatis Regiomontanæ propter Marpurgi situm occidentaliorem, habebis longitudinem Civitatis Marpurgensis ab insulis Canarijs 25. 16.

Alij alias aggressi sunt: nempe per observatum spatium horarum æquinoctialium inter duorum locorum meridianos; quod deprehendi posse arbitrantur per horologia vel automata, vel hydraulica, vel arenaria, vel hujusmodi alia. Hæc omnia jam pridem excogitata, accuratiori



tiori examine & iudicio perpenſa, ab eruditioribus omnibus (ſaltem maturioris iudicii) rejecta ſunt & reprobatæ, neque enim quod deſideramus præſtabunt. At nugivendæ impoſtores, hæc aut alia his peiora magnâ cum oſtentione divulgant, & magno ære divendunt melioris notæ & conditionis hominibus, at minoris eruditionis ac iudicii. Horum instrumentorum errores & incertitudines non diſcutione. Obiter moneo, ut (quod vulgo dicunt) caveant emptores, ne emuncti ære ſerò ab impoſtorum laqueis ſe expediant. Apagetiſis nugaciſſimos homines cum ſuis tricis & quiſquilijs.

## CAPUT II.

DE LATITVDINE  
LOCORVM.

**L**ATITVDO eſt diſtantiæ, qua Zenith aut vertex alicujus loci ab æquatore removetur. Hanc ſi velis cognoscere, expreſſum aliquem locum in Globo, Meridiano applica, & numera gradus in Meridiano, quibus idem locus ab æquatore diſtat, tanta enim erit dati loci latitudo. Hoc etiam advertere licebit, latitudinem cujuſvis loci æqualem eſſe elevationi poli ejuſdem loci. Quot enim gradibus vertex alicujus loci diſtat ab æquatore, totidem polus ab Horizonte attolletur, ſi ejuſdem loci verticem ita ſtatuas, ut 90 gradibus Horizonte undiquaque diſtet.

Cum Latitudo loci cujuſvis æqualis ſit elevationi poli ejuſdem loci, operæpretium eſt cognoscere quomodo elevatio poli aut latitudo cujuſlibet regionis ex cœlo deprehendi queat per ſtellâ aliquam fixam polo ita vicinam, ut in data regione nunquam occidat. Hujus enim ſellæ obſervatur cum minima tum maxima altitudo, quarum utraque in meridiano contingit: Minima quidem infra, maxima ſupra polum: Quo factò, minima ſellæ altitudo addenda maximæ & collectæ ſummæ dimidium erit altitudo poli, itemque loci latitudo.

## EXEMPLVM.

Stella quæ prima trium eſt in cauda urſæ majoris, in minima ſua altitudine obſervatur Hardervici eſſe graduum circiter 12: ejuſdemque maxima altitudo ſupra polum poſita deprehenditur fere graduum 92. Hi altitudinum gradus in unam ſummam colligendi & conſtituunt grad. 104, quorum dimidium, nempe 52 gradus, eſt vera elevatio nec non Latitudo civitatis Hardervicane.





## CAPVT III.

DE DISTANTIA DVORVM  
 LOCORVM, ET ANGVLO  
 POSITIONIS VEL SITV  
 INVENIENDO.

**S**I Terreſtrem Globum ita ſtatuas, ut alterius datorum locorum  
 vertex 90 gradibus ab Horizonte undiquaque removeatur; &  
 quadrantem altitudinis eidem vertici affigas; deinde eoſque  
 quadrantem circumagas donec alterius loci verticem pertrāſcat: gra-  
 dus



duus quadrantis, duorum locorum verticibus intercepti, in stadia, miliaria, aut Leucas (ut libuerit) conversi, datorum locorum distantiam indicabunt. Quadrantis autē terminus ad Horizontem indicabit partem vel plagam mundi, in quam alter locorum ab altero vergat, sive angulum (ut vocant) positionis. Est enim positionis angulus is, qui cōprehenditur meridiano loci alicujus, & circulo majori per vertices datorum locorum transeunte. Hujus quantitas in Horizonte numeranda.

Londinum in Anglia, longitudinis est gr. 26: latitudinis Borealis graduum 51 cum dimidio. Ab hoc quærat distantia, & positionis angulus ad insulam S. Michaelis, quæ una est Açorensium. Hoc ut inveniamus, elevetur polus boreus grad. 15 cum dimidio; quanta est Latitudo Londini. Quadrantem altitudinis affigamus vertici; hoc est 51 cum dimidio grad. Bor. ab æquinoctiali. Inde circumferamus quadrantem hunc, usque dum transeat per insulam S. Michaelis. Et deprehendemus distantiam interceptam verticibus Londini & S. Michaelis esse graduum 11.40 m. proximè, Leucarum nostratum 280. & si observemus, in qua parte Horizontis quadrantis terminus insistat, deprehendemus angulum positionis esse inter Meridiem & Occidentem grad. 50 proximè, inter Africum & Africo ad Favonium, *Southwest, and Southwest and by West*: unde situs hujus insule à Londino patebit.

*Exempla.* Distantia locorum latitudine tantum differentium hoc modo invenitur. 1 auferatur minor latitudo à majore, resolvendo gradum in minuta si aliàs subtractio fieri non potest. 2 Gradus multiplicentur per quindecim, minuta verò dividantur per quatuor, & summa productorum erit distantia locorum datorum in miliaribus Germanicis communibus. Exempli gratia. *Basilea* Rauracorum & *Geneva* Sabaudia conveniunt longitudine, quæ utrobique eadem est, sed differunt latitudine quæ *Basilea* 47 grad. 30 min. *Geneva* 45 grad. 45 minut. Facta subtractione minoris à majore, differentia remanet unius gradus 45 minut. quibus respondent 26 miliaria cum quadrante, distantia scil. quæ sita.

Aliud: *Florentia* Hetruriae & *Venetia* sunt sub eodem meridiano, sed differunt parallelo, qui *Florentia* 43 grad. 40 min. *Venetia* 45 grad. præcise differentia 1 grad. 20 min. unde colligitur distantia 20 miliarium Germanicorum.

Quod si in diversis hemispherijs fuerint loca proposita 1 latitudinis gradus & minuta addenda. 2 aggregatum priori modo in miliaria resolvendum. Exempli gratia *Caput Bonæ spei* in Africa & *Constantinopolis* sunt fere sub eodem meridiano, sed in diversis hemispherijs. Elevatio poli Arctici Constantinopoli 43 grad. fere: *Bonæ spei* vero 35 grad. circiter poli Antartici. Summa 78 graduum, quibus respondent 1170 miliaria.

*Distantia*



# ET EORVM VSV PARS IV.

85

*Distancia locorum longitudine tantum differentium invenitur ita: Primo subtrahenda est minor longitudo à majori. 2. e tabella, quæ subjungitur, conſter quot milliaria gradui paralleli respondeant, quærendo gradum latitudinis in latere descendente & numerum milliarium e regione ſtatim excerpando. 3. Differentia longitudis in milliaria & minuta multiplicetur & habebitur quæſitum. Exempli gratia, Neapolis & Ilium ſive Troia ſunt in eadem latitudine 41 graduum, ubi gradui paralleli respondent 11 mill. 19 min. ſed differunt longitudine, quæ Neapoli 39 grad, 30 minut. Troia 55 grad. 50 minut. differentia 16 grad. 20 min. Cui respondent 184 mill. 50 min. diſtancia proxima inter Neapolim & Troiam. Tabellam, de qua dixi, ex Gigantis Coſmographiâ hic ſubijcimus.*

*Exempl.*

## TABELLA OSTENDENS QUANTITA-

*tem graduum longitudinis extra æquatorem in milliariſus Germanicis & minutis quorum ſexaginta milliare conſtituunt.*

| SCRVP. | MILLIAR. | GRADVS. | SCRVP. | MILLIAR. | GRADVS. | SCRVP. | MILLIAR. | GRADVS. |
|--------|----------|---------|--------|----------|---------|--------|----------|---------|
|        |          |         |        |          |         |        |          |         |
| 1      | 14       | 59      | 14     | 14       | 33      | 27     | 13       | 22      |
| 2      | 14       | 59      | 15     | 14       | 29      | 28     | 13       | 15      |
| 3      | 14       | 58      | 16     | 14       | 25      | 29     | 13       | 7       |
| 4      | 14       | 58      | 17     | 14       | 21      | 30     | 12       | 59      |
| 5      | 14       | 56      | 18     | 14       | 16      | 31     | 12       | 52      |
| 6      | 14       | 55      | 19     | 14       | 11      | 32     | 12       | 43      |
| 7      | 14       | 53      | 20     | 14       | 6       | 33     | 12       | 35      |
| 8      | 14       | 51      | 21     | 14       | 0       | 34     | 12       | 26      |
| 9      | 14       | 48      | 22     | 14       | 54      | 35     | 12       | 17      |
| 10     | 14       | 46      | 23     | 13       | 48      | 36     | 12       | 8       |
| 11     | 14       | 43      | 24     | 13       | 42      | 37     | 11       | 59      |
| 12     | 14       | 40      | 25     | 13       | 36      | 38     | 11       | 49      |
| 13     | 14       | 37      | 26     | 13       | 29      | 39     | 11       | 39      |



| SCRVP. | MILLIAR. | GRADVS. | SCRVP. | MILLIAR. | GRADVS. | SCRVP. | MILLIAR. | GRADVS. |
|--------|----------|---------|--------|----------|---------|--------|----------|---------|
| 29     | 11       | 40      | 10     | 8        | 57      | 8      | 4        | 74      |
| 19     | 11       | 41      | 57     | 7        | 58      | 3      | 3        | 75      |
| 9      | 11       | 42      | 43     | 7        | 59      | 3      | 3        | 76      |
| 58     | 10       | 43      | 30     | 7        | 60      | 3      | 3        | 77      |
| 47     | 10       | 44      | 16     | 7        | 61      | 3      | 3        | 78      |
| 36     | 10       | 45      | 2      | 7        | 62      | 2      | 2        | 79      |
| 25     | 10       | 46      | 48     | 6        | 63      | 2      | 2        | 80      |
| 14     | 10       | 47      | 34     | 6        | 64      | 2      | 2        | 81      |
| 2      | 10       | 48      | 20     | 6        | 65      | 2      | 2        | 82      |
| 50     | 9        | 49      | 6      | 6        | 66      | 1      | 1        | 83      |
| 38     | 9        | 50      | 52     | 5        | 67      | 1      | 1        | 84      |
| 36     | 9        | 51      | 37     | 5        | 68      | 1      | 1        | 85      |
| 14     | 9        | 52      | 23     | 5        | 69      | 1      | 1        | 86      |
| 2      | 9        | 53      | 8      | 5        | 70      | 0      | 0        | 87      |
| 49     | 8        | 54      | 53     | 4        | 71      | 0      | 0        | 88      |
| 36     | 8        | 55      | 38     | 4        | 72      | 0      | 0        | 89      |
| 23     | 8        | 56      | 23     | 4        | 73      | 0      | 0        | 90      |

*Cognita longitudine & latitudine cujusvis loci, quomodo  
ejus situs in globo terrestri per circulos longitudinum & la-  
titudinum inveniendus eidemque inscribendus.*

**C**OGNITA itaque sive per observationē jam indicatam, sive ex tabel-  
la aliqua Geographica, longitudine & latitudine alicujus loci vel oppi-  
di, situs ejusdem in globo explorari hoc pacto poterit: Datam longitu-  
dinem tui oppidi numera inter longitudinum circulos in globi superficie depi-  
ctos, incipiendo ab illo, qui per insulas Fortunatas transit: circulum illum, in  
quem numeratio desinit, nota: deinde si latitudo tui oppidi data fuerit borea-  
lis, numerabis eam inter parallellos latitudinum versus polum Arcticum: econ-  
trario



trario si Australis fuerit versus Antarcticum, facto numerationis initio semper ab æquinoctiali: intersecio itaque hujus numerati paralleli cum meridiano notato, situm oppidi indicabit. Quod si vero longitudinum hi circuli in globo tuo non exstent, tunc gradum æquinoctialis, qui longitudini tui oppidi responderet, ad meridianum siste, & in gradibus meridiani latitudinem oppidi tui versus alterutrum polorum numera, & habebis situm oppidi tui in globo.

# TABELLA LONGITVDINES ET LATITVDINES ALIQVOT PRÆCIPVORVM

OPPIDORVM OSTENDENS.

|                 | Long. | Latit. |             | Long. | Latit. |
|-----------------|-------|--------|-------------|-------|--------|
| Alexandria      | 60 30 | 43 42  | Gandavum    | 19 8  | 51 24  |
| Amstelodamum    | 21 43 | 52 30  | Groninga    | 22 54 | 53 16  |
| Antverpia       | 20 16 | 51 28  | Heidelberga | 25 38 | 49 35  |
| Athenæ          | 52 45 | 37 15  | Iena        | 29 2  | 51 8   |
| Bruxella        | 20 42 | 51 0   | Lubecum     | 28 30 | 54 48  |
| Brema           | 25 16 | 53 40  | Leida Holl. | 20 47 | 52 10  |
| Bamberga        | 28 10 | 49 56  | Regius Mons | 41 16 | 54 16  |
| Basilea         | 24 22 | 47 41  | Bor         | 25 16 | 51 0   |
| Bononia         | 32 5  | 43 54  | Marpurgum   | 28 20 | 45 6   |
| Constantinop.   | 56 0  | 42 5   | Mediolanum  | 28 20 | 49 24  |
| Cassel          | 26 36 | 51 43  | Noriberga   | 30 10 | 41 0   |
| Colonia         | 33 26 | 51 0   | Neapolis    | 15 36 | 47 16  |
| Corinthus       | 31 15 | 36 55  | Orliens     | 32 0  | 50 6   |
| Dresena         | 31 3  | 51 0   | Praga       | 17 8  | 47 55  |
| Dantiscum       | 39 2  | 54 54  | Parisijs    | 29 50 | 48 56  |
| Erfordia        | 28 40 | 51 10  | Ratisbo.    | 30 14 | 54 36  |
| Esslinga (Mænū) | 25 36 | 48 39  | Rostockium  | 25 39 | 49 20  |
| Francfordia ad  | 25 38 | 50 12  | Spira       | 20 23 | 48 38  |
| Ferraria        | 32 15 | 44 23  | Tubinga     | 34 36 | 47 44  |
| Genna           | 28 20 | 43 50  | Vienna.     |       |        |

CA-



## CAP. IV.

DE ALTITUDINE SOLIS  
AUT STELLARVM.

**A**LTITUDO est distantia Solis aut alicujus stellæ ab Horizonte, numerata in circulo majore per verticem alicujus loci & corpus Solis aut stellæ transeunte. Observandam esse per Radium, Quadrantem, aut aliud hujusmodi instrumentum, adeo notum est, ut frustra monuerim. Gemma Frisius per Gnomonem sphæricum Solis altitudinem observare docet. Sed hic modus observandi nō ita multum placet. Multis obnoxium erroribus, qui periculum fecerit facile deprehendet.

## CAP. V.

DE LOCO SOLIS INVENIENDO,  
EIVSQUE DECLINATIONE

AD DIEM DATVM.

**C**OGNITVM mensis diem in Calendario, quod in Horizonte Globorum describitur, quæras. Hujus è directo in eodem Horizonte respondet signum Zodiaci ejusque gradus, quem Sol eodem die occupat. Sed si annus sit bissextilis, post 28 Februarij accipe Gradum ejus signi, qui adscribitur diei datum diem proximè sequenti. Vtpote si scire velis quem gradum Zodiaci Sol obtinet ad diē 29. Februarij, accipiendus est is gradus, qui primo diei Martij adjungitur, & pro primo Martij secundum accipe, & sic consequenter. Hoc tamen potius suaserim, ut cū Solis locus accuratè sit indagandus, ex tabulis ad singulos dies cujusque anni ritè calculatis (Ephemerides vulgo vocant) locum Solis investigates. Neque enim per Globorum præsim, et accuratatione, quæ sæpè requiritur, deprehendi poterit.

Locum Solis inventū Meridiano applica, numeraque in Meridiano gradus, quibus Solis locus ab Æquatore distat, tot enim erunt gradus Solaris declinationis ad datum diē. Est enim Declinatio tū Solis tum cujusque sideris, distantia ejusdē ab æquatore, numerata in Meridiano. Declinationem Solis multo exactius inveniēmus ex tabulis, qualibus  
Nautæ



Nautæ utuntur, in quibus ad singulos dies Meridiana Solis declinatio, quæ & quanta sit, exprimitur. Vnum hoc obiter moneo de hisce tabulis, ut recetioribus plurimum utamini. Omnes enim post aliquod temporis spatium suos habent errores. Atque ideo moneo, quia vidi nonnullos, qui antiquioribus tabulis magna diligentia & cura manu exaratis (qui sæpiusculè 10 m. interdum amplius, à recentiori calculo & ab ipsa veritate aberrant) studiosè & cum quadam quasi religione uterentur. Hi magno labore & industria magnos & non negligendos errores sibi comparant.

*Declinationem* Solis maximam ex altitudinibus solstitialibus maximâ & minimâ, sive æstivali & brumali indagabis, hac ex illa subtracta. Relicti enim dimidium est quæsitâ declinatio. Sic Regiomontanus Viennæ die solstitij æstivi deprehendit Solis altitudinem meridianam sexaginta quinque graduum, triginta minutorum. Idem die solstitij hiberni altitudinem minimam Solis observavit octodecim graduum, minutorum triginta: quam cum ex 65.30, subtraxisset, retinuit 47 gr. 0 m. cujus dimidium illi fuit maxima Solis declinatio, 23 gr. 30 m. quæ communiter nunc retinetur: licet ab alijs minor hac nostra tempestate sit deprehensa.

*Longitudo Solis* ad quodvis tempus hujus nostri seculi quomodo eruatur, id est, quomodo cognoscendum, in quo signo ac signi gradu, Sol dato tempore nostri seculi existat. In Horizonte Globorum solent describi signa Zodiaci & menses cum suis diebus. Quare itaque mensem & diem dati tui temporis, quicumque signi gradus illic diei datæ exacte responderit, is erit locus Solis eo die & eo mense. Ceterum in anno bisextili si post 28 Februarij diem Solis locum quæras, semper unus dies adijciendus erit diei proposito, ut si quæras locum Solis ad 13 diem Martij accipias locum Solis, qui respõdebit 14 diei Martij nempe 3 grad. 7.

## CAPVT VI.

*De inveniendâ loci latitudine, ex observata Meridiana  
altitudine Solis aut stellarum.*

**M**eridianam Solis altitudinem observa radio, quadrante, vel hujusmodi quovis instrumento, & Solis locum in ecliptica Globi inventum Meridiano applica, & Meridianum hâc illâc in suis fissuris consistentem circumducas, usque dum idem Solis locus totidem gradibus ab horizonte attollatur, quot sunt observatæ Solis altitudinis. In hoc Globi situ polus alter supra Horizontem e-

P

minens,



minens, indicabit latitudinem loci in quo fueris. Hujus rei hoc est exemplum.

Iunij die 12 juxta stilum veterem, Sol obtinet initium Cancrī, & maximam habet declinationem ad Boream graduum sc. 23 cum dimidio. Eo die observata sit Solis altitudo meridiana gr. 50. Quærimus loci latitudinem, in quo facta est hæc observatio. Illud autem sic inveniemus. Initium Cancrī Meridiano adjungamus, quem hâc illâc circumducemus, donec idem principium Cancrī Meridiano applicatū, gradibus emineat ab horizonte 50, quot sunt Meridianæ Solis altitudinis observatæ. In hoc situ Globi polus Boreus elevabitur grad. 63 cum dimidio, & tanta erit loci latitudo, in quo facta est illa observatio.

Non dissimilis est modus, quo vulgò Nautæ locorum latitudines indagare solent, per meridianas Solis altitudines, & tabulas declinationum: quem missum facimus, quod ejus explicatio ad nostrum non spectat institutum, & adeo vulgo notus, ut hoc loco ejus tractatio nō sit necessaria.

Idem effeceris observata altitudine meridiana alicujus stellæ in Globo expressæ. Si enim Globum ita constituas, ut stella observata, Meridiano applicata tanto ab Horizonte intervallo distet, quanta est ejus altitudo Meridiana observata; poli ab Horizonte elevatio latitudinem loci demonstrabit. Sed moneo, ut per Meridianam Solis altitudinem potius locorum latitudines exquiras, quam per stellarum fixarum altitudines, quoniam stellarum declinationes plurimum, ut supra probatum est, immutantur nisi si quæ per recentiores observationes suis locis restitute sunt.

Alij non solum per Meridianam Solis aut Sideris altitudinem, sed per duplicem ejus observationem, cognito temporis intervallo aut Horizontali distantia inter duas observationes, id ipsum facere pollicentur. Sed hæc praxis prolixa est & dubia, præterquam quod observationum multitudo multis erroribus, & difficultatibus est obnoxia.

In hoc tamen genere, faciliorem aliquam methodum non novi, quam sit quæ sequitur.

*Cognito Solis aut stellæ loco, & observata duplici ejus altitudine cum temporis intervallo, latitudinem loci exquirere.*



**P**rimum intercepto cruribus circini complemento altitudinis prioris observationis, (est autem complementum altitudinis differentia quâ observata altitudo minor est 90 grad.) alterum circini pedem figimus in eo eclipticæ gradu, quem Sol eo die occupat: altero delineamus arcum peripheriæ in superficie Globi, vergentem quodammodo in Occidentem, si observatio sit antemeridiana, vel in Ortum, si fuerit pomeridiana. Facta autem secunda observatione, & intervallo temporis notato, Solis loco Meridiano applicato, volvatur Globus versus Ortum, donec tot gradus æquatoris Meridianum pertranseant, quot spatio temporis inter duas observationes elapso congruent, numerando cuique horæ gradus æquinoctiales 15 signatoque loco in Solaris declinationis parallelo, quem Meridianus post hanc conversionem interfecat: fixoque ibidem altero pede circini, ad complementum secundæ observationis extensi describatur arcus peripheriæ priorem peripheriam interfecans. Communis intersectio harum peripheriarum verticem loci, in quo fueris, indicabit: cuius ab æquatore distantia si numeres in Meridiano, patebit loci latitudo.

Idem efficies, si ad eundem modum cum data & bis observata aliqua stella operabere, aut si ad complementa duarum stellarum, quæ eodem tempore observantur, duas circumferentias sese interfecantes descripseris.

Inventâ beneficio Meridiani altitudine Solis Meridiana facillimus erit modus loci latitudinem seu poli elevationem in quacunque regione deprehendere. Nam cum à vertice cujuscunque regionis ad horizontem interijciatur quadrans circuli, id est, gradus 90: Si ergo existente Sole in alterutro punctorum æquinoctialium altitudo meridiana ex grad. 90 auferatur, relinquetur distantia inter verticem atque æquinoctialem circulū: quæ erit loci tui latitudo. Ratio hujus deductionis manifesta est, quia altitudo Solis æquinoctialis est ipsa elevatio Æquatoris, cujus complementum æquat elevationem poli. Exemplis hoc fiet manifestius: Romæ Æquinoctialis Solis altitudo est grad. 48, qua ablata a quadrante circuli videlicet à grad. 90 relinquuntur grad. 42, quæ est poli altitudo ac loci latitudo Romæ. Hardervici deprehenditur Solis altitudo æquinoctialis graduum 38: Quibus subductis de gradibus nonaginta, seu quadrante circuli, residui erunt gradus 52, quæ est loci latitudo ac poli elevatio nobis jam dictæ.

Hoc idem quoque ex cælo deprehendi poterit per stellam aliquam fixam, quæ polo ita vicina erit ut in data regione nunquam occidat. Huius stellæ observanda cum maxima tum minima altitudo; quarum utraque in Meridiano contingit: Minima quidem infra, maxima supra polum. Hoc facto, minimam stellæ altitudinem adde maximæ, & collectæ summæ dimidium erit altitudo



poli. Exemplum : Stella quæ prima trium est in cauda ursæ maioris, in minima sua altitudine observatur hic Hardervici per globum cælestem esse graduum circiter 12; eiusdem maxima altitudo supra polum posita deprehenditur fere graduum 92. Hi altitudinum gradus in unam summā collecti constituunt gr. 104. quorum dimidium nempe 52 grad. est elevatio seu latitudo civitatis jam dictæ.

## CAPUT VII.

DE ASCENSIONE RECTA ET OB-  
LIQUA SOLIS ET STELLARVM INVE-  
NIENDA AD DATAM QUAMLIBET LOCI  
LATITUDINEM ET TEMPVS.

**A**scensio Solis vel stellæ est gradus æquatoris, qui cum iisdem supra Horizontem emergit. Descensio est æquatoris gradus, qui cum iisdem deprimitur infra Horizontem. Vtraque vel est *recta* vel *obliqua*. Recta est gradus æquatoris, qui ascendit aut descendit cum Sole aut Sidere in Sphæra recta. *Obliqua*, qui cum iisdem oritur aut occidit in obliqua Sphæra. Illa simplex : est enim unicus situs Sphære rectæ : hæc multiplex ac varia, prout Sphæra varijs modis inclinatur.

Si ascensum rectum aut descensum cupis cognoscere alicujus stellæ ad datum aliquod tempus & locum, adijunge Meridiano materialis Globi stellam datam : & æquatoris gradus, quem meridianus in eo situ interfecat, indicabit ascensum & descensum rectum : idem occidit etiam & coelum mediat cum eadem.

Ascensionem vel descensionem obliquam si velis cognoscere, Globum statuas ad latitudinem loci, stellamque Orientali Horizontis parti applica : Horizon signabit in æquatore gradum ascensus obliqui. Occidenti item adijunge eandem stellam. Horizon in æquatore monstrabit descensum obliquum. Eodem planè modo Solis aut alicujus gradus eclipticæ ascensionem obliquam invenire oportet, cognito prius ex supra traditis loco Solis. Hinc reperiri poterit differentia ascensionis rectæ & obliquæ, unde diversa oritur dierum longitudo.

Exempli causa. Sol primum Capricorni gradum obtinet die 11 Decembris



## ET EORVM VSV PARS IV.

93

Decembris juxta stilum veterem. Hujus gradus eclipticæ cognitam volo ascensionem rectam & obliquam in latitudine 52 gr. Primum igitur Capricorni gradum applica Meridiano : ubi Meridianus interfecabit gradum æquatoris 180, qui erit gradus ascensionis rectæ. Sed si Globo constituto ad latitudinem gr. 52 eundem gradum Capricorni Horizonti adjeceris, invenies oriri cum eo grad. æquatoris 303. 50 m. proximè, & differentia ascensionum (270 gr. rectæ & 303 gr. 50 mi. obliquæ) erit grad. 33. 50 min.

Hic *ascensus* & *descensus* aliàs vocatur *ortus* & *occasus Astronomicus*, idque respectu arcuum & partium eclipticæ vel stellæ supra vel infra horizontem. Est autem *ecliptica* seu *Zodiaci arcus* dupliciter intelligendus, *continuus* nimirum aut *discretus* : *Arcus continuus* qui continua serie ab initio Arietis in consequentia signa numeratur in æquatore : *Arcus discretus* est qui à quovis alio puncto eclipticæ in eodem æquatore numeratur, sic dictus, quia avulsus & distinctus est ab Arietis initio : ut si dicas, arcus a 14 gradu Tauri ad 14 gradum usque Geminorum.

Porro *Ascensio recta* alias etiam *major* dicitur, quod in ea maior de æquatore quam de Zodiaco arcus surgat, supra nimirum horizontem. Dicitur vero *rectus*, quia angulus, quem ecliptica & Horizon faciunt, rectior est quam angulus, quem alia pars Eclipticæ facit cum horizonte. Maior æquatoris arcus seu portio dicitur, quæ 30 gradus superat in ortu vel occasu, minor, quæ 30 gradibus est brevior in ortu vel occasu, id est, ascensu vel descensu.

In Sphæra recta quatuor tantum signa recte ascendunt : *Gemini, Cancer, Sagittarius, Capricornus* : reliqua igitur octo oblique.

In Sphæra obliqua sex signa oriuntur recte, sex oblique. Recte, *Cancer, Leo, Virgo, Libra, Scorpius, Sagittarius* : oblique reliqua.

*Ascensio obliqua* est, in qua *minor* de Æquatore, quam de Zodiaco arcus oritur, id est, obliquus ortus signi est, cum quo minor æquatoris portio supra horizontem ascendit. Occasus igitur sive descensio signi obliqua est, cum minor æquatoris portio descendit. Exempli gratia, Romæ cum arcu Libræ, qui comprehendit grad. 30 ascendit arcus Æquinoctialis continens grad. 37. Vnde signum Libræ dicitur eo loci recte oriri. Maior enim de æquatore quam de Zodiaco arcus surgit. At ibidem cum arcu arietis coascendunt gradus tantum 17 æquatoris : Vnde sequitur signum arietis Romæ oblique oriri. In nostra sphæra, quæ hic Hardervici aut Amstelodami similiter est obliqua, quemadmodum illa Romæ ascendit cum arcu libræ æquinoctialis arcus continens gradus circiter 40 & unum : cum arietis arcu coascendunt eiusdem æquatoris gradus haud ultra 13. Est ergo in nostra sphæra ascensus sive ortus Libræ rectus quoque, arietis vero obliquus.

## REGVLÆ ORTVS ASTRONOMICI IN SPHÆRA RECTA.

P 3

REGVLÆ



**R**EGVLÆ ORTVS Astronomici in recta sphaera sunt he. 1 Quadrantes Zodi-  
aci & æquinoctialis æquali tempore oriuntur & occidunt. 2 partes qua-  
drantum inæqualiter. 3 Signa æqualiter ab uno punctorum distantia, æquales  
habent ascensiones, ut *Gemini* & *Cancer*. 4 ascensio signi æqualis semper est de-  
scensioni. 5 Quatuor signa, scilicet *Gemini*, *Cancer*, *Sagittarius* & *Capricornus* recte  
oriuntur: reliqua octo oblique.

## REGVLÆ ORTVS ASTRONOMICI IN SPHÆRA OBLIQA.

**I**N Sphaera obliqua 1 duæ medietates conterminales a punctis æquinoctiali-  
bus inchoatæ simul peroriuntur. 2 partes medietatum inæqualiter. 3 Signa  
recte ascendunt, oblique descendunt & contra. 4 Ascensio signi alicuius tanta  
est, quanta descensio, oppositio & contra. 5 Ascensiones arcuum in Septentrio-  
nalibus signis sunt minores quam in recta sphaera, in meridionalibus maiores. 6  
Ascensiones signorum oppositorum in sphaera obliqua simul sumtæ, sunt æqua-  
les ascensionibus eorundem in sphaera recta. 7 signa æquidistantia ab alterutro  
punctorum æquinoctialium, æquales habent ascensiones, quia ab æquatore æ-  
qualiter declinant.

### CAPVT VIII.

*Quomodo inveniatur ad datum tempus & locum dif-  
ferentia horizontalis inter meridianum & circulum vertica-  
lem Solis aut stellæ alicuius, quem vocant Azimuth.*

**O**bservata altitudine Solis aut Stellæ quacunque vis hora, Glo-  
bum ad latitudinem loci compositum volvas, usque quo ob-  
servata stella, aut Solis locus, tantum ab horizonte emineat,  
quanta est observata altitudo. Hoc autem invenies, si quadrantem  
altitudinis vertici dati loci affixum, una cum stella aut Solis loco hac  
illac commoveas, donec incidat in eum quem per observationem in  
instrumento notatum habes. In hoc situ quadrantis terminus ad  
horizontem monstrabit distantiam circuli verticalis, in quo Solem aut  
stellam observasti, à Meridiano. Exempli causa.

In latitudine Boreali grad. 51 die Martij 11 juxta stilum veterem  
quo tempore principium Arietis Sol occupat, observata sit ejus alti-  
tudo ante meridiem gr. 30 supra horizontem. Quæritur Azimuth si-  
ve distantia Solis à Meridiano. Globo primum ad latitud. 51 grad.  
posito



posito, & quadrante altitudinis vertici affixo, volvatur deinde Globus donec principium Arietis grad: 30 supra horizontem attollatur. Quadrans altitudinis eidem Arietis initio applicatus, monstrabit in horizonte Azimuth Solis, sive distantiam à Meridiano, gradum proximè 45.

## CAPVT IX.

DE INVENIENDA HORA, ITEMQVE  
AMPLITVDINE ORTVS ET OCCASVS  
SOLIS ET STELLARVM, AD DATVM  
aliquod tempus & latitudinem alicujus loci.

**S**olem in diversis Horizontis patribus, diversis anni tempestatibus, orientem & occidentem cernimus. Tres autem insigniores & maximè differentes habet ortus & occasus. Æquinoctialis dicitur locus ille, quo Sol oritur aut occidit, cùm æquatorem percurrit. Solstitialis est ortus aut occasus Solis, cùm æstivum Tropicum describit. Brumalis, ubi oritur aut occidit, cum hybernum Tropicum obtinet. Ortus & occasus æquinoctialis in omni Climate simplex est & unicus. Æquator enim Horizontem in iisdem semper punctis intersectat, quæ 90 gr. utrinque à Meridiano distant. Reliqui pro varia sphaeræ inclinatione, varij sunt & mutabiles, horæque diversæ.

Amplitudo ortiva & occidua in specie est arcus Horizontis interceptus inter equatorem & Solem Orientem aut Occidentem cum punctis Solstitialibus; Estque Septentrionalis & Meridionalis. Septentrionalis, cum citra æquatorem; Meridionalis, cum ultra æquatorem cadit. In æquatore Sol amplitudinem ortivam & occiduam non habet: cum vero in signis Solstitialibus, puta in principio Cancris aut Capricorni existit, summa illi amplitudo, quod ad ortum & occasum competit; vocaturque hæc amplitudo, *Solstitialis æstivalis* in initio Tropici Cancris; in principio vero Capricorni, *Solstitialis brumalis*.

Hic observandum, quod in omni climate amplitudo ortiva cujuscunque astri equalis sit amplitudini occidue ejusdem astri. Item quod duo astra equaliter ab Æquatore remota, unum quidem in Boream, alterum vero in Austrum, vel etiã utrumque in Boream vel Austrum, habeant æquales amplitudines ortivas & occiduas.

Horam autem & distantiam Ortus aut Occasus Solstitialis & Brumalis, aut alicujus intermedij, (quam vocant amplitudinem ortivam aut



aut occiduam) si cupis cognoscere ad datum aliquod tempus & latitudinem loci: sic operabere. Primò statuatur Globus juxta latitudinē loci. Quæsitum deinde Solis locum, ad tempus datum, Meridiano ad-  
junge, & cuspidem indicis horarij applica 12 horæ cycli horarij : & converso Globo, usque dum Solis locus Horizontem ab Orientali parte attingat, index in horario circulo Ortus horam, Solis locus in horizonte Ortus amplitudinem indicabit, quam ut diximus numerare oportet ab ipso Orientis cardine, sive intersectione æquatoris & horizontis. Si vertatur Globus, donec idem Solis locus horizonti ab Occidente accedat, hora Occasus, & amplitudo occidua eodem modo deprehenditur.

Si ad idem tempus eandemque latitudinem, horam & amplitudinem ortus aut occasus, itemque mediationem coeli alicujus stellæ in Globo expressæ, cognitam velis: Globus convertatur (manente eadē latitudine, eodem indicis situ, quo prius) usque dum stella data horizonti accedat, vel ab Oriente, vel Occidente, hora & latitudo ortus aut occasus, eodem planè modo quo in sole deprehenditur. Si eandē stellam Meridiano applices, patebit hora transitus per Meridianum, quam Mediationem coeli vocamus. Temporis autem itemque amplitudinis ortus & occasus Solis hoc esto exemplum.

Sole occupante principium Tauri (quod nostra ætate evenit circa diem 11 Aprilis juxta stilum veterem) cupio cognoscere horam & amplitudinem ortus Solis ad latitud. Bor. gr. 51. Hoc ut cognoscamus, statuatur Globus, ut polus Boreus emineat 51 grad. ab Horizonte. Deinde primus gradus Tauri Meridiano adjungatur, & index horarius horæ 12 cycli horarij. Postremò versato Globo versus Orientem donec principium Tauri horizontem attingat: inveniēmus illud punctum contingere horizontem gr. 25 proximè ad Boreā Cardinis Orientis: tantaque erit amplitudo ortus Solis eo die. Index autem horam 4 cum dimidia cycli horarij monstrabit, quo tempore Solem eo die oriri dicimus.

## CAP. V. X.

DE TRIPLICI ORTV ET  
OCCASV STELLARVM.

PRÆTER



**P**RÆTER quotidianam stellarum emersionem & depressionem ab Horizonte ad mundi conversionem, triplicem earum ortum & occasum solent considerare. *Matutinum* five *Cosmicum*, *Ves-*



*pertinum* five *Acronychum*, & *Heliacum* vel *Solarem*. *Ortus matutinus* alicujus stellæ est, cum stella supra horizontem simul cum Sole attollitur. *Occasus matutinus*, cum stella aliqua oriente Sole è regione occidit. *Ortus vespertinus* est, cum occidente Sole stella è regione ab Hori-



zonte emergit. *Occasus* est, cum occidente Sole stella una deprimitur. *Ortus Heliacus* (quem emersum rectè dixeris) est, cum stella quæ prius radijs Solaribus illustrata conspici nō poterat, ab iisdem emergit. *Occasus* (quem occultationem licet nominare) est, cum Sol stellam aliquam motu proprio assequitur, ut ob fulgorem radiorum ejus cerni non possit.

De ortu & occasu siderum, qui fit respectu horizontis & æquatoris, supra cap. 7 dictum fuit; Quem & *Astronomicum ascensum* & *descensum* appellari indicavimus: hic autem ortus & occasus proprie & tantum Solis & Horizontis aspectu consideratur, non vero *Æquatoris*, ideoque & vulgo ac populariter ortus & occasus *Poeticus* appellari solet.

Volunt plurimi, stellas fixas primæ magnitudinis oriri vel emergere, si in supero mancant hemisphærio, cum Sol 12 grad. infra horizontem deprimitur: stellæ autem secundæ magnitudinis demersionem Solis ad 13. grad. requirunt: tertiæ magnitudinis, si sint 14 gr. quartæ 15: quintæ 16: sextæ, 17, nebulosæ & obscuræ 18 grad. depressionem Solis requirunt. Ptolemæus in hac re nihil definivit. Difficilem



lem ejus determinationem rectè monet & Almag. cap. ult. Inæqual' aëris dispositione inæqualem fieri hanc distantiam Solis ad emerfionem & occultationem siderum, probe advertit. De hac vulgata sententia scrupulum nobis injicit, quod Vitellio depressionem Solis infra Horizontem ad 19 gr. requirat, ut finiatur crepusculum vespertinum. Nebulosas autem & obscuras ante finitum crepusculum conspici posse vix persuadebunt. Vt cunque autem se res habeat, sequamur vulgatam sententiam.

Si igitur anni tempus, quo stella aliqua in quovis climate oritur aut occidit matutine vel vespertine, cognitum velis, sic indagare licebit. Stellam datam horizonti Globi ad latitudinem loci constituti adjungas ab orientali parte horizontis. Innotescet gradus eclipticæ, quocum stella data oritur Cosmicè & occidit Acronychè: & è regione ab Occidente Horizon indicabit gradum eclipticæ, quocum stella data oritur Acronychè & occidit Matutine. Ortus enim Cosmicus & occasus Acronychus, item occasus Cosmicus & ortus Acronychus idem sunt, juxta vulgatos versiculos:

*Cosmice descendit signum quod acronychè surgit.*

*Acronychè descendit signum quod Cosmice surgit.*

Sed hæc sunt latius intelligenda. Neque enim cum eodem gradu eclipticæ stella mane oritur & vesperti occidit. Austrinæ stellæ gradum ortus sui in occasu antevertunt: Boreales sequuntur, si polus Boreus supra Horizontem attollatur; contra, si Austrinus emineat. Invento autem gradu eclipticæ, quocum data stella oritur aut occidit, si ejusdem signi gradum in Horizonte quæras, mensem ejusque diem expressam deprehendes quo Sol eundem occupat.

Ortum & occasum Heliacum sic invenies. Globo ad latitudinem loci composito, stellam datam horizonti applices ab Occidente, è regione ad Ortum exquiras gradum eclipticæ, qui ab Horizonte attollitur gr. 12. 13. 14. aut alia quavis distantia, quam stellæ postulat magnitudo. Hujus gradus oppositum cum Sol occuparit, stella ea occidit heliace, sive occultatur radiorum Solarium fulgore. Si converso, applicatâ stellâ Orienti exquiras eclipticæ gradum, qui è regione ab Occidente totidem gradibus supra Horizontem eminet: huic oppositum cum Sol occupaverit, stella oritur heliacè vel emergit è radijs Solaribus. Hos autem eclipticæ gradus si in Horizonte perquiras, mensis & ejus dies patebit, cum Sol hos gradus ob tinct. Vnde manifestum



festum erit tempus occultationis & emerfionis ejus stelle. Exemplum hoc esto, sed occultationis stellæ fixæ primæ magnitudinis. Emerfio in versione hujus operationis invenitur.

Syrius lucida stella est præfulgens in ore Canis majoris. Hujus occasus heliacus sive occultatio sit exquirenda ad latitudinem Borealem 51 grad. Syrius autem (cùm sit stella primæ magnitudinis) occultatur, cùm Horizontem tangit in supero hemisphærio Sole 12 gr. infra horizontem depresso. Si igitur stellam hanc Horizonti adjicias ab Occidente, (Globo prius juxta latit. 50 g. Bor. constituto) & è regione ab Ortus exquiras gradum eclipticæ, minimo sumpto intervallo 12 grad. supra horizontem eminentem (is autem est 11 proximè grad. Scorp.) hujus oppositum in ecliptica gradum, hoc est 11 Tauri cum Sol occurrat, stella illa occultatur radijs Solaribus. Hunc autem gradum Tauri Sol obtinet circa 22 Aprilis, circa quod tempus Occasum Heliacum Syrii esse dicimus. Si eodem modo operabere, adjiciendo stellam hanc Horizonti ab Oriente, innotescet ejus Ortus Heliacus sive emerfio.

Non absimilis est modus investigandi crepusculorum initia & fines, is autem sequitur.

Vsus & utilitas doctrinæ de hoc ortu & occasu præcipue insignis est in veterum auctorum seu Poetarum & præsertim eorum, qui de tēporibus & re rustica agunt, locis intelligendis. Sic Virgilius libro I Georg. ORTVS COSMICI meminit hisce versibus:

*Candidus auratis aperit cum cornibus annum*

*Taurus, & adverso cadens canis occidit astro.*

Vult enim dicere & indicare Aprilem mensem, tunc enim Sol in Tauri signo moratur & auratis cornibus exoritur. OCCASVS COSMICI eodem in loco exemplum est, ubi ait:

*At si triticeam in messem, robustaque farra  
Exercebis humum solisque instabis aristis,  
Ante tibi Eoæ Atlantides abscondantur,  
Gnosiaque ardentis decedat stella corona,  
Debita quàm sulcis committas semina, quamque  
Invita properes anni spem credere terra,  
Multi ante occasum Maia capere, sed illos  
Expectata seges vanis elusit avenis.*

Expecta, inquit, illum diem in frumentis serendis, quo Atlantides, id est, Pleiades abscondantur seu occidant Eoæ, hoc est matutine, sive matutino occa-



fu vero, qui dicitur *occasus Cosmicus*. Quo eodem die etiam stella coronæ septentrionalis decedat, id est occidat vespere, & quidem vespertino occasu apparente, qui dicitur *Heliacus*. Atque ita poeta duplici occasu extremos dies Octobris puta 28 & 29 descripsit.

**ORTVS CHRONICI** exemplum extat in Ovidij libro 1 de Ponto eleg. 9 ubi exilij sui moram describit, ab ortu pleiadum autumnali, id est, vespertino;

*Vt careo vobis Scythicas detrusus in oras,  
Quatuor autumnos Pleias orta facit.*

**OCCASVS CHRONICI** meminit 2 Fastorum, ubi de tertio Februarij loquitur ejusmodi perilogiâ,

*Quem modo celatum stellis Delphina videbas,  
Is fugiet visus nocte sequente tuos.*

**ORTVS HELIACI** exemplum est in Februario apud eundem:

*Tertia nox venies, custodem protinus urse  
Aspicias geminos exeruisse pedes.*

**OCCASVS HELIACI** supra mentio in illis verbis 1 Georg.

*Et adverso cedens canis occidit astro.*

Ibi enim poeta loquitur de verna satione milij & fabarum.

## HVC SPECTANT, VTRVMQVE HVNC ORTVM ET OCCASVM POETICVM BRE- VITER INDICANTES, HI INCERTI

AUCTORIS VERSVS.

*Cosmicus est ortus, cum sol emergere quarit,  
Ipsius oppositum lapsus ad ima gerit.  
Chronicus est lapsus cum Sol in vespere tabet.  
Ipsius oppositum Cosmicus ortus habet.  
Heliacus signo datur ortus Sole remoto,  
Illi occasum proximitate noto.*

CAPVT XL.

## DE INVENIENDO CREPUSCVLORVM INITIO ET FINE, AD DATVM QVOD-

VIS TEMPVS ET LATITVDINEM LOCI.

Crepuscu-



**C**repusculum definiunt dubiam lucem inter diem & noctem ante orientem & post occidentem Solem. Alterum vocant Matutinum, alterum Vespertinum. Illius initium & huius finis æquali temporis spatio ab ortu & occasu Solis remota sunt: utcunque duratio interdum major sit, interdum minor in utrisque. Æstate enim longiora sunt crepuscula, hyeme breviora. Mensuram vulgo faciunt, cum Sol 18. grad. infra horizontem latet. P. Nonius rectè monet, non posse dari certam aliquam mensuram, pro diversa aëris affectione, atque altiore vel depresso vaporum à terra elevatione, variam esse advertit. Vitellio, ut ante cum Alhazenus, graduum 19 occultationem posuerunt. Vtcunque se res habet, sequamur sententiam vulgo receptam. Si igitur ex hoc fundamento horam cognoscere cupis, qua crepusculum inchoatur aut finitur, ad datum tempus & locum Globum statuas juxta loci latitudinem & Solis locum dato tempori congruentem Meridiano adijunge, & indicem horarium 12 horæ sui cycli. Signato deinde gradu eclipticæ qui è diametro Solis loco opponitur, vertatur Globus, donec idem gradus oppositus Soli 18 grad. ab Horizonte attollatur a parte Occidentali & index in cyclo horario, monstrabit initium crepusculi matutini: si à parte Orientali, vespertini crepusculi finem indicabit.

Nostræ regiones *παρυγασμὸν* seu crepusculum auroramque per horam & paulo plus habent. Illis vero regionibus, in quibus circuli Tropici valde sunt remoti ab Horizonte, plane nullus est *παρυγασμὸς*, nulla aurora, nullum crepusculum. Hinc ijs, qui proxime Equatorem habitant noctis extrema non illustrantur, nec prius illis illucescit quam Sol ortus sit. Contra vero, ubi Tropicus valde propinquus est horizonti, ibi totam fere noctem creperâ esse necesse est. Hinc cum Romani in Britanniam venissent & totam fere noctem in Solstitio æstivo illustrari vidissent, τὸν *παρυγασμὸν* noctium non ausi sunt noctem vocare, sed *minima nocte* contentos Britannos dixerunt.

Est autem *παρυγασμὸς*, ut definit ad Maniliū Iosephus Scaliger, nihil aliud quam τὸ φῶς seu luminis antiperistasis, quæ nulla esse potest, quum ab horizonte, ut diximus, tropici valde remoti sunt. Nam hic *παρυγασμὸς*, quemadmodum ab eodem Scaligero accurate ibidem notatum, fit tantum sub illis signis, quæ propius punctum solstitiale sunt, Geminis & Cancro, & quidem in illis tractibus, in quibus nox longiuscula est, quam sub polo Eclipticæ: ut verbi gratia (sunt Scaligeri verba) quibus Tropicus nō est pro Arctico neque tangit punctum horizontis Aquilonij: illis tantum noctes obscurantur, quantum Tropicus ipse abest a pulsu horizontis septentrionalis: ut scimus accidere in Scotia, in qua nostrates milites noctu in excubijs alea ludentes nullum lumen adhibebāt



Solstitiali sidere confecto. Tropicus autem distat ab horizōte Edinburgi part. 9.17 circiter. Tantum igitur medię noctis tempore Sol ab illorum horizonte distat in solstitio; ut reliquum noctis *παρρηγοῦναι* necesse sit, & ex horis 6 23, duos tantum trientes horæ minus 3 scrup. fere noctem obscurari, reliquas autem horas illustrari, & *παρρηγοῦναι*. Vnde habes rationem lucidarum dierum in illis regionibus, à quarum horizonte propius abest Tropicus. Quare τὸ φῶς seu luminis antiperistasi igno- rantes Romani putarunt vix ibi noctem esse.

Cadamu-  
stus.

Hinc jam consequens est, ut quanto remotior sit Tropicus ab horizonte, tanto minus noctes illustrentur: & qui proxime Æquinoctialem habitant, tantum abest, ut illis noctis extrema illustrentur, ut non prius luceſcat, quam Sol ortus sit: nulla vero aurora fere aut crepusculum apparet in regionibus, quę intra decimum gradum ab æquinoctiali sunt, cujus rei nulla causa alia, quā maxima Tropici à finitore distantia. Quod si nullus in æstate paragaſmus fieri potest, tanto minus fiet, quum sol erit in altero Tropico: ne quis credendum putet. Ludovico Cadamusto, qui quum hoc scriberet, id fieri dixit ideo, quia ibi nulli montes sint, qui orienti Soli officiant. Ridicula ratio, neque digna quę confutetur. Vide uberius Scaligerum ad 3 Astronomi. Manilij.

## C A P V T XII.

*Quomodo ad datum aliquod tempus & locum inveniatur quantitas diei artificialis aut noctis, vel quantitas paralleli Solaris, quę supra Horizon- tem manet quęque infra latet. Idem etiam de stella aliqua invenire.*

**D**IEM supra diximus esse duplicem. Naturalem, qui definitur integra revolutione æquatoris, cum ea etiam portione æquatoris quę respondet arcui eclipticę, quem Sol motu proprio in uno die conficit. Integræ æquatoris revolutionem (missa ea portione, quę proprio Solis motui respondet) dividunt in 24 partes æquas, quas horas vocant æquales, quia semper inter se æquatur, quindecim æquatoris gradibus orientibus & occidentibus in singulis horis. Hujus diei diversa initia (alij enim ab occasu Solis inchoarunt, ut Attici & Iudæi: alij à media nocte, ut Ægyptij & Romani: sunt etiam qui ab ortu Solis, ut Chaldæi: vel à Meridie, ut Umbri, & vulgo solēt Astronomi, initium sumpserunt) nostri instituti non est pertractare. Diem artificialem definiunt spatio eo, quo Sol in sup̄ero hemisphærio versatur, cui opponunt noctem, dum inferum percurrit. Diem artificialem, itemque noctem in 12 utrinque partes dividunt, quas horas vocant inæquales, quoniam diversis anni tempeſtatibus majores sunt aut minores, neque idem semper spatium obtinent. Artifi-



Artificialis diei quantitas sic exquiritur: Globo ad latitudinem loci composito, inveniatur gradus eclipticæ, quem Sol dato tempore occupat. Eundem Meridiano adjungas & indicem horarium 12 horæ. Converso deinde Globo, dum Solis locus Horizontem ad Orientem attingat; index in cyclo horario monstrabit horam Solaris ortus: si Occidenti applicetur, hora Occasus similiter patebit, unde tota diei quantitas inveniatur. Horarum numerum si multiplices per 15 (tot enim, ut sæpè diximus, æquatoris gradus uni horæ æquali congruunt) prodibit numerus graduum Solaris paralleli supra Horizontem apparentis, quos si demas e 360 grad. relinquitur quantitas paralleli latentis. Vel converso, licebit primo quantitatem arcus diurni, deinde horarum numerum per divisionem colligere. Globo enim posito ad latitudinem loci, & notato gradu eclipticæ, quem Sol obtinet, exquiras per præmissa differentiam ascensionis rectæ & obliquæ ejusdem gradus eclipticæ ad latitudinem ejus loci. Hæc enim differentia erit semissis, quia dies artificialis eo loco & tempore excidit aut deficit à die æquinoctiali. Addenda est itaque, dum dies sunt majores noctibus (quod fit ab 11 Martij ad 12 Septembris) subtrahenda autem reliqua anni parte, cum dies sunt minores noctibus.

*Modus  
exquirendi  
diei artif.  
quantita-  
tem.*

Exempli causa, 12 die Junij juxta stilum veterẽ Sol obitinet principium Cancræ, cujus ascensio recta est gr. 90, at in latitudine grad. 52. Si principium Cancræ Horizonti applicetur, inveniemus ascensionem obliquam grad. 56. 10 m. prox. differentia est gr. 33. 50 quam si adjicias 90 grad. 40 m. semissi die artificialis gr. 123. 50 & totus arcus diurnus 247 grad. 40 min. quos si divides per 15 quotus erit 16 cum dimidio fere, numerus horarum diei artificialis 12 Junij latitud. 52.

*Exemplum.*

Hinc investigatur quantitas diei maximi, minimi & alicujus intermediij, ejusque ad datum tempus & locum incrementum & decrementum. Cleomedes augeri & minui dierum quantitates hac ratione voluit: ut primo mense ante & post factum æquinoctium augeantur & minuantur quarta parte totius differentiæ inter diem maximum & minimum: secundo mense sexta parte: tertio vero duodecima parte, utpote, si tota differentia inter diem maximum & minimum sit horarum 9: augentur aut minuantur dies mense proxime precedente aut subsequente æquinoctium, horâ unâ cum dimidia, hoc est parte quarta horarum 6: secundo mense, integrâ horâ: tertio mense, semisse unius horæ. Atqui hæc quidem ut sint vera ad aliquam datam & desi-



& definitam latitudinem, in universum se ita non habent. Nam ad diversas inclinationes sphaera diversa ratione augmentū capiunt & decrementum. Cum enim paralleli in omni latitudine secantur ab Aequatore dissimili ratione, dissimilis erit incrementi & decrementi ratio.

Frustra dixerim de inveniendo arcu apparente paralleli alicujus stellæ. Eadem planè ratione deprehenditur, qua parallelus Solis diurnus.

## CAPUT XIII.

DE INVENIENDA HORA DIEI ET NOCTIS. TAM AQUALI, QUAM INÆQUALI AD DATUM QVODVIS TEMPVS ET

LATITVDINEM LOCI.

**H**ORAM diei æqualem si lubeat cognoscere, Globus statuatur ad datam loci latitudinem. Solis altitudo observetur. Deinde locum Solis in ecliptica Meridiano adjunge, & indicem cycli horarij horæ 12. Postremo Globum volvas, vel ad Ortum vel Occasum, prout facta observatio postulat, usque dum Solis locus tot gradibus ab Horizonte emineat, quot congruunt observationi factæ, ut in inveniendo Solis Azimuth dictum est. Globo enim sic constituto, index in circulo horario monstrabit horam diei, quæ facta est observatio. Eodem modo horam noctis deprehendas, observata altitudine alicujus stellæ cognitæ & in Globo expressæ. Index enim maneat, ut prius, ad locum Solis accommodatus, & Globus circumagatur, donec stella obtineat altitudinem ab Horizonte æqualem altitudini observatæ: & index horam noctis indicabit.

Ad inveniendam horam diei inæqualem hæc est ratio. Primo invenienda est per præmissa, quantitas vel numerus horarum diei artificialis, itemque ejusdem diei hora æqualis exquirenda est, unde per proportionis regulam investiganda est hora inæqualis.

*Horæ inæquales respondent diei artificiali, qui supra fuit definitus esse tempus, quo Sol in supero hemisphaerio versatur, cui opponunt noctem, dum inferum percurrit. Quod tempus cum utrimque 12 partes contineat, horas ejus inæquales dicunt, quoniam diversis anni tempestaibus majores sunt aut minores, neque*



que idem semper spatium obtinent. Sic e contrario *æquales hora* convenient *die naturali*, qui definitur integra revolutione æquatoris: Quam dividunt in 24 partes æquas, & inde appellantur *hora æquales*, quia semper inter se æquantur, quindecim æquatoris gradibus orientibus in singulis horis. Nam toto Æquatore in 24 diviso colliguntur quindecim tempora seu partes, mensura unius horæ: ut ita hora æqualis sit vicesima quarta pars totius circuli æquatoris.

In latitudine graduum 49 maximus dies est horarum 16. Cùm fuerit ejus diei hora decima antemeridiana vel sexta ab Ortus Solis, cupio cognoscere, quanta sit ea hora inæqualis. Dispositio terminorum proportionum sic habet. 16 dant 6, ergo 12 (tot enim horas inæquales singulis diebus itemque noctibus attribuunt) dant 4 cum dimidio. *Exemplum.*

Quot etiam gradus æquinoctiales uni horæ inæquali congruant, hinc licebit exquirere, si totum numerum graduum arcus diurni divides per 12. Vtpote, si dies artificialis sit 16 horarum æqualium, arcus paralleli diurni erit graduum 240, quos si per 12 diviseris, quotus 20 indicabit numerum graduum æquinoctialium, qui conveniunt uni horæ inæquali. Simili methodo noctis hora inæqualis ejusque quantitas investiganda est.

## CAPVT XIV.

*De inveniendâ longitudine, latitudine, & declinatione Stellarum fixarum, ut in Globo exprimitur.*

**L**ongitudo stellæ est arcus eclipticæ interceptus duobus circulis majoribus ductis per polos eclipticæ, quorum alter transit per intersectionem æquatoris & eclipticæ, alter per centrum stellæ. Latitudo est distantia stellæ ab eclipticâ, numerata in eo circulo, qui per ejus centrum transit.

Hæc si cupis cognoscere, accipiendus est quadrans altitudinis, vel alius quadrans in 90 gr. commodè divisus: cujus alter terminus applicandus est polo Zodiaci Boreo vel Austrino, prout postulat stellæ latitudo. Transeat deinde per medium stellæ ad usque eclipticam, ubi alter quadrantis terminus notabit gradum longitudinis ejusdem stellæ, quæ à principio Arietis numeranda est. Ea autem portio quadrantis, quæ intercipitur inter ipsam stellam & eclipticam, indicabit ejusdem stellæ latitudinem.

Longitudo & Latitudo stellarum quomodo accipienda sit, ita demonstratur: Exempli loco esto caput Medusæ, quod invenitur in tabulis esse in 21 grad. 8, latitudo vero ejusdem invenitur 23 borealis.

R

Quæra:



Quærat in superficie globi signum  $\gamma$  & ab initio ejusdem numeretur in gradibus eclipticæ 21. gr. longitudo nimirum stellæ; circulus per hunc 21 eclipticæ gradum ex polo Zodiaci deductus, dicetur circulus longitudinis capitis Medusæ. In hoc deinde per parallelos Latitudinum numeretur stellæ latitudo nempe 23: incipiendo ab ecliptica versus Zodiaci polum Arcticum propter stellæ latitudinem borealem, & terminus numerationis locum capitis Medusæ cōmonstrabit.

Quoniam vero circuli omnes longitudinum & latitudinum in globi superficie non solent nec possint commode depingi: id circo eorum loco *circuli quadrans* ex laminâ æreâ constans, qui supra pag. 7 delineatus ac descriptus est, adhiberi solet, per quem stellarum situs vice longitudinum & latitudinum circulorum in globo inveniri possunt, idque hac ratione: Sumamus exemplum superius Capitis Medusæ: Cujus stellæ cum Latitudo borealis sit, extremitatē Quadrantis applico Zodiaci polo septentrionali, aliàs si Australis esset, polo Zodiaci Meridionali aptanda esset: Quo facto, quæro in Ecliptica 21 grad. Tauri, longitudinem nimirum stellæ, & huic alteram quadrantis extremitatem adjungo, isto enim modo quadrans officium circuli longitudinis capitis Medusæ supplebit. Si itaque ab ecliptica incipiendo latitudinem stellæ nempe 23 in gradibus quadrantis numeravero, ibi verum stellæ situm in globi superficie habebō.

Sic etiam reciproca ratione ex globo stellis exornato stellæ cujuscvis in calorum longitudinem tum latitudinem eruere poterimus.

Si enim quadrantem circuli per centrum stellæ alicujus dimittamus, idque ex polo Zodiaci septentrionali, si scilicet eadem in globi parte septentrionali constituta fuerit: sin vero in meridionali, ex Australi polo; gradus quem altera quadrantis extremitas in ecliptica demonstrat, longitudo stellæ erit. Gradus quadrantis ab ecliptica usque ad stellæ centrum latitudinem ejusdem tibi exhibebit. Sic dimisso quadrante ex polo Zodiaci septentrionali per lucidam coronæ, extremitas ejus in ecliptica in 6 grad. m. incidit, quæ est longitudo stellæ. Rursum ab ecliptica usque ad centrum ejusdem coronæ numerantur in quadrante grad. 44½, qui sunt latitudo stellæ septentrionalis.

*Declinatio* est distantia ab æquatore, numeranda in circulo majore transeunte per æquatoris polos. Itaque si aliquam stellam Meridiano applices, facile innotescet ejus inclinatio, numeratis gradibus & minutis Meridiani (si quæ sunt) quæ comprehenduntur inter medium stellæ & Æquatorem.

Declinatio stellarum itemque recta earum ascensio hunc in modum ex globo stellis consignato cognoscitur: Applicatur stella proposita meridiano circulo, confestim enim idem Meridianus inter gradus Æquatoris ascensionē ejusdem stellæ rectam indicat: Declinationem idem meridianus dabit, numerando meridiani gradus, qui inter datam stellam & æquinoctialem interjecti sunt; Exemplum sit Canis major cujus ascensio recta & inclinatio sic invenitur. Sistatur ipsa stella sub Meridianum, quo facto videbitur Meridianus secare æquinoctialem



lem in grad. 97 minut. 15. Atque hæc ascensio recta est ejusdem stellæ: Deinde ab eodem. Equinoctiali usque ad prædictum canem majorem interjacent gradus 16 versus antarcticum nimirum polum. quæ declinatio est stellæ & quidem ob causam jam indicatam Australis.

Potest idem in Sole demonstrari: Sol enim in 3 gra.  $\pi$  existens promovetur sub meridianum circulum, qui æquinoctialem intersecat (numerando a principio arietis in ipso æquatore) circa grad. 63. Quæ ascensio Solis erit in gradu Geminae 4 existentis: Gradus vero in Meridiano inter eundem Solis locum & æquinoctialem qui interjacent, sunt 21, quæ Solis est Declinatio & quidem Borealis, quia incidit in Signis borealibus.

Fieri & alia ratione idem potest. ut exempli gratia, lucidæ lyrae ascensio recta invenitur in Tabulis Astronomicis graduum 275, m. 31. Declinatio vero grad. 38 m. 26 Septentrionalis. Primum itaque ascensionis rectæ gradus numero in Equinoctiali ab ariete incipiendo, gradumque inventum Meridiano circulo adjungo, in quo deinceps Declinationem datam numero ab Equinoctiali progrediendo versus mundi polum Arcticum, siquidem stellæ declinatio septentrionalis est.

TABELLA STELLARVM ALIQVOT  
LONGITVDINES ET LATITVDINES,  
EARVNDENQVE ASCENSIONES RECTAS  
ET DECLINATIONES EXHIBENS.

|                           | Long. | Latitu. |   | Ascen. R. | Declina. |   |
|---------------------------|-------|---------|---|-----------|----------|---|
| Prima in cornu<br>Arietis | 28 0  | 7 20    | B | 20 0      | 18 0     | B |
| Plaustrum equus 1.        | 3 30  | 53 30   | B | 188 10    | 57 27    | B |
| Equus tertius             | 21 10 | 54 0    | B | 202 24    | 51 5     | B |
| Caput Dracon.             | 21 0  | 75 30   | B | 226 8     | 52 8     | B |
| Bootis sin. hum.          | 11 0  | 49 0    | B | 212 50    | 40 0     | B |
| Arcturus.                 | 18 20 | 31 30   | B | 209 17    | 21 53    | B |
| Lucida corona             | 6 0   | 44 30   | B | 229 0     | 38 25    | B |
| Caput Herculis            | 9 0   | 37 30   | B | 252 51    | 15 16    | B |
| Lucida Lyra               | 8 40  | 62 0    | B | 275 31    | 38 26    | B |
| Gallina cauda             | 0 30  | 60 0    | B | 307 30    | 44 15    | B |



|                             |   | Longi. | Latit. |   | Ascen. R. | Declina. |   |
|-----------------------------|---|--------|--------|---|-----------|----------|---|
| <i>Rostrum Gallinae.</i>    | ♊ | 25 50  | 49 20  | B | 288 40    | 27 32    | B |
| <i>Pectus Cassiopeæ</i>     | ♊ | 2 10   | 46 45  | B | 4 23      | 54 26    | B |
| <i>Hircus</i>               | ♊ | 16 20  | 22 30  | B | 71 58     | 45 7     | B |
| <i>In sinis. cal. Pers.</i> | ♊ | 25 30  | 12 0   | B | 50 0      | 31 0     | B |
| <i>Caput Medusæ</i>         | ♊ | 21 0   | 23 0   | B | 41 0      | 30 0     | B |
| <i>Cap. Andromadæ.</i>      | ♊ | 16 40  | 24 30  | B | 357 0     | 27 0     | B |
| <i>In extre. ala Pega.</i>  | ♊ | 9 0    | 34 15  | B | 358 20    | 13 0     | B |
| <i>Pegasi hum.</i>          | ♊ | 15 0   | 41 10  | B | 341 11    | 13 0     | B |
| <i>Aquila</i>               | ♊ | 25 10  | 29 10  | B | 292 40    | 7 57     | B |
| <i>Caput Ophiuchi</i>       | ♊ | 16 10  | 38 0   | B | 288 32    | 13 5     | B |
| <i>Oculus Tauri</i>         | ♊ | 4 0    | 5 10   | B | 63 0      | 15 54    | B |
| <i>Castor</i>               | ♊ | 14 40  | 9 40   | B | 107 0     | 32 30    | B |
| <i>Pollux</i>               | ♊ | 18 0   | 6 15   | B | 110 20    | 28 30    | B |
| <i>Cor leonis</i>           | ♊ | 23 50  | 0 10   | B | 146 13    | 13 45    | B |
| <i>Spira Virginis</i>       | ♊ | 18 0   | 2 0    | A | 195 46    | 8 55     | A |
| <i>Lanx meridion.</i>       | ♊ | 9 20   | 0 40   | A | 217 8     | 14 0     | A |
| <i>Cor Scorpij</i>          | ♊ | 4 0    | 4 0    | A | 241 11    | 24 52    | A |
| <i>Cauda Capricorni</i>     | ♊ | 20 0   | 4 20   | A | 319 18    | 18 5     | A |
| <i>Crus Aquarij</i>         | ♊ | 3 0    | 7 30   | A | 337 47    | 17 24    | A |
| <i>Cauda Ceti</i>           | ♊ | 27 0   | 20 20  | A | 5 42      | 19 46    | A |
| <i>Ceti nares</i>           | ♊ | 9 0    | 7 45   | A | 40 32     | 2 47     | B |
| <i>Dext. hu. Orion.</i>     | ♊ | 23 20  | 17 0   | A | 83 34     | 6 16     | B |
| <i>Si. pes Orion</i>        | ♊ | 10 30  | 31 30  | A | 73 15     | 9 10     | A |
| <i>Canis Minor</i>          | ♊ | 20 30  | 16 10  | A | 109 45    | 5 53     | B |
| <i>Canis Maior.</i>         | ♊ | 9 0    | 9 0    | A | 97 15     | 15 56    | A |

Quod supra pagina 16 monetur lector inspicere 5 & 14 hoc partis hujus quarta. Caput, error typographicus est, cum intelligatur Caput sequens nimirum 15 & quæ ibi annotata subijciuntur.



## CAPVT XV.

*De invenienda deflexione acus magnetica à veri Meridiani situ (quam vulgò vocant nostrates Compassi variationem) ad datam quamvis latitudinem.*

**F**ERRVM tactum magnete ab interfectione veri Meridiani & Horizontis varijs locis variè deviare tam est testatum & cōprobatum quam quod maximè. Neque est hæc assertio solum nautarum commentum ad suos errores tegendos, ut voluit P. de Medina Naclerus regis Hispaniarum. Neque accidit hoc, quod magnetis vis longo usu & exercitatione debilitata defecerit, ut persuasum habuit P. Nonius: aut quod ab origine non sit rectè indita, ut alij frigidè coniectant. Suâ ipsa naturâ ita fertur. Hujus deflexionis causâ, hætenus frustra quæsitam, nemo assecutus est. In hoc, ut & in alijs abditis & abstrusis naturæ miraculis cæcutimus prorsus. Normam aliquam sive canonem hujus deflexionis, quasi regularis esset & ordinata, tradere conati sunt, & hoc frustra. Inordinatam enim testatur experientia, non ea solum, quæ ex crassiore nautarum coniecturâ desumpta est, longiuscule sæpe à vero berrante. Accuratiores multò observatis compertum est.

Apud insulas, quas vocant Açores, à Meridiani situ omnino non deflectere, tradunt vulgo. Apud eas, quæ sunt Occidentiores, vix aut non multum deflectere ausim affirmare. Si ad Orientem ab ijs insulis navigaris, cuspis ea, quæ Boream respicit, paululum ad Ortum vergit. Antuerpiæ in Brabantia 9 circiter grad: prope Londinum in Anglia 11 amplius grad. aberrat à vero Meridiano. Si ad Occidentem ab ijs insulis processeris, deflectet eadem cuspis ad Occidentem. In ora Americę maritima latitud. 35 circiter aut 36 grad. amplius 11 grad. à vero Meridiano deviat. Ultra æquatorem diversa longe est ratio. Prope extremum Brasiliæ promontorium in Ortum excurrent, (C. Frio vocant vulgo) 12 amplius grad. à Meridiano deflectit. Intra fauces Orientaliores Freti Magellanici 5 vel 6 grad. Si ab eo quod diximus promontorio ad Ortum Aphricam versus navigaris, augetur ea deflexio ad 17 aut 18 usque gradus. quod (ut coniectura assequi potuimus) contingit in Meridiano non multum distante ab eo, qui transit per



Açores. Inde minuitur deflexio ad 9 aut 10 gradus, quod accidit prope insul. S. Helenæ, paulum ad Occidentem. Inde ferunt minui, usque dum C. Bonæ Spei prætervectus sis, ubi volunt in ipso Meridiani situ jacere prope flumen illud, quod ab ea causa vocarunt Lusitani R. de las Aguias. Atque hæc tota deviatio est ad Ortum.

Hæc ex observatis (quantum patitur instrumentorum perfectio, quorum usus in navigando conceditur) satis accuratis, per sphaericorum triangulorum doctrinam calculatis, comperta habemus & explorata. Vnde multa, quæ de hac deflexione vulgo feruntur, partim falsa partim suspecta habemus. Quod in eo Meridiano, qui in Açores Insulas pertransit, ferrum hoc verum Meridianum ubivis respicit exacte: quod in ora Brasiliæ maritima cuspis Borealis in Occasum declinat (ut quidam ferunt) falsumprehendimus. Quod ad terram Bacalos (vocant nostrates *Newfoundland*) integris gradibus 22 amplius ad Occasum flectere prodiderunt, suspectum habemus; quod cum ea observatione, quam in ora Americæ factam diximus, deflexionis gr. circiter 11 parum videtur congruere, cui tantum fidimus, ut præterea nulli. Faceessant igitur, qui unicum hujus aspectus punctum quærunt, vel in terra, (ut magneticos montes non multum remotos ab Arctico polo) vel in cælo (utpote caudam minoris ursæ, ut Cardano videtur vel quod in Meridiano Açorensium jacet 16 cum dimidio gradibus ultra polum Boreum) ut Mercator voluit. Faceessant etiam, qui ex hac deflexione calculum investigandi locorum longitudes institui posse arbitrantur: quod utinam præstare possent, & revera fieret si unicum punctum semper respiceret.

Sed ijs missis videamus, quomodo hujus deflexionis quantitas, mediante usu Globi, quovis loco cognite latitudinis inveniatur. Primum parandum est instrumentum aliquod quo distantiam Solaris Azimuth à situ magneticæ acus observare liceat. Utuntur vulgò nostri Compasso vel indice nautico in 360 gradus diviso, filo transversim centro indicis in pixide imminente, quod objectum Soli umbram projiciat in centrum indicis. Hoc instrumentum nostri Nautæ vocant Compassum variationis. Neque incommodum videtur hoc instrumentum ad hunc usum. Sed velim ut aliquanto majore cura & accurate, quam vulgo solet, conficeretur. Hoc instrumento, vel alio quovis hujus generis, observetur distantia Solaris Azimuth ad quodvis tempus & locum à projectione acus magneticæ. Quantum autem i-

dem



dem Solis verticalis eodem tempore à vero Meridiano distet, supra docuimus exquirere. Differentia, quæ est inter distantiam Solis à vero Meridiano & à situ ferri magnetici, est Compassi variatio. Præterea docuimus superius, quomodo veri Ortus & Occasus amplitudo inveniatur. Si igitur huiusmodi instrumento, quod diximus, observetur, quor gradibus Sol oriatur aut occidat ab eo indicis seu compassi termino, quod Ortum aut Occasum videtur indicare: patebit similiter deviatio acus magneticæ à vero Meridiano, si qua sit.

Ad finem huius capitis & ea, quæ de acus magneticæ à veri meridiani situ declinatione referuntur operæpretium erit apponere quæ super hac quaestione aliquando ad Davidem Rivaldum oblata occasione perscripserit Iosephus Scaliger. Epistola exstat inter eas epistolas quæ anno 1610 cum aliis aliquot eiusdem opusculis Lutetiæ Parisiorum fuerunt evulgatæ. Et quia in eadem epistola de præcessionem quoque æquinotiorum accurate agitur, de qua ad caput secundum superius nonnihil annotavimus, hic pene totam epistolam ad verbum descriptam exhibebimus. Habet autem in hunc modum;

“ Literas tuas cum maxima voluptate legi, earum duo summa capi-  
 “ ta fuisse, χαλυβεκλίσια ναυτική, & περὶ ἡμῶν ἰσημερινή. Prioris in literis  
 “ meis mentionem injeci aliorum potius sententiam eliciens, quam  
 “ meam opponens. Proposui enim tantum non sanciri, ut quia illa de-  
 “ clinatio per meridianos indagatur, meridiani autē ex hypotesi mea  
 “ sint mobiles, videant Astrologiæ & Nauticæ rei periti, an ex hoc e-  
 “ piclhiremate causæ & argumenta tam manifestæ discrepantiæ inda-  
 “ gari possint. non enim proponerem, si scirem, sed potius demonstra-  
 “ tionibus ut id persuaderi possit, agerem: Quare sive ea est causa, quā  
 “ peto investigari ex hypothesi mea, sive alia, maneat secuta in sedibus  
 “ suis. Nam non satis est ad eam rem meridianorū investigatio. Prius  
 “ enim disputandum de natura magnetis, an ejus proprium sit, ut sem-  
 “ per in Septentriones tendat, & si ita est, quom tamen videamus ex-  
 “ tra terminum propositum tot gradibus declinare, quærendum un-  
 “ de hæc variantia, quæ profecto nulli alij rei, quam meridianis affig-  
 “ nari potest. Sed ne sollicitemus hanc quaestionem, consulendi sunt  
 “ qui de magnete scripserunt, præsertim Guilielmus Gilbertus Col-  
 “ cestrensis philosophus & medicus Londinensis; qui ante triennium  
 “ tres amplissimos commentarios de ea re edidit, quibus magis mihi  
 “ probavit doctrinam suam, quam Magnetis naturam. Nam incertior  
 “ sum quam dudum.

“ Reliqua



Reliqua est altera pars epistolæ tuæ περὶ περὶ γήσεως ἰσημεριῆς. Pri-  
 mus omnium Hipparchus ex observationibus τῶν ἀπλανῶν Aristar-  
 chi Samij, Cononis & Timocharcidis animadvertit æquinoctia suo  
 ævo εἰς τὰ προηγούμενα promota esse, quod quatuor κέντρα remotiora  
 essent ab Epocha stellæ designatæ, quam fuerunt temporibus eorū  
 astronomorum. Quod quum vidisset non dubitavit pronunciare æ-  
 quinoctia immobilia esse, sphaeram autem τῶν ἀπλανῶν εἰς τὰ ἐπόμε-  
 να moveri. Non solum hoc sibi persuasit, sed & Ptolemæo, Ptoleme-  
 us posteritati. Tantum valet præjudicata autoritas. Sphaeram etiam  
 solidam innovavit, cujus polus arcticus abesset à cauda cynosuræ  
 gradibus 12.24. idque maluit sibi persuadere, quam an ita res habe-  
 ret, noctu cælum ipsum consulere. quod non possum satis mirari:  
 quum non solum ejus ævo, sed etiam ccxvi i i annis ante illum cau-  
 da cynosuræ non plus abesset à polo mundi, quam hodie abest, ut  
 Eudoxus observavit. Quod validissime in libello nostro demonstra-  
 mus. Rursus Eratosthenes qui ccxvi i i annis post Eudoxum scrip-  
 sit, idem de eadem stella pronunciavit, idem pronunciarunt qui sub  
 Augusto scripserunt. Si igitur ante Hipparchum annis ccxvi i i illa  
 stella erat, ut hodie, quomodo constat ratio Hipparchi, eam abfuisse  
 à polo mundi grad. 12.24? Nā si sphaera τῶν ἀπλανῶν, ut sanxit Hip-  
 parchus, moveretur in succedentia & illius ævo cauda cynosuræ a-  
 berat à polo grad. 12.24, sequitur ut ævo Eudoxi remotior esset à  
 polo, puta grad. 13 aut 14. Hoc enim ratio processus illius motus  
 postulat. Atqui non plus distabat à polo quam hodie. Ergo & sibi  
 ipsi & omnibus qui hætenus eum sequuti sunt, imposuit Hippar-  
 chus. Nos certe collegimus omnes ejus τῶν ἀπλανῶν ἀνατολὰς καὶ δύ-  
 σεις, quas nemo unquam intelliget, nisi prius globum construxerit,  
 cujus polus arcticus absit à Cynosuræ cauda grad. 12.24. Quam rem  
 cum summo artifice Tychoni Brahe communicassem, obstupuit ad  
 novitatem & insolentiam ἐπιχειρήματος, & merito. Non enim illi in-  
 dicarem de constructione globi Hipparchi, & distantia caudæ Cy-  
 nosuræ a Polo illius globi. Quare videmus, quia cauda Cynosuræ  
 eodem intervallo a polo abfuit ante annos c i o i o cccclxvi i, quo  
 nunc abest, nullum omnino motum esse sphaeræ οὐδὲν εἰς τὰ ἐπόμε-  
 να, sed τῶν ἰσημεριῶν εἰς τὰ προηγούμενα, nam de motu non dubium est,  
 præcedit enim hodie æquinoctium stellam in cornu Arietis plusquā  
 grad. 28 quod tempore Eudoxi committebatur, fere in ipsa stella.  
 Sed



“ Sed utrum stella Solem, an Sol stellam relinquat, hic vero quæstio-  
 “ nis cardo est. Hoc est altero stabili, alterum moveri necesse est, sed  
 “ sphaeram aut stellas stabiles esse jam ostendimus. Sol igitur & pun-  
 “ cta ejus æquinoctialia mobilia sunt, & quidem eorum progressus est  
 “ in anteriora manifestus 28 graduum à temporibus Eudoxi. Vidit  
 “ hoc summus vir, alter nostri ævi Ptolemæus, Copernicus, *Vos*, in-  
 “ quit, *putatis sphaeram octavam in consequentia moveri; videte num poti-*  
 “ *us æquinoctia in anteriora processum faciant.* Inde vir ille omni laude  
 “ major, concludit esse *ἰσημερινὸν πρὸς ἡγήγησιν*, non autem *τῆς σφαίρας κί-*  
 “ *νησιν εἰς τὰ ἐπόμενα*. Nam altero dato, tolli alterum necesse sit, si enim  
 “ non est motus sphaeræ stellarum in consequentia, omnino est motus  
 “ æquinoctialium punctoꝝ in antecedentia. Hæc recte Copernicus.  
 “ Sed τὸ καριώτατον omisit, vel quia non animadvertit vel quia despe-  
 “ ravit posse demonstrari. Nam cum æquinoctialia puncta mobilia  
 “ sint & circulum maximum, qui ad ea describitur per xx Sphaeric. E-  
 “ lement. mobilem esse omnino necesse est. Et si circulus est mobilis,  
 “ & polus quoque mobilis. Proinde non est idem polus æquinoctia-  
 “ lis, cum polo mundi. Nam polus mundi est immobilis, ille mobilis:  
 “ & consequenter omnes circuli maximi per illos polos transeuntes,  
 “ id est meridiani, sunt mobiles. adeo ut horologia & scioterica vasa li-  
 “ neæ meridiani imposita, post aliquot annos decoquent fidem suam,  
 “ quia linea mota sit à pristina epocha: cujus variantiæ egregia argu-  
 “ menta in vetustatis monumentis observavimus. Hæc demonstrare  
 “ aut videre intererat Copernici, qui fabulosum & ridiculum motum  
 “ sphaeræ primus arguit, & præcessionem æquinoctiorum primus san-  
 “ civit: qui si ea, quæ nos *ἰσημερινὸς* ex priscis Astrologis observavimus,  
 “ vidisset, quæ erat ejus summa eruditio, statim manus dedisset, rem  
 “ mathematicè demonstrasset, quod sane non est arduum. Adeone  
 “ quisquam averso ab omni ratione Iudicio est, ut quum concesserit  
 “ puncta æquinoctialia mobilia esse, neget circulum maximum ab ea  
 “ descriptum mobilem esse, & hoc dato, polos mobiles, quo rursus  
 “ concesso, mobiles quoque meridianos esse? Qui hoc negat, quid il-  
 “ li mathematicis operam dedisse profuerit, non video. *At inquires, nō*  
 “ *mutantur meridiani, quia transeunt polos mundi, qui sunt immobiles.* Iā  
 “ oblitus es *συμπερίστροφῃ* nostri, non esse polum mundi eundem  
 “ cum polo æquinoctialis. Nam ille est immobilis, iste mobilis. I-  
 “ taque videmus necessitatem argumenti, & cum hæc ita sint, ad-  
 “ huc



"hac nos ignorare multa in sphaeræ constructione & situ. Nam hoc  
 "modo necesse est æquinoctialem circulum, non esse rectum ad po-  
 "los mundi; & multa alia quæ prudens omitto, quia mihi cum Ma-  
 "thematico res est, qui melius hæc me docere possit. Quare audacter  
 "dicam, tam manifestæ historiæ contradicentibus pudorem possu-  
 "mus imponere, quum hæc non solum ἱστορικῶς sed & ἀποδεικτικῶς ex-  
 "plicare possimus. Vestrum vero est, & omnium mathematicorū per-  
 "pendere & discutere hæc accuratius. Nam non amplius refragandi  
 "locus est, sed videndi, quomodo hæc melius demonstrari possint, &  
 "demonstratis constructio & positus sphaeræ corrigi. Plebeis enim  
 "mathematicastris hæc non dico, qui nihil unquam præter libros  
 "Theoriarum legerunt, nec veteres consuluerunt, quos etiam si adi-  
 "rent, non intelligerent. De motu trepidationis jam explosa est fabu-  
 "la, de libramento Copernici, quæ res & ipsa inutilissima est, aliquan-  
 "do dicemus, unde hæc deliratio tanto viro incesse-rit, nam nō multū  
 "differt ab impostura trepidationis. Quemadmodum veritas loco  
 "pepulit illam trepidationem, ita illum motum octavæ sphaeræ eodē  
 "relegandum necessitas tandem coget. Hæc ergo summa responsio-  
 "nis nostræ: nos orare peritos harum rerum, videant, an hæc variantia  
 "acus Magneticæ possint illustrari ijs, quæ de mobilitate meridiano-  
 "rum diximus: nullum esse motum octavæ sphaeræ in consequentia:  
 "nos primos illud demonstrasse: inde necessario sequi προήγησιν ἰση-  
 "μερίαν. Hac concessa, puncta æquinoctialia, æquinoctiales circulos,  
 "polos eorum, meridianos per eos traeseuntes esse mobiles. alium i-  
 "gitur esse polum mundi à polo æquinoctialis. Horologiorum situs  
 "mutare post aliquot annos. Ejus pulcherrimæ rei nos historiam pri-  
 "mos observasse. Nam ex Matthesi necessario id sequitur. Hæc est scē-  
 "tentia mea, quam semper tuebor. Tu vero amplius cogita ac nos a-  
 "ma. Lugduni Batavorum xvi Kalend. Mai Iuliani c15 15 CIV.

Haftenus Iosephi Scaligeri epistola. In qua quod Guilielmum Gilbertum  
 Colcestrensem tres ait amplissimos Commentarios de Magnete scripsisse esse  
 mnemonicum erratum hinc liquet; quod sex non tres eius de Magnete libri ex-  
 stent Londini apud Petrum Short anno M DC excusi. Quorum quartus & quin-  
 tus præcipue de ista acus Magneticæ variatione & toto chaluboclisæ negotio  
 luculenter agit. Quod autem in libello suo validissime se demonstrasse addit  
 caudam Cynosuræ eundem hodieque situm, quem olim tenuerit, tenere: intel-  
 ligitur *Diatriba de Equinoctiorum anticipatione* edita Lutetiæ Parisiorum anno  
 1613, accurante Iano Rutgerio apud Hieronymum Drovart in via Iacobæa li-  
 brarium,



brarium. Quam Diatribam comperio Iohannē Maginum Patavinum, Mathematicarum artium in Italia Bononiæ professorem, confutare aggressum: ut indicat Catalogus vernalis hujus anni 1617. Romæ enim apud Andr. Brugiotti & Coloniae apud Ant. Hierat in 4°. Confutationem hanc (in qua insuper nova quædam dogmata de stella Polari & mutatione æquinoctiorum & stellarum fixarum immobilitate ac aliis varijs rebus Astronomicis, ut titulus promittit, impugnantur) proflare memoratur; Quamvis exemplaria, diligenter inquisita, nobis ad huc nulla videre contigit.

## CAPVT XVI.

## QUOMODO PER GLOBVM CONSTRV.

## ATVR HOROLOGIVM SCIOTERI.

## CVM AD DATAM QVAMLIBET

## LOCI LATITVDINEM.

**I**NTEGRVM artificium construendi horologia non pollicemur. Prolixius est quam quod hoc loco præstari possit, & quam nostri instituti ratio patitur. Saterit paucula quædam delibasse, & nonnulla hujus artis fundamenta quasi digito monstasse: quoniam per Globorum usum commodissimè concipi possunt.

Duo horologiorum genera hoc loco monstrabimus, quæ maximè vulgaris: alterum vocant horizontale, quod describitur in plano horizonti parallelo: alterum vocant murale, quod describitur in plano erecto ad horizontem, ita ut Boream aut Austrum respiciat. Sed utrunque non incommodè dixeris horizontale, non quidem respectu ejusdem loci, sed diversorum. Itaque si planum horizontale sit, si erectum, si quovis modo inclinatum, unicum erit horologium in eo describendi artificium.

Videamus igitur, quomodo in plano horizontali alicujus loci horologium delineetur. Preparato igitur plano horizonti parallelo, ducatur in eo linea Meridiana Septentrionem & Austrum quam fieri potest accuratè respiciens. Hanc transversim secet ad angulos rectos alia linea Ortum & Occasum indicans: illa horæ 12 erit index; hæc 6 antemeridianæ & pomeridianæ. Centro facto in harum linearum cōcursu describatur peripheria in eodem plano ad quamlibet distantiam, quam secabimus in 360 partes; quæ vulgata est divisio omnium  
S 2
circulorum.



circulorum. Has etiam, si fieri possit, in minutiores æquales partes distribuere, non est inconcinnum. Restat ut in hac peripheria exquiramus distantias linearum horariarum ad datam loci latitudinem. Hoc ut præstemus usu Globi, constituatur Globus ad loci latitudinem. Majorem deinde aliquem circulum in Globo delineatum, eorum (inquam) qui per polos mundi transeunt, (utpote Colurum, si placeat, Æquinoctiorum) Meridiano applica, in quo situ horam indicat 12 sive medium diem. Volutato deinde Globo versus Occasum si libet, usque dum 15 Æquatoris gradus pertranseant Meridianum, signetur gradus horizontis quem idem Colurus in horizonte intersecat. Is enim in horizonte indicabit distantiam horæ primæ & 11 à Meridiano: quarum utraque unâ hora distat à Meridie. Volutato rursus Globo, dum alij 15 grad. percurrant Meridianum, idem Colurus indicabit distantiam horæ 10 quæ duabus horis Meridiem antevertit, & secundæ, quæ duabus item horis Meridiem subsequitur. Eodem modo reliquarum horarum distantia in horizonte signabuntur, 15 Æquatoris gradibus in singulis horis Meridianum percurrentibus. Sed cavendum hoc est, ut numerentur hæ distantia ab ea horizontis parte, quâ polus attollitur: utpote à Borea horizontis parte, si polus Boreus elevetur, ab Austrina, si Austrinus emineat. Has deinde horarias distantias in horizonte Globi notatas transferas in planum fabricando horologio destinatum, numeratis in ejus circumferentia gradibus numero equalibus ijs, quos Colurus in horizonte Globi signavit. Erigendus postremo est in plano stilus sive gnomon. Vbi hoc observandum (quod est præcipuum ac propè unicum in hac arte præceptum) ut ea gnomonis acies aut linea, quæ horas sua umbra indicat, in omni horologiorum genere sit parallela axi mundi, ita ut cum suo plano æqualem faciat suæ inclinationis angulum atque axis mundi cum horizonte. Oportere gnomonem, Austrum & Boream respicere, sive in Meridiani situ jacere, adeo notum est, ut frustra monuerim. Hæc est ratio construendi horologium in plano aliquo horizonti parallelo.

Si erigatur planum horizonti ad perpendicularum Boream aut Austrum respiciens (vocant vulgo Murale) hoc unum consideretur (cujus ignoratio eos, qui vulgo tradunt artificium describendi horologia, in multos labores & difficultates conjecit) unum inquam hoc advertatur, planum illud, quod uno loco erigitur, in alio loco esse horizontale, in eo inquam loco cujus vertex 90 gradibus ab eo loco distat  
ad




ad Austrum aut Boream. Exempli causa. Construendum sit horologium in plano aliquo erecto ad latitudinem 52 grad. Hoc nihil est aliud quam describere horologium in horizonte latitudinis 18. Si planum sit erectum ad latitud. 27 erit horizontale ad latitud. 63. Eadem de cæteris omnibus ratio. Hinc manifestum est, horologium horizontale & verticale idem esse ad latitud. 45. gr.

Hoc artificio licebit describere horologium in plano quovis modo ad horizontem inclinato, modo inclinationis quantitas cognita sit. Vtpote, in plano inclinato ad horizontem in latitud. 52 Bor. cujus inclinatio est graduum 10 ab horizonte ad Austrum, si inscribendum est in eo plano horologium horizontale ad latitud. 62 grad. Bor. Si planum in eadem latitudine attollatur 16 grad. ab horizonte ad Boream, erit illud horizontale ad latitudinem gr. 36 Bor. Hæc de fabricandis horologijs monuisse sat esto.

# PARS VLTIMA.

## DE RUMBIS IN TERRESTRI GLOBO DELINEATIS,

ET EORVM VSV.



**I**N eas eas quas navis sequuta acum magneticam sui itineris ducem in æquoris superficie describit, Petrus Nonius latine vocat Rumbos, mutuatus hoc nomē à suis Lusitanis. Quoniam autem usus obtinuit, ut inter eruditiores etiam usurpetur hæc vox, licebit nobis etiam uti. Rumbi in globis exprimuntur circulis vel majoribus vel minoribus, vel lineis quibusdam tortuosis & incurvatis. In chartis suis marinis nautæ rectis lineis exprimere solent. Sed hoc est à veritate alienum, nec ullo modo ab erroribus defendi poterit. Inventio hæc & consideratio delineandi Rumbos in Globo aliquanto est antiquior. Petrus Nonius Lusitanus multa de his in duobus lib. quos de navigandi ratione conscripsit. Mercator etiam in suis Globis eas expressit. Sed usus eo-



rum usque dum non adeo vulgo notus. In horum itaque explicatione par esse duximus, ut prolixius paulo insisteremus, & eorum naturam atque originem altius repetentes, ad eorum usum in ratione navigandi deveniremus.

Ordinemur autem ab explicando ortu atque natura indicis Nautici, quem Compassum vocant nostrates Nautæ. Esse autem planum rotundum, cujus circumferentia in 32 partes æquales secatur, rectis lineis per centrum transeuntibus, tam est notum quam quod maxime. Vnicum ejus punctum, cui supponitur acus magneti affricta, Boream respicit, cujus oppositum necessario Austrum respiciet; & reliqua ejus puncta certas & fixas in horizonte sedes (oportet enim, ut Compassus sit horizonti parallelus) respicient. Fixas voco docendi gratia, non oblitus ferrum magneti affrictum, præterquam quod sua natura variè aberrat varijs in locis, à Meridiani situ (quam vocant variationem Cōpassi vulgo:) pro diversarum gentium more variè etiam in Compasso positum esse. Sunt enim qui gradibus 5 m. 37 amplius seponunt ad Orientem ejus puncti, quod Borealem mundi plagam indicat, ut Nostrates & Hispani. Sunt qui gr. 3 m. 18 fere. Sunt qui integris gr. 11 cū parte quarta ab eodem puncto separant. His tamen non obstantibus supponamus, ferrum perpetuo respicere Boream & Austrum. Sunt autem hæ lineæ in Compasso Nautico expressæ, communes sectiones horizontis & circulorum verticalium, vel potius his parallelæ. Ea, cui acus subjicitur, communis est sectio Meridiani & Horizontis. Hanc quæ rectè secat, communis est sectio Horizontis & Verticalis circuli ducti per Ortum & Occasum Æquinoctialem. Sic habemus quatuor præcipuos mundi Cardines. Et totus horizon in quatuor æquas partes dividitur, quarum quælibet 90 grad. complectitur. Si quamque ex his partem rursus dispecas in 8 partes, per 7 Verticales circulos ab utraque parte Meridiani ductos per verticem, totus Horizon in 32 æquas partes secabitur, quarum quælibet grad. 11 cum quarta parte complectetur. Tot autem mundi plagas nautæ in suis profectionibus quam fieri potest diligenter solent considerare, minutiores partes & divisiones non sectantur. Hæc est Indicis nautici origo, quem ducem suarum profectionum sequuntur Nautæ.

Videamus proximè quales lineas navis secuta Compassum ducem in suo cursu describat. Ad faciliorem autem hujus rei intelligentiam hæc præmittenda ducimus: quæ si rectè perpendantur facile & perspicuum reddent totum hoc negotium.

1 Omnes



1 Omnes omnium locorum Meridiani per utrumque polum transeunt : *Ideo*que secant *Æquatorem* & omnes ejus parallelos ad rectos angulos.

2 Si dirigatur nostrum iter aliò quam versus alterum polorum, novus subinde introducit Meridianus novusque horizon.

3 Ferrum, si magneti affricetur, communem Meridiani & horizonis sectionem indicat, & alter ejus terminus Boream alter Austrum perpetuo respicit quoadmodum. Non possum hoc loco tacere gravem lapsum Gemmæ Frisij, qui in Corollario ad 15 cap. Cosmogr. P. Appiani affirmat, ferrum magneti affrictum spectare polum Boreum citra *Æquatoris* liniam, Austrinum ultra *Equatorem*. Cujus opinioni refragatur experientia tum nostra tum aliorum. Fefellit opinor cum nimia credulitas. Adhibuit fidem vanæ alicui relationi temerè contra veritatem effictæ. Ut res se habet, gravis error & tanto viro indignus. Futilem hanc relationem merito jam antea damnavit illustriss. Iul. Scaliger ex fide navigationum Ludovici Verto-  
manni & Fernandi Magellanes.

4 Idem Rumbus secat omnes omnium locorum Meridianos ad æquales angulos, & similes mundi plagas, in omni Horizonte respicit.

5 Circulus major per verticem (ab *æquatore* remotum) ductus non potest secare diversos Meridianos ad æquales angulos. Itaque non assentior P. Nonio, qui voluit Rumbos confici ex portionibus maximorum circulorum. Cum enim portio majoris circuli intercepta diversis Meridianis vel minimè ab invicem disjunctis, inæquales cum ijs faciat angulos, non potest ex ijs Rombus conflari per propositionem præcedentem proxime. At inæqualitas hæc angulorum (inquit) non percipitur sensu nisi in Meridianis longiuscule remotis. Esto. At arte & apodixi hujus positionis error percipitur. Non decuit summum mathematicum præceptiones artis sensu metiri.

6 Circulus major per verticem alicujus loci ductus & ad Meridianum inclinans, majores facit angulos cum alijs omnibus Meridianis, quàm cum eo, à quo primo ducitur. Oportet itaque, ut linea, quæ cū diversis Meridianis æquales facit angulos (ut sunt Rumbi) incurvetur ad Meridianum. Hinc fit, ut navi procedente secundum unum & eundem Rumbum (præter quatuor primarios & cardinales) linea describatur ad helicam formam incurvata, quales in Globo terrestri delineatos videas.

7 Portiones



7 Portiones ejusdem Rumbi inter duos quosvis parallelos quorū differentia latitudinis est æqualis, intercepti, & ipsæ sunt æquales. Itaque æquale ejusdem Rumbi segmentum, æqualiter ubivis locorum latitudinis differentiam immutat. Verum igitur est vulgare nautarum præceptum, æquali spatio alicujus itineris in eodem Rumbo, alterum polorum æqualiter attolli aut deprimi. Et fallitur Mich. Coignet, qui ex malè assumptis fundamentis contrarium sibi habuit persuasum.

Ex quarta propositione hoc oritur consuetarium, Rumbos productos non transire per polos. Cum enim idem Rumbus æqualiter ad omnes Meridianos inclinetur, Meridiani autem omnes per polos transeant: sequeretur, si Rumbus polos ingrederetur, ut eadem linea in eodē puncto infinitas alias lineas ad æquales angulos secaret: quod est impossibile, quoniam anguli alicujus pars toti non potest æquari. Neque facit contra hoc consuetarium, quod in postrema propositione diximus, inter quosvis parallelos æqualium distantiarum æquales ejusdem Rumbi portiones intercipi, ut inde sequeretur, segmentum alicujus Rumbi inter parallelum latitudinis grad. 30 & polum, æquale esse segmento ejusdem Rumbi inter æquatore & parallelum latitud. gr. 10 intercepto; quoniam polus non est parallelus. Verè hoc à Nonio positum est, Rumbos polum non intrare. At non æquè feliciter probatum. Nititur enim fundamentis contra veritatem assumptis, ut prius diximus. Perperam Gemma Frisius in append. ad 15 c. Cosm. Appiani dixit, Rumbos in polis concurrere; ut & alij, quos merito taxat Mich. Coignet.

His animadversis facile erit intelligere, quas lineas navis secuta magnetem sui itineris ducem in mari describat. Si prora navis dirigatur in Austrum aut Boream, quas plagas ferrum magnete tactum respicit; sub eodem semper Meridiano fit profectio. quia ut 3 prop. diximus, ferrum hoc Horizontis & Meridiani intersectiones respicit, & in ejusdem Meridiani plano situm est. Si prora dirigatur in eam partē, quā indicat Rumbus Orientis & Occidentis, delineabitur vel æquator, vel circulus ei parallelus. Si enim vertex in principio instituti itineris sub æquatore sit, navis delineabit æquatoris segmentum. Si vertex ab æquatore remotus sit vel in Austrum vel Boreā, describet noviter cursus parallelum tantæ ab æquatore distantie, quanta est latitudo loci unde sumus profecti. Vtpote, concipiamus institutum esse cursum ab aliquo loco æquatori subiecto secundum Rumbum Orientis & Occi-



& Occidentis : progrediemur semper in ipso æquatore, hac enim conditione iter conficimus, ut cum novo Meridiano, qui subinde in progressu exoritur, linea nostri cursus rectos faciat angulos. Nulla autem linea præter æquatorem hoc præstare potest, ut ex primæ prop. Corollar. manifestum est. Igitur huiusmodi cursu æquatoris portio describetur. Si ab aliquo loco extra æquatorem instituamus cursum secundum eundem Orientis & occidentis Rumbum, sub eodem semper parallelo versabimur. Omnes enim paralleli æquatoris secant omnes Meridianos ad angulos rectos per primæ prop. Corol. Licet autem prora semper spectet exortum vel occasum Solis æquinoctialem, sive intersectionem æquatoris & horizontis : æquatori tamen in progrediendo non appropinquamus, sed æqualiter semper ab eo disiungimur. Neque enim eò pervenimus, quo spectat prora, sed delineamus cursum, qui novum Meridianum, qui semper nobis progredientibus suboritur, secat ad angulos rectos, qui necessario erit parallelus. Si conficiendum sit iter sub aliquo Rumbo ad Meridianum inclinato, non fiet cursus in circulo aliquo vel maiore vel minore, sed in linea incurvata ad formam helicum. Si enim duxeris maiorem circulum per verticem alicujus loci inclinatam ad Meridianum, idem circulus secabit proximum Meridianum sub maiori angulo quàm priorem secaverit, per 6 prop. præcedentem, ideo non constituet aliquem Rumbum: qui idem Rumbus secat omnes Meridianos sub eodem semper angulo per 4 prop. Paralleli autem omnes secant Meridianos rectè, Per Corol. 1 prop. Non igitur ad Meridianum inclinant.

De lineis, quæ in profectionibus fiunt marinis, quæ ducem habent indicem nauticum dirigente acu magnetica, Gemma Frisius in Append. ad 15 c. par. 1. Cosm. P. Appian. sic habet. *Verum hoc obiter annotandum duxi, haud parum differre itinera pedestria ab ijs quæ navigijs fiunt. Nā ille per circulos Sphæra magnos fieri intelliguntur, ut rectè V Varnerus demonstravit Cōmentarijs in Ptolem. editis. Marina verò profectiones maximā ex parte curvæ sunt: quoniam rarò per circulos magnos fiunt; sed aliquando per æquatoris parallelos, dum navis in ortū aut occasum tendit; aliquando verò per maximos in Sphæra circulos, ut quando ab Austro in Septentrionem aut è contra navigatur, item sub æquatore tantū in Ortū Occasumve navigantibus. Alijs autē omnibus, directis licet secundum magnetis ductū, navigationibus, curvæ sūt itinera, quæ maximis circulis nō sunt similes, neque parallelis, sed neque circuli sunt, sed lineæ curvæ tantū, omnes tandē in*

T

polorum



*polorum alterum concurrentes.* Rectè hæc omnia, nisi quod lineas has in polo facit concurrentes, quod alienum esse à natura Rumborum supra monuimus.

Hactenus de origine & natura Rumborum sive linearum, quas navis in Mari describit secuta acum magneticam viæ ducem. Videamus, quem habeant usum in terrestri Globo delineati.

*De usu Rumborum in Globo terrestri.*

In navigandi arte quæ docet, qua via & ratione dirigenda sit navis, ut ab uno loco ad alterum proficiscamur, quatuor præcipue considerantur. Locorum longitudes, & latitudes, vel earundem differentia, Rumbus, & intervallum sive distantia inter duo loca secundum iter marinum dimensa. Intervallum enim alio modo Geographi, alio Nautæ accipiunt. Illi majoribus circulis locorū distantias metiuntur, ut post Wernerū Peucerus demonstravit in libello de dimensione terre. Nautæ circulis interdum majoribus, interdū minoribus, ut plurimum lineis incurvatis, cum itinera conficiant, distantias etiā metiātur par est.

Quæ & quot ex his danda sint, ut inveniantur reliqua, oportet ut consideremus. Loca autem, inter quæ iter nostrum conficimus, differunt vel sola longitudine, vel sola latitudine, vel utrisque.

Si sola differant latitudine, sub eodem constituta sunt Meridiano, ideo Rumbus, qui ducit ab uno ad alterum, erit Septentrionis aut Austri. Reliqua sunt, differentia latitudinis & intervallum, quorum uno dato alterum facile invenietur. Si data sit differentia latitudinis in gradibus & minutis, quomodo solent Nautæ, multiplicatus ille numerus graduum & minutorum per 60 (quot milliarum nostratia uni gradui vulgo tribuunt secundum Ptolemæi mentem, ut supra demonstravimus) prodit numerus milliariorum confecti cursus. Si per 17 cum dimidio eundem graduum numerum multiplicaveris, prodit itineris intervallum in Leucis Hispanicis. Contra si detur intervallum in milliaribus aut Leucis, si divides eorum numerum per 60 vel 17 cum dimidio; quotus indicabit numerum graduum & minutorum, qui congruit differentia latitudinis inter duo data. Vtpote, si ab extremo Angliæ promontorio Occiduo (quod vocant *the Lizard*) versus Austrum navigetur, usque dum perventum sit ad promont. Hisp. quod C. Ortegál vocant: quorum differentia latitudinis est gr. 6. 10. m. si distantiam cupis cognoscere inter hæc loca, multip. 6. grad. 10. m. per 60. prodit 370 numerus milliariorum nostratium inter duo data loca.



loca. Multo autem rectius per milliaria nostratia instituetur calculus, quia 60 ex his respondent uni gradui, ut uni minuto unum etiam miliare congruat, unde prolixus & operosus per fractiones labor plurimum vitabitur.

Sequuntur loca, quæ differunt solâ longitudine, quæ si Æquatori sint subjecta, cognito intervallo differentia longitudinis invenietur: vel converso, per multiplicationem aut divisionem, eo modo, quo inventa est supra latitudinis differentia. Quod si posita sint extra Æquatorem, alia ratio est ineunda. Cum enim paralleli omnes minores sint æquatore, qui propiores sunt paulo, qui remotiores sunt magis, qui prope polum maxime: hinc fit, ut certa aliqua & determinata mensura omnibus parallelis non possit attribui. Vulgus Nautarum gravius aberrant, dum tribuunt uni gradui cujusque paralleli æqualem mensuram cum uno gradu Æquatoris, unde multi errores in navigando orti sunt, & multæ terræ partes proprijs sedibus expulsæ in alienas introductæ sunt.

Hæc etiam ex parte ut consulerem ijs, qui in Mathematicis minus sunt exercitati, Tabulam adjeci, quæ monstrat, quam habeat rationem unus gradus cujus libet paralleli ad gradum unum æquatoris, unde cujusque paralleli propria mensura inveniri possit. In hac autem Tabula prima semper Columella proponit parallelos æquatoris singulos per unum latitudinis gradum abinvicem distantes. Secunda ostendit minuta & secunda æquinoctialia, quæ uni gradui cujusque paralleli congruunt, quæ si convertas in milliaria, cognitum erit, quot milliaria convenient uni gradui cujusque paralleli.

Mediante hac Tabulâ, si facta sit navigatio sub aliquo parallelo, & Tabulâ, cognoscatur spatium confecti cursus, longitudinis differentia invenietur per proportionum regulam: vel converso, si data sit differentia longitudinis, intervallum invenietur. Exempli causa. Ab occiduo Africae promontorio, quod vocant vulgo C. Dalguer, navigatum sit versus Occidentem per 200 Leucas Anglicas, hoc est 600 milliaria nostratia. Quærimus longitudinis differentiam. Promontorium illud est latitudinis grad. 30. Bor. Vni autem gradui in eo parallelo congruunt m. 51 sec. 57, hoc est milliaria 51 & quinquaginta septem sexagesimæ partes unius miliar. Hinc fiet dispositio terminorum proportionalium ad inveniendam differentiam longitudinis. Milliar. 51. 57 m. (vel integra 52 quia tam exigua est differentia) dant unum gradum. Ergo 600



dant grad. 11 & viginti octo quinquagesimas duas partes, tantaque erit differentia longitudinis inter locum à quo processeris, eumque ad quem perveneris. Invertendi autem sunt termini, si data sit differentia longitudinis, quærat autem intervallum. Sed illud est minus accommodum. Neque enim solemus datâ longitudine intervallum quære, sed converso. Neque enim adhuc modum observandi longitudinû differentias habemus cognitum, utcunque vani quidam homunciones magna ostentatione hoc ipsum pollicentur. Verum *Expectata seges vanis deludet avenis.*

Sequuntur, quæ longitudine simul & latitudine differunt, quorû magna est varietas & multiplex differentia. Quatuor diximus in navigandiratione considerari: Differentias longitudinis, itemque latitudinis, Intervallum, & Rumbum confecti itineris. Duobus ex his datis inveniri possunt reliqua. Datorum autem & quæditorum transmutationes in his quatuor terminis 6 esse possunt ad hunc modum.

|              |                                |               |                                  |
|--------------|--------------------------------|---------------|----------------------------------|
| Data differ. | { Longitud.<br>Latitud. }      | inveniuntur   | { Rombus.<br>Intervallum.        |
| Data.        | { diff. long.<br>Rumbo }       | inveniuntur   | { Latit. differ.<br>Intervallum. |
| Data         | { diff. long.<br>Intervallo }  | inveniuntur   | { Latit. differ.<br>Rombus.      |
| Data         | { diff. latit.<br>Rumbo }      | Inveniuntur   | { long. diff.<br>Intervallum.    |
| Data         | { diff. latit.<br>Intervallo } | inveniuntur   | { Rombus.<br>long. diffe.        |
| Dato         | { Rumbo<br>Intervallo }        | inven. diffe. | { longitud.<br>latitudin.        |

Singulis binis datis singula bina exquiruntur. Pleraque ex his, (imo omnia



omnia, quæ aliquem usum præstare nobis possunt) per Globorum praxim perfici possunt. Hoc autem de universis semel admonuisse sat esto. Præter hæc data, latitudinem loci unde profecti sumus, & quartam mundi partem, quam in navigando secuti sumus, necesse est ut habeamus cognita: aliàs enim non poterimus commodè quæsitis satisfacere. Causa est, quia longitudinis, itemque latitudinis differentia, in duas mundi partes numerari solent, hæ quidem in Septentrionem & Austrum; illæ vero in ortum & Occasum. Præcipuè vero: quia à singulis Meridiani partibus & ab utroque ejus termino ducuntur Rumbi æqualium angulorum sive inclinationum, ideo nisi quarta mundi pars cognoscatur, versus quam progressi sumus, incerta erit inventorum notitia. Si quærenda sit latitudinis differentia, ea quidem invenietur, at non poterimus definire, utrum ea numeranda sit versus Austrum vel Boream. Si longitudinis differentiam quæramus, eam licebit dare, at ignorabimus, utrum oporteat numerare versus Ortum aut Occasum. Cùm Rumbus quæritur, inclinationem ejus ad Meridianum licebit dicere: sed non poterimus suam ei denominationem tribuere, nisi quarta mundi pars sit cognita, versus quam alter locorū ab altero vergat. nam à singulis Meridiani partibus Rumbi habent æquales inclinationes. His præmonitis singula disquiramus.

## I.

*Cognitâ differentiâ longitudinis & latitudinis duorum locorum, invenitur Rumbus & intervallum.*

Vertas Globum, donec Rumbus aliquis interfecet Meridianum in latitudine loci, à quo processeris. Deinde volvas versus Ortum aut Occasum, ut res postulat, donec gradus æquatoris numero æquales differentię longitudinis duorum locorum Meridianum pertranseant. Postea vide utrum assumptus Rumbus interfecet Meridianum in latitudine loci, ad quem perveneris, quod si fecerit, is est confecti itineris Rumbus: sin secus, alius assumendus est, usque dum occurrat qui hoc præstiterit.

Sierra Liona Africae promontorium est longitudinis grad. 15. 20. m. latitud. Bor. grad. 7. 30. m. Inde navigandum est ad Insulam S. Helenæ long. grad. 24. 30. m. lat. Austral. 15 grad. 30 min. Quæritur



Rumbus, in quo conficiendus sit cursus, quem ad hunc modum inveniemus. Adjungamus Meridiano gradum 356.40 min. longitudinis. Et observemus Rumbum, quem Meridianus interfecat in lat. Boreali 7. grad. 30. m. (quæ est loci latitudo, à quo progredimur) Is est Thracius & Leuconotus, sive ut nostri vocât, *Nortnorthwest and Southsoutheast*. Volvatur deinde Globus versus Occidentem (quia S. Helena Orientalior est Sierra Liona) donec grad. æquat. 9. 10. m. (quot sunt differentia longitudinis) pertranseant Meridianum. Et inveniemus in hoc Globi situ eundem Rumbū secari à Meridiano in latitud. Austr. grad. 15. 30. m. quanta est latitudo S. Helenæ. Hic ergo est Rumbus, qui ducit à Serra Liona ad S. Helenam. Hoc modo licebit invenire Rumbum inter duo quævis loca, vel expressa in Globo, vel concepta cum hac conditione, ut differentia latitudinis & longitudinis cognoscatur.

Si loca expressa sint in Globo, inter quæ Rumbum quæris extensis circini cruribus datorum locorum distantiam intercipe, eamque cuique Rumbo applica (sed in ijs locis ubi transeunt parallelos latitudinis datorum locorum) usque dum invenias Rumbum, cujus portio intercepta datorum locorum parallelis, conveniat distantiae inter circini crura interceptæ. Exempli causa, si velimus cognoscere, quis Rumbus ducat nos ab occiduo Africæ Promontorio (quod C. Cantin vocant) latitud. 32. 20. ad Insulam quæ vocatur Canaria latitud. 28. interceptam locorum distantiam applicamus cuique Rumbo, sed non alio in loco quam inter grad. latitud. 28. & 32 grad. 20 min. quæ sunt latitudines datorum locorum, atque inveniemus distantiam hanc applicatam Rumbo, qui dicitur Africo ad Favonium *Southsouthwest*, ita ut alter circini pes insistant latitud. 32. 20. alterum incidere in latitud. 28 ejusdem Rumbi. Vnde concludere licebit, à C. Cantin ad Canariâ navigationem instituendam esse Africo ad Favonium. Sunt qui docent, distantiam hanc locorum interceptam applicare cuilibet Rumbo apud æquatorem communi eorum concursu. Sed ij falsa nobis tradiderunt, suosque errores conscripserunt. Vtcunque enim (quod fatemur) portiones ejusdem Rumbi interceptæ binis parallelis æqualiter ab invicem distantibus in qualibet Globi parte sunt æquales; hujusmodi tamen extensione non sunt metiendæ. Rumbi enim propè æquatorem proximè accedunt ad majores circulos, remotius plurimum incurvantur.

Invento



Invento Rumbo intervallum quærimus. Nonius docet, accepto inter circini pedes spatio 10 Leucarum vel semisse unius gradus, intervalla locorum in dato aliquo Rumbo dimetiri. Alij intercipiunt 20 Leucas vel integrum gradum. Neutrum probo, nec alterutrum rejicio. Hoc solum moneo, pro locorum propinquitate vel remotione ab Æquatore, majorem mensuram vel minorem accipi posse. Prope æquatorem, ubi Rumbi, ut dictum est, ad majores circulos propius accedunt, majorem mensuram intercipere licebit. Cùm longius ab æquatore discefferis, quàm possis minutissimam distantiam oportet intercipias, quia Rumbi plurimum incurvantur. Accuratius tamen multo ex sequenti hac Tabula, cognito Rumbo & latitudinis locorum differentiâ intervalla locorum mensurabis. Sic autem habet.

| Rumb. | gr. | m. | sec. |  |
|-------|-----|----|------|--|
| 1     | 1   | 1  | 10   | Hic autem monstratur, quot gradus, minuta etiam & secunda, Æquinoctialis vel Meri- |
| 2     | 1   | 4  | 56   | diani convenient uni gradui in quovis Rum-   |
| 3     | 1   | 12 | 9    | bo. Gradui autem, ut sæpe diximus, respon-   |
| 4     | 1   | 24 | 51   | dent 60 milliaria, singulis minutis singula  |
| 5     | 1   | 47 | 59   | milliaria, secundis autem sexagesimæ unius   |
| 6     | 2   | 36 | 47   | millia is partes sive passus 17 proxime. Hinc li-                                  |
| 7     | 5   | 7  | 33   | cebit per regulam proportionum intervalla  |

locorum in dato Rumbo commodissime dimetiri cognitâ latitudinis differentiâ; vel converso, cognito intervallo latitudinis differentia innotescet. Exempli causa. A Promontorio Africæ, quod vocant C. Verde, latitudinis Boreal. grad. 14.30 navigatum est Africæ ad Austrum *Southwest and by South*, ad usque Promontorium Brasiliæ C. S. Augustin. latitud. Austr. 8 cum dimidio. Quærimus horum locorum intervallum, ad cujus inventionem sic disponimus proportionis terminos 1 grad. latitud. in hoc Rumbo, qui tertius est à Meridiano, habet 1 gr. 12 m. 9 sec. hoc est milliaria 72 cum novem sexagesimis partibus, ergo 23 grad. latit. (quot sunt inter C. Verde & C. S. August.) postulant milliaria 1659 & dimidium ferè, sive Leucas nostrates 553 paulo amplius: ut tantum sit intervallum C. Viridis & promontorij S. Augustini in tertio Rumbo à Meridiano dimensum.

## II.

Cognito Rumbo confecti Itineris & longitudinis differentiâ, queritur differentia latitudinis & intervallum.

Globum



Globum volvas, usque dum occurrat locus ille, ubi datus Rumbus Meridianum secat ad latitudinem loci, à quo processeris. Inde vertas versus Ortum aut Occasum, ut par est, usque dum gradus Æquatoris pares differentiae longitudinis Meridianum pertranscunt: Signaque latitudinis gradum, quem idem Rumbus in Meridiano interfecat. Is enim monstrabit latitudinem loci, ad quem perveneris.

Insula S. Helenæ longit. 24 grad. 20 m. lat. Aust. 15 grad. 30 m. est. Inde navigatum esto ad Corum *VWest Northwest*, ad locum aliquem Occidentaliorem grad. 24. Quærimus ejus loci latitudinem. Primo statuatur Globus, ut Rumbus ille interfecet Meridianum ad latit. Aust. 15 gr. 30 m. quanta est latitudo S. Helenæ, quod fiet, si gr. lon. 37. Meridiano adjungas. Vertatur deinde Globus versus Orientem, donec 24 gradus Æquatoris Meridianum pertransierint. Signatoque gradum Meridiani, quem idem Rumbus interfecat, qui est grad. Aust. latitu. 5 gr. 30 m. proximè. Tanta enim est latitudo loci, ad quem eo cursu perventum est. Cognito autem Rumbo & latitudinis differentia, intervallum ex præmissis facile colligetur.

## III.

*Data longitudinis differentia & intervallo, queritur  
Rumbus & latitudinis differentia.*

Non est quicquam in tota hac arte, quod difficilius sit inventu, quàm Rumbus ex dato intervallo & differentia longitudinis, neque aliàs quàm operosa & sæpius iteratâ praxi & multis dimensionibus exquiri potest per Globorum usum. Cumque sit hac praxis tam prolixa & tanti laboris, minus est necessaria aut prorsus inutilis: quoniam longitudinis differentia difficulter investigatur, ut supra monuimus. Cujus rei inventionem utinam præstarent magni nostri ostentatores, ut liceret tandem aliquid ab his expectare præter nuda verba, vanas pollicitationes & inanem spem. Sunt etiam (fateor) & aliæ praxes ex his, quas hoc loco tradidimus, minus item necessariae ex eadem differentiae latitudinis suppositione. At quia eorum praxis est faciliior, liceat exercitationis causa proposuisse.



*Cognita differentia latitudinis & Rumbo, invenitur  
differentia longitudinis & intervallum.*

Statuas Globum ita ut datus Rumbus secet Meridianum in latitudine loci, à quo processeris. Deinde circumagas versus Ortū aut Occasum, ut res postulat, donec idem Rumbus secet Meridianum in latitudine loci, ad quem perveneris. Vtroque loco signato, numera gradus Æquatoris interceptos Meridianis utriusque. Tanta enim est longitudinis differentia.

C. D'alguer Africae Promontorium est latit. Bor. 30 grad. proximè. Hinc navigatum esto Circio ad Favonium *North west by west*, ad latitudinem 38 Bor. itē. Quæritur longitudinis differentia. Vertamus Globum, donec Meridianus secet datum Rumbum in latitud. Bor. gr. 30, quod fiet, si 7 grad. longitud. Meridiano applies. Convertatur inde Globus versus Orientem, usque dum Meridianus secet eundem Rumbum in latitud. grad. 38 Bor. quod fiet, cum gradus longit. 352 Meridiano accesserit. Est itaque locus ille, ad quem perveneris, occidentalior C. Dalguer grad. proximè 15 atque transit ejus loci Meridianus per Orientalem partem Ins. S. Michaelis Aforensium. Intervallum quomodo inveniatur cognito Rumbo & latitudinis differentia, dictum est in prima propositione.

## V.

*Cognita differentia latitudinis & intervallo, invenitur Rumbus & differentia longitudinis.*

Rumbus ex ea tabula, quam supra posuimus, commodissimè invenietur. Exemplo res erit manifesta. A promontorio Africae maximè occiduo, quod vocant C. Blanco, quod est latitudinis Boreal. 10 grad. 30 m. navigatum esto inter Septentrionem & Occidentem per intervallum milliariorum 1080. ad latitud. grad. 20. 30 m. Bor. item. Quæritur Rumbus. Sic autem exquiritur. Differentia latitudinis est gr. 10. intervallum 1080 milliariorum. Hinc orietur hæc terminorum dispositio.



fitio. Gr. 10 milliar. 1080 congruunt. Ergo gr. 1. milliarium 108. Quæ si dividas per 60. in quoto 1. grad. 48 m. inveniemus. Quem numerum si in tabulâ quæras, inuenies Rumbo 5 adjunctum. Neque enim ille numerus minor est hoc nostro amplius uno scrupulo secundo. Vnde pronuntiare licebit, navigationem esse factam quinto Rumbo à Meridiano inter Septentrionem & Occidentem. Inuento autem Rumbo & cognita differentia latitudinis, longitudinis differentiam per secundam propositionem exquiras.

## VI.

*Dato Rumbo & intervallo, invenitur differentia  
longitudinis & latitudinis.*

Hoc etiam per superiorem Tabulam facile investigatur. Exemplū solum ad hoc etiam monstrandum sufficiet. Ab extremo Africae Promontorio Austrino, quod C. Bonæ Spei vocatur, latitud. Austr. grad. 35 proxime navigatum est ad Thracium *Northnorthwest*, (qui 2 est Rumbo à Meridiano) milliaribus 642 amplius, vel si placeat integris 650. Quærimus differentiam latitudinis, quod hoc modo fiet manifestum. Gradus & minuta, quæ conveniunt uni gradui latitudinis in secundo Rumbo, convertamus in milliaria. Ea sunt 64. 56 m. pro quibus licebit accipere integra milliaria 65. Sic deinde sunt disponendi termini proportionis. Milliaria 65 congruunt uni gradui latitudinis. Ergo 650. decem gradus latitudinis convenient. Quos si demas à 35 latitudinis loci, à quo profectum est, quia navigatum est versus Æquatorem, reliqui sunt gr. 25 latitudinis Australis loci, ad quem pervenimus. Cognito autem Rumbo & inventa differentia latitudinis, ex secunda propositione invenietur differentia longitudinis.

## E M E N D A N D A.

In Annotatis ad Præfationem Authoris paginâ quæ C. 3 notatur, legend. *dum ibi adhuc ageret Tycho.* Postmodum. Pag. sequente vers. 19. leg. *punctum.* ibidem vers. 43 leg. *Arcus.* Pag. 13 vers. 9 leg. *præcessionem.* Pag. 16. vers. 17 leg. *agemus.* Ibid. vers. 18 leg. *Cap. 15.* Pag. 22 vers. 19 leg. *haberi.* Ibid. vers. 22 leg. *conclitet.* Pag. 27. vers. 22 leg. *fecere.* Ibid. vers. 35 lege. *existimet.* Pag. 28 leg. *maiores.* Ibid. vers. 37 leg. *suo non sub.* Pag. 38 leg. *proprie.* Pag. 52 vers. 7 & 10 leg. *antecanis.* Pag. 59 vers. 9 leg. *Scandinavia.* Pag. 63 quæ posita est annotatio referenda ad pag. 65 post vers. 25. Ibid. vers. 30 leg. *propioribus.* Pag. 64 annotatio de Africa referenda ad sequentem pag. 65 post vers. 16. Pag. 91 leg. *disti.* Pag. 99 vers. 25 leg. *cedens.* Pag. 100 vers. 1 dele *vero.* Pag. 112. vers. 31 leg. *indicatam.*

## F I N I S.



FIDELITER.



AMSTELODAMI.

Excudebat IUDOCUS HONDIUS, sub signo  
Canis vigilantis in Platea Vitulina prope Senatori-  
am Domum ANNO, cl<sup>o</sup> l<sup>o</sup> c<sup>o</sup> xvii.



67-423

5.6.67

LC Harper Inc



D617

H 887+



21204







